

ASO TOFI, 25 JANUARI 2018

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2018.

FAILAUTUSI: E tusa ai ma le Tulafono Tumau 27(1), ou te faasila sila faaaloalo atu o lo o toesea le Fofoga Fetalai, ma o le a tauaveina e le Sui Fofoga Fetalai le Nofoa mo le aso Fono lenei.

Tatalo.

SAUNOAGA FAAFEILOAI A LE SUI FOFOGA FETALAI

SUI FOFOGA FETALAI: Ou te faasila sila atu ua amatalia nei Taualumaga a le Fono Aoao Faitulafono.

E lagona i lenei taeao ua sagisagi faamanuao ma ua savili faapunaoa lagona, ua ua tala mai le lagi le Silisilise o le Atua, ua faaalia foi i le vanimonino galuega mamana a Ona Aao. A o le fetalaiga foi nai le tai toafa, fai mai le faamatalaga o Fotu na tu i ululau, a o Taliau na tu i mulilau. O le agaga lena o le Atua i lenei taeao, aua o Ia na muaau ma muliau na malutia ai le soifua ma le ola a o i ai le Malo ma le atunu i le malologa i le po ua mavae. A lea ua tatou futifuti manuula i le malama ae o le aso fou o lagona fou, foi ia te Ia le viiga.

E ia te au le agaga faaaloalo e ofo alofa ma faatalofa atu i le paia mauluga o le Maota, i le afio o lau Afioga i le Taitai o le Maota lau Afioga i le Palemia, le paia o le Kapaneta, o Sui Minisita o le mamalu o sui usufono o Komiti Faa-Palemene, sui a usufono uma o le Palemene, malo le soifua.

E faapena foi ona faafeiloai atu i Faauluuluga uma o Matagaluega a le Malo, Faauluuluga o Faalapotopotoga Tumaoti a le Malo, e lima ma vae i ai le galuega Faa-Palemene, malo le soifua i lenei taeao fou. Ou te faatalofa foi i le faafogofa tapuai mai a lo tatou atunu, le paia aua Aiga, o Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, ae a le paia o le aiga Sa Levi, o e o lo o faanonomanu aua se manuia o tagatanuu uma o Samoa. Malo le tapuai, malo le tatalo mai, ia auomanu mea uma i lenei aso i la outou tapuaiga.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2017/2018 – felafolafoaiga i luga o le fai tauga faalua, faaauau mai le aso fono ananafi – Aso 3

SUI FOFOGA FETALAI: E tolopo Taualumaga anapo ua maea ona saunoa le Afioga i le Minisita mo Tina ma Tamaitai, Atinae o Nuu, Afioaga ma Agafesootai.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

Ou te tapa ma le faaaloalo lau Afioga i le Minisita mo Tupe Maua, e te saunoa e talifuaitei i matupu na laga e sui usufono mamalu.

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fatalai, ou te talitonu o lenei taeao ua uma ona e molia Laau i Fogaa aua lo tatou va ma lo tatou Atua, ua uma foi ona e paepaeifanua le sa o lo tatou atunuu o lo o faafogofa mai. Ae ou te talitonu o lenei taimi o le a fai atu se faamatalaga e tusa ma manaoga aemaise foi o fautuaga sa aumai i a matou Matagaluega nei e lua o lo o ou tauavea. E toeitiiti nisi na oo lo latou i manatu na faaalia i le Matagaluega o Tupe Maua. Ou te talitonu o le Matagaluega lenei o Tupe Maua o le tasi lenei o Matagaluega o lo o faamoemoe i ai le Paketi a lo tatou atunuu i a latou galuega fai.

I le tausaga ua tuanai atu nei e 3.7% na siitia ai tupe maua a le Matagaluega lenei i le 2015/2016, o lenei ua amata le 2017/2018 le Paketi, ia talosia ia ia tumau ai pea le agai i luma o le sailiga seleni a lenei Matagaluega, aua a faaletonu le Matagaluega lea, e faaletonu foi le faasoa a le Minisita o Tupe ona o le fatu lea o tatou galuega fai o lo o outou mananao mai ai i lea tausaga ma lea tausaga o auala ma vai aemaise ia le totogi a le aufaigaluega a le Malo o lo o fesoasoani i tupe maua mai. O a foi faaiuga fai ma ni metotia o lo o taumafai ia mafai ai pea ona sustain le tupe alu a le Matagaluega, ou te talitonu e le faigofie, e le taligofie foi e le atunuu. O le taimi lenei o lo o ua faagaoioi le taulaga pei ona i tax a faifeau, e le toe oo se tala i lea itu ua uma ona asa lea vasa, ma ua uma foi ona fai le tatou....pau le galuega a le Matagaluega o lo o faagaoioi ma faagaso solo pea le lesitalaina o faafeagaiga mai lea alaala faga ma lea alaala faga. E talosaga ai foi le Minisita mo Tina ma Tamaitai, Atinae o Nuu ma Afioaga ma Agafesootai e fesoasoani mai i le galuega lea ona o pulenuu o lo o latou silafia uma faafeagaiga i totonu o nuu taitasi. O lea la ua ave le talosaga e fesoasoani mai, ina ia mafai ai ona maua mai le aofai atoa o faafeagaiga i totonu o le atunuu, aua le faatinoina o le lafoga. O le lafoga ua amata ia Januari, e le mafai ona toe foi i tua le Matagaluega, o lea lava ua o i tua le Matagaluega e faafesagai ma faafeagaiga ma faamalamalama ma lesitala mai i latou, o lea lava o lo o faaauau lea galuega. Atonu pau lea e uiga i le Matagaluega lea o Tupe Maua.

I le sui usufono sa saunoa i mataupu o le tatou Fono lau Afioga i le Fofoga Fatalai, e 50% o i latou sa talanoaina le Matagaluega o Falepuipui, aemaise lava i le galuega o lo o fausia nei i Tanumalala. O le galuega o le falepuipui lau Afioga i le Fofoga Fatalai, o le galuega lea sa pasia e le Kapeneta le konekarate i le aso 20 o Aokuso 2017, ae amata le galuega i se vaitaimi o Oketopa, e oo mai lava i le taimi lenei o konekarate lava lea ia e tusa ua 60% i le 70% lea ua maea, ae faatoa 40% o le disbursement o le tupe ua ave.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O lea la e vave le galuega ma e faamoeemoe o le taimi lava o Me e tusa ma le konekarate e faamaea ai. E leai se variations o le galuega i le taimi lenei. O lo o tatou fefefe i le upu lea faapea o le variations o le sui usufono mo Anoamaa Sisifo, o le variations faapea o se mea e tupu lava i galuega uma, a o le variations foi e mafai ona faatele ai le tau pe pau mai ai le tau i lalo, e fua lava le galuega i galuega fai. O lo o i ai le Komiti o le galuega lea o lo o Taitafono ai le Afioga i le Komesina Lagolago, o lo o i ai le sui o le Ofisa o Tupe, o le sui o le Ofisa o le Loia Sili, sui o le Matagaluega o Galuega, o le Konesale OSM o lo o latou vaaia ma le Inisinia mai le Kramer o latou ia o lo o gafa ma le vaaiga o le galuega lea i le faatinoina i le taimi lenei. E i ai foi le Soa Komiti a le Kapaneta o lo o faamalumalu ai i le galuega lenei, o matou o au nei o le Afioga i le Minisita o Tupe ma le Afioga i le Minisita o Galuega, Felauaiga ma Atinae Eseese, o a ni faafitalui ma faigata e tulai mai, e lipoti mai le Komiti lea ia i matou tai kuata o le galuega quarterly ma lipoti mai i le matou Komiti. E pei ona fai atu e leai se variation i le taimi lenei o le galuega, o la lava e faaauau e taumafai....

SUI FOFOGA FETALAI: Malie lau Afioga i le Minisita, tulai mai le sui usufono mo Salega Sasae.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, faafetai atu i le Afioga i le Minisita ua manino mai nisi o vaega. Ae faapea lava au o mea ia o variations, e faatoa toe faatino variations pe afai ua toe fesiitai tau o mea o lo o faaaoga ai se galuega i le tulaga tau tupe. Ae afai lava o le tau na tauofo mai e faatino ai, o le a le galuega lea o le a faatino i le tupe lea, ia o le mea lena e tatau ona i ai. Ma o le concerned foi lea na avatu e le tele o sui usufono mamalu o le Maota lenei, ia ao ma tatau ona tauofo uma le tele o galuega leaga e le o se tamai tupe le tupe lea ia afford e faauma ai le galuega e ova ma le \$10 miliona. Pei o le mea lena o lea e tau avatu ai, ae ese foi le faauigaga o le variations lea e saunoa i ai le Afioga i le Minisita.

SUI FOFOGA FETALAI: Faafetai, tulai mai lau Afioga i le Minisita.

Afioga Hon TIALAVEA FEA LENIU TIONISIO HUNT: E taliton e malamalama lava le sui usufono i le tali o lana fesili, ae o le galuega lava ia o lea e faaauau, pei foi ona fai atu o isi galuega e sau e tender uma lava isi galuega ia, e le avea i le konekarate la ua i le taimi lenei le tele o isi galuega ia e fuafua mai, ma e mafai foi ona fau lava e le Falepuipui isi fale ia e totoe e mafai ona fai. E toatele le aukamuta o lo o i uta e mafai ona fesoasoani mai e faalaititi ai le tau o le galuega lea. O le mea foi lena e faamoemoe a move, o le tele o fale la e i uta matou te tatalaina ma ave e faaauau ai le galuega ina ia mafai ona maua nisi nofoaga lelei mo pagota.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O le isi ona sa fai mai ananafi e tusa po o a ni aoaoga o lo o faaaoga e le Matagaluega e fesoasoani ai i e o lo o nofosala atu. O le galuega o lo o fai i le falepuipui a avatu loa se tasi ua faasala atu i uta i le nofoaga, ona fai lea o suesuega mo manaoga o lea pagota, ona e faamasani ai, e 70% o i latou o lo o gasolo atu i uta e vaivai aoaoga. O le galuega la lena a le matou vaega o lo o galulue ai, e fai a latou trades, trainning for trades. A magalo mai, ua i ai ia ni a latou trades e mafai ona o atu i tua... o aafiaga afaia lava na alu tulou atu o le a lava le faasalaga pe fasioti tagata, o a lava moliaga na molia atu ai oe, o lena e agai i ai le aoaoina o oe i uta, ma talatalanoa ma consultations o mea e fai, ina ia mafai ai ona lelei behaviour a le pagota.

O isi galuega o lo o fai ai i le mafai ona toe foi atu i aiga pe a uma faasalaga, o la e o atu ma ni galuega e mafai ona fai ni galuega, ma ia lelei le toe fesootaiga ma o latou aiga. O le mea lena o lo o i ai ia le polokalame i le taimi lenei ma sa faauau mai lava i le taimi ua tuanai. E i ai lava i latou e mafai ona o i tua i faaiuga o vaiaso e mafai ai ona toe fesootai ma aiga ma omai ma toe foi mai i totonusi.

O lea polokalame talu ona i le tausaga ma le fitu masina talu ona tauave mai lea falepuipui e leai se isi o toe weekend mai fafo, o latou ia o lo o o atu i le weekend ma toe omai i totonu, ae o latou foi na o lo o faaaoga e le Matagaluega e faia ia faatoaga, o a lava galuega o lo o faatino e le Matagaluega, o le latou lena. O le taimi lenei i le Matagaluega lea ua pasi le ono masina o le Tala Faatau o le Tupe lenei, e 40% na faamoemoe mo le fofoga taumafa, la ua faaaoga, 60% la e totoe, ona o galuega la a latou nei, ua tele le mea tamaoaiga i taumafa, ua mafai ona faaaogaina, ua sefe mai ai ia le isi vaega o le tupe lea, ona ua lava tapena lava le falepuipui i le taimi lenei i a latou taumafa vagana ai ia pusamo, nai isi meaai e mafai ona avatu latou te faaaogaina ai le tupe lea. O la foi ua i ai le papovi a le falepuipui ua amata, o faatoaga, o a lava galuega o lo o mafai ona maua mai ai le fesoasoani aua le fofoga taumafa o le nofoaga, e talitonu o lo o taumafai ina ia mafai ona self sustain le nofoaga lenei mo a latou lava fofoga taumafa.

Faafetai i le Afioga i le Minisita o le SLC, ua mafai ona faamatuu mai le 470eka o lo o i Vaiaata, e lisina ai e le falepuipui, ina ia fai ai ia se faatoaga tele a le falepuipui. Faafetai foi i le Minisita o Faatoaga ua maua mai le 1000 fai, e amata ai le matou togafai ia Mati.

E talitonu o Matagaluega uma a le Malo o lo o galulue faatasi ma le Matagaluega o Falepuipui au a le....

Tofa Hon Laufo Fonotoe Nuafesili Pierre Laufo (Anoamaa Sisifo):
Lau Afioga i le Fofoga Fatalai....

SUI FOFOGA FETALAI: Tulai mai ia le sui usufono mamalu.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

Tofa Hon Lauofo Fonotoe Nuafesili Pierre Lauofo: Faafetai atu i le saunoaga faamalamalama a le Minisita o Falepupupi, ae ona o lea e matau atu ua tau see ese ma le galuega foi lea o lo o fai nei o le tausaina o tatou fale i Tuanaimato ae ua agai atu i le tulaga o taumafa aua le fofoga taumafa o i latou o lo o tuli a latou faasalaga i le Toese.

Ua ou toe tulai atu, sa ou lauga ananafi, ou te lagolagoina le faamoemoe lenei e taua, o lea foi sa faafogofa lau Afioga i le Minisita o Falepupupi i lau lauga ananafi. Ua ou toe tulai atu e tulituliloa lava le vaega lea, sa sausasunoa ai isi sui usufono na muamua ia au, ona aumai lea o le tali faamalamalama a lau Afioga ma le Afioga i le Minisita o Tupe, i le tau o le galuega sa taua e \$20 miliona. O lea la sa ou avatua i lau lauga ma lau folasaga, e faamauina vaega ia o lea ua malamalamalama atu i ai lou sui usufono, peitai o le saunoaga faamalamalama a le Afioga i le Minisita o Tupe anapo, ia sa ou musu ou te faauilavea sa ou faatali se i saunoa lau Afioga aua e talitonu e maua i lau Afioga le tali sao.

Sa taua e le Afioga e le Minisita o Tupe e faapea, i lou la manatu, pe \$15 miliona pe \$20 miliona pe \$25 miliona e fai ai mautu le galuega. O le mafuaaga la lea o lou tulai atu e toe fesiligia ma tulituliloa le tulaga lea, po o le a tonu lava le sao o le tau o le tatou galuega? Aua o lea sa e saunoa, o le galuega lenei, i tulaga o faiga faavae a le Malo, e muamua approve e le Kapaneta. O le a tonu le tau o le tatou galuega, pei o le mea lea e fia malamalamalama i ai, a? Aua i lau vaai i le ata, e pei ona ou talanoa atu ananafi, e le maea i se \$20 miliona le galuega lea, peitai o lea ua faagasolo le galuega e pei ona ou fai atu ananafi. O lea ua commit le Malo, e le mafai la ona tatou toe foi i tua. O lea sa ou fautua atu ai, fai ia maea le galuega, e tatau ona fai se variation pe a faapea e talafeagai ma tatau, aua o lea e tatou te le iloa atu pe te i ua i ai nisi vaega foi ia e tulai mai. A o le tau fuafua lava ia o le galuega lea e fia tulituliloa ma fia maua lau Afioga i le Minisita, po o le tau pe \$20 miliona pe ono oo atu i le \$30 miliona? O le faauilavea lea ma le faaaloalo lau Afioga i le Fofoga Fetalai.

SUI FOFOGA FETALAI: Faafetai, se i tulai mai lau Afioga i le Minisita.

Tofa Olo Fiti Afao Vaai: Lau Afioga i le Fofoga Fetalai, mo le faasaoina o le... ia faafetai. O le mea foi lena ua ou nofo ai, ua ou le malamalamalama leaga ua tele lava ia ituaiga tau nei ia po o estimations a le Afioga i le Minisita. Na saunoa muamua o le galuega lenei, e \$20 miliona faauma, ia toe saunoa faapea masalo ailoga e maua se \$20 miliona, ia toe sau le lona tolu, ua ova atu, ia ua matou nenefu uma i le vaega lea.

Ae mafua lau Afioga i le Fofoga Fetalai, aisea na le tuua uma ai mea ia i le taimi na fai ai le Tauofoga ina ia atoatoa lelei le faiga o le galuega, ae fai taitasi faapea? O lea matou te iloa lelei lava le uiga o le faiga lena, o se togafiti e manaia tele e lelei mo konekarate ma mea faapena, faafetai.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

SUI FOFOGA FETALAI: E ao ona ou toe faamanatu atu a tatou Tulafono Tumau, se i vagana ua avatu e le Fofoga Fetalai se avanoa ona saunoa lea. E lelei ona utagia ia ae faafetai i le sui usufono, na ona toe faamanatu atu, lelei lava.

Tulai mai lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, o le galuega lenei o le Falepuipui, o le galuega lenei o lo o fau i tupe a tatou, tupe a le Malo, leai se fesoasoani mai fafo o faaaogaina e fau ai le falepuipui, vagana le pa i fafo o lo o aumai ai le fesoasoani a Iapani ma le Treasury e faatino ai le pa lea i fafo, e \$1.3milliona.

O le auauai mai o le tau o le galuega i le amataga le galuega lea na tender ia Setema, o le estimates e \$10milliona le poloka lava lea na fai nei, ae aumai le tau ua \$7.4milliona le tau a le konekarate. O lea na fai auauai mai laia i le paketi le Main Budget ia Iuni le afa o le tau lea a le konekarate e \$3.8milliona na aumai i le paketi lea e fuafua ai le galuega lenei, e faamoemoe o le a lava le tau e oo ai le tender ua fai, ona fauma mai lea o le tau lea i le Estimate Budget lea o le tausaga lenei, le 1st Supplemaentary, le budget muamua, lea ua aumai ai ia le isi \$3.7milliona.

O le taimi lenei ua faagasolo le tender o le galuega o le admin, na faasolo e le Komiti lea, lea ua aumai ai le \$1.5milliona e fuafua po o le a le tau e sau foi le tender lea o le fauina o le Ofisa Tutotonu o le Matagaluega, a le uma i ai le tupe lea, ona faaaoga lea i nisi galuega e faagasolosolo mai. O le tau o galuega ma mea faatino, o tatou estimate, e estimate uma lava, e \$20milliona na avatu i le estimate cost. E le mafai, le mafai e se galuega ona atoatoa se tau, tele o isi taimi e avatu ia le estimate cost e tele atu nai lo o le tau na fuafuaina. O le isi taimi e alu atu tau e maua mai i konekarate e laitiiti, nai lo le estimated cost o le galuega.

O le matou lava fuafuaga o le galuega e \$20milliona, ona o lea matou te iloa, e i ai isi fale e fai e faaaoga ai isi fale la e i uta, ae e pei ona fai atu, tatou te le iloa mea e tutupu i le agai atu i luma. A o le galuega ia, o lo o fuafua....

SUI FOFOGA FETALAI: Malie le Afioga i le Minisita, se i saunoa mai le Taitai o le Maota.

Susuga Hon Tuilaepa Auelua Fatialofa Lolofietele Neioti Aiono Galumalemana Dr. Sailele Malielegaoi (Palemia): Lau Afioga, o lea ou te maua atu le agaga sa aliali mai ananafi. E pei e aumai fesili e aumai masalosalo, po o le tau moni lea? E i ai le faaupuga faaperetania, e tuufaatasai ai le guess ma le estimate, maua ai lea o le upu guesstimate.

E faapena uma lava fuafuaga a o le i faia se galuega, e guesstimate, aisea? Leaga o tatou mafaufauga faapenei, tatou te le iloa, na o le Atua lava Na te iloa, le mea moni.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Lau Afoga i le Fofoga Fetala'i, se ou te le tau fai atu na mea, o lena e silafia e le Maota, e na o le Atua e Na te iloa le mea moni. O le taumafaiga lea na taumafai atu ai le Minisita o Tupe ma le Minisita o Falepuipui, e tali atu i mea ia tou te fesili mai ai ma le masalosalo, a o mea ia o lea na fai ai le iuga a le Kapaneta.

E iloa lelei lava e le Kapaneta, e le mafai, a oo loa ina faatupe tatou ia mea faapenei, ua extra careful le tulaga o fuafuaga, ua matua faaeteete, aisea? O le mea lea e fau ai le mea e matua ma , o le matua ma lava e rocky, o le ogaeleele lea. O lea la e aumai lava le tau, a i ai lava le masalosaloga e ono tele le tupe e alu, i le taeiina mo le mea o le papa la e tu ai le fale.

O le ituaiga mea foi la lea o so o se Matagaluega o le Tupe, e faaeteete, e te alu atu i i ae sau i i le Ministry of Finance, se i tatou faatino ae tatou matamata. Ua lava lena tupe e fai ai i le taimi lenei ae mataitu, o le uiga lena o le mea o le faaeteete, o le Matagaluega o le Tupe. Ma e fai loa e tatou se project, ona fai loa lea faapea, e tatou te fai ma le faaeteete, a faatupe mai fafo, ia e manatua, a faatupe i fafo, e tele e faia tonu, e aofia ai ma latou e omai mai fafo. O le ala foi lena e fai si umi o fai tapenaga pe a involve loa le Faletupe mai fafo po o le Malo mai fafo.

A o ituaiga mea ia, sa tatou manatu e mafai ona faatino mai e Saina, ia na ave foi i ai le talosaga, ia na tatou o foi i isi e leai, leaga o mea na, o mea lava na e fai e outou. Ae e le mafai la ona nafonofo tatou i le tulaga o lea ua build up, ua faaaopoopo ma faaopoopo pea, i ituaiga solitulafono eseese, e le gata o solitulafono e aafia ai mariuana, a o solitulafono e aafia ai ma tagata mai fafo e taloka i inei, o la e loka i inei isi tagata mai fafo i uta. E tatau la ona fau le falepuipui e mafai ona cater mo ituaiga tagata eseese e le gata i o tatou tagata, a o tagata mai fafo, ma tagata mamai. Ua ese le tulaga lea ua i ai tatou ua le o toe o i le mea foi lele e fai faamanu le faiga o pagota, pei ni manu, leai, o isi foi tagata soifua, e tatau ona fai pei o ni tagata soifua, ia fai o kerisiano foi la tagata na fau i le image o le tatou Atua, o la e foi e afio ai le Atua i la tagata. E tatou te fai fuafua la ma le alofa.

Lau Afioga i le Fofoga Fatalai, o le taumafaiga la lea e avatu i i, o le taumafaiga ina ia tau tali atu mea ia tou te laga mai, ae so o se konekarate lava aemaise lava konekarate ia mai fafo e i ai ma aiaiga i totonu. Afai e fesuisuiua le fesuaiga o le tupe, e sui foi ma le tulaga o tupe e totogi e lo tatou Malo, o le exchange rate. E i ai le tausaga na fai ai foi, ua leva, ina ua uma Ofa, ae fau loa ia auala e alu atu lava i inei e tau i o i Falevao alu atu lava i Apia, e \$13 miliona le konekarate na malo, na fai e le kamupani mai Niu Sila, ae uma ane le konekarate ae sau le pili, e \$36 miliona le tau, ae aumai loa mafuaaga, ia o mafuaaga, o ane lea nuu taofi. E le o iloa e nuu nei, o aso uma e nofo ai le galuega, o aso uma foi na e alu ai i luga ia tau, ma o le matua tele o le mau faafitauli e feagai ma i tatou i taimi uma lava e fai ai galuega nei faakonekarate.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

I le tausaga e 1983, na alu atu ai le isi inisinia poto maoae, ua tatau ona toe fai le tatou malae vaalele, ona fono lea o matou, o au o le Palemia, o le Minisita o le Matagaluega o Galuega, o le a toe fai le tatou malae vaalele, o le malae vaalele e i ai tulaga faapitoa o le a tulauelolele ai le 747 ma le mea uiga ese i le tatou malae vaalele, e slope le malae vaalele e le sao. E ae i le aega. Ona tapa lea o le finagalo o isi inisinia fai mai latou, e le tele ni malae vaalele faapea e pei o le malae vaalele o Samoa, e slope, e ae i le aega. Ae o le lelei o le itu lena, e vave ai ona masii le vaalele ae vave foi ona tulauelolele ai le vaalele. O le ala lena o tatou la le isi malae vaalele e le tele i le lalolagi e aega le faataotoga o le malae vaalele. Ona ou fesili loa lea i le tau, o le mea lava lena e masani ona fesili ai le Minisita o Tupe. O Smith le igoa o le inisinia, fai mai Smith, e \$2 miliona. Ou fai atu e a? E \$2 miliona. E faapefea ona \$2 miliona le tau o le International? O le tau lena o lea e manatu matou e mafai ona fai ai. Ia, ona fai loa lea o suesuega atili, ae sau le tau e \$47 miliona. O lea la na ma o ai ma Tofilau ma talanoa ia Ausetalia, ona faatupe mai loa lea e Ausetalia le \$47 miliona e fai ai le tatou malae vaalele i le 1983. Ana faatali tatou se i fai mulimuli ane ai, e le \$47 miliona ae ova ma le \$100 miliona. O le mea la lena e taua tele ai le mea lea, a oo loa i le tulaga e silasila le Malo i le mea e tatou ona fai, fai loa. aua ne i pei tatou o le mea na tupu i le 1966 e avatu le tatou talosaga i le Afuilo i na o le \$1 miliona le tau i le taimi lena, ae a faaliliu tupe Samoa na o le \$400,000, ae sau le upu a faletupe, uneconomic, aua fai o la e taugofie le suauu, e toe fai atu Afuilo ua ova i le \$100 miliona tala Amerika le tau. O le mea la lena e taua tele ai le mea lea, a vaai loa le Malo i le mea e tatou ona fai, fai loa aua le toloa aua e toe fai atu loa, o lea sa saunoa manino i ai le Minisita o Tupe, aua e tolo loa se i fai i se isi tausaga, e fai atu ua fai \$100 ma \$100 miliona. A o le mea lea ua i ai le galuega, e le i i ai i totonu i i auala, o mea lena e fai mulimuli. O lea na saunoa atu le Minisita o Tupe ananafi, e le o i ai i i auala ma isi mea. E faapena le faiga o le mea pe afai e fai e tatou, e faasolosologa sue. Ma le isi mea e le tasi le Tausaga Faaletupe e fai ai mea nei, e lua, tolu Tausaga Faaletupe, e aumai lava la na o tupe e lavea i totonu o le Tausaga Faaletupe e fai ai. O lona uiga, afai e faatoa uma le mea lea ia Iulai o le tausaga fou, o lona uiga o isi tupe e fai ia Iulai o le tausaga fou, faatoa aumai i le Tala o le Tupe o le tausaga fou.

Lau Afioga i le Fofoga Fetalai, e faapena ona faasolosologa sue ia le faatinoga o tatou galuega.

SUI FOFOGA FETALAI: Faafetai i le saunoaga manino a lau Afioga i le Taitai o le Maota, e manatu o lea ua manino auofala, manino le faamalamalamaga. Ou te manatu la e le o toe i a se mea o toe gugulu i totonu o le Maota. E ao fai ona ou vave faailoa atu tatou faiga faavae e faapena fai tatou Tulafono Tumau le paia e o le Maota ma sui usufono mamalu. o le tali a le Malo i se mataupu o le tali mulimuli lena, e le tau tulia ina ia faamalieina se finagalo o se sui usufono mamalu.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua

Afai e le malie i le faamalamalaga, e mafai ona faaui mai e ala i le Laulau a Fono i fesili ma tali tuufofoga po o fesili foi tusitusia, e toe faamanino atili ai le matapu ua fia fesiligia. E lelei ona ou toe faamanatu atu tatou Tulafono Tumau, ae o le a tuu atu pea le avanoa i le sui usufono mamalu, o lou avanoa mulimuli foi lea.

Tofa Olo Fiti Afoa Vaai: Faafetai, o lena ua maua tonu mai lava e lau Afioga le Tulafono o felafolafoaiga lea ou te tulai atu ai, ou te le o fesiligia po o le a se tali e faamalieina ai au.

Ae lau Afioga i le Fofoga Fetalai, e mafua lava ona tele a matou fesili o le le i faamaninoa mai. Ana manino mai i le amataga i le saunoaga a le Minisita mo Tupe Maua ma Falepuipui, o le latou guesstimate, e \$20miliona ma fua le tauofoga o galuega uma lava i le \$20miliona, e leai ma se isi e fesili. A o le mea lea matou te tilotilo atu i ai i le auauai mai faapea, ia mo mea o extra mates mea na. Ae ana manino mai lava i le amata mai e leai ma se isi o matou o fesili; ma le isi mea lau Afioga i le Fofoga Fetalai, e matou te ioe uma ia fau lelei se falepuipui mo tupu ma ee o Samoa, e leai ma se isi e tetee i ai. Ana manino mai mea ia, ia o le tulaga lena o lou tulai atu ai lau Afioga i le Fofoga Fetalai.

SUI FOFOGA FETALAI: Faafetai mo le saunoaga. Malie lau Afioga i le Minisita se i tuu atu le avanoa lona lua lea i le sui sufono mamalu mo Anoamaa Sisifo.

Tofa Hon Lauofo Fonotoe Nuafesili Pierre Lauofo: Faafetai i lau Afioga i le Fofoga Fetalai, e leai o le mea tonu lea na mafua ai ona avatu se fesili i le Minisita mo Falepuipui. A o lea ua saunoa le tootoo lea, o le a le guesstimate. Ia se i saunoa mai, o le a le guesstimate o le tatou galuega?

SUI FOFOGA FETALAI: Faafetai, o ouluia foi o sui usufono matutua o le Maota, ae o le a tuu atu le avanoa i lau Afioga i le Minisita e toe faamananino ma toe faaauau le saunoaga.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai. Ou te talitonu ua tele ina faamanino atu e le Afioga i le Palemia le tulaga o le galuega lenei. O le tau fuafuaina lava e \$20miliona pe a talafeagai. A o le taimi lenei o le a ou see ese loa ma le galuega lenei.

E momoli atu le faafetai ia i latou o lo o fai atua polokalame i uta i le falepuipui pei o Ekalesia taitasi o lo o latou fai a latou polokalame i lea vaiaso ma lea vaiaso latou ia o lo o fesoasoani malosi atu, aemaise foi o Faalapotopotoga Tumaoti o lo o gasolosolo atu e fai aoaoga mo pagota i uta.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

E momoli atu le agaga faafetai ia i latou ia o lo o mafai ona faataunuina polokalame nei, aemaise foi o Ekalesia o lo o auai atu i lea Aso Sa ma lea Aso Sa e faia lotu i le falepuipui, o le Ekalesia Metotisi, Katoliko, ma le EFKS. E autovaa atu i Aso Sa taitasi e faasolosolo e faia lotu mo le falepuipui. E tele se fesoasoani a i latou nei. O nisi o Ekalesia o lo o faia a latou aoaoga conmputers i o i Oloamanu, o nisi foi sa aoaoina ai i le taimi sa nofosala i Oloamanu ua toe foi atu ma fai aoaoga ia, o lo o maua ai le avanoa e toe foi atu ai i uta e galue mo i latou o lo o taumafaia foi ia ituaiga taleni. O le tele o galuega o lo o feagai ma le falepuipui, o lena ua uma ona faamalamalama atu i lau Afioa.

Atonu o lenei taimi, e momoli atu le faafetai i lau Afioa i le Fofoga Fetalai aemaise foi le Afioa i le Palemia, Sui Palemia ma le paia o le Kapaneta aemaise sui usufono o le Palemena aemaise foi le Failautusi ma le aufaigaluega a le Fono Aoao, aemase foi Faauluuluga o Matagaluega ma Faalapotopotoga Tumaoti o lo o tatou faatasi i lenei aso, aemaise foi CEOs o lau Matagaluega ma le Komesina ma le aufaigaluega atoa a le Matagaluega o lo o ou vaia mo a latou galuega o lo o feagai ai. Faafetai foi i si ou itumalo o le Vaa o Fonoti mo le tapuaiga aemaise foi faafeagaiga taulagi o lo o latou nonomanu aua se manuia o le matou itumalo aemaise foi le sui usufono o lo o tauavea le tofi o le matou itumalo, aemaise foi o le sui usufono o lo o tauavea le tofi o le itumalo, faafetai tatalo faafetai foi i la outou tapuaiga. E lagona lava le mafanafana i la outou tatalo ma la outou tapuaiga i Afioa i faafeagaiga aemaise le paia o lou itumalo. Faafetai i lau Afioa i le Fofoga Fetalai.

SUI FOFOGA FETALAI: Ua faamalo saunoa i lau Afioa i le Minisita o Tupe Maua. Ua taliga e fialogo lenei taeao ua manino foi le mata o le vai i tulaga uma pei ona fesiligia e sui usufono mamalu. o le mea lea, ia faamanuia le Atua i galuega uma o lenei tausaga.

O lo o faagaso loa pea tali a le Malo, ou te tapa lau Afioa i le Minisita mo Faatoaga ma Faigafaiva.

Tofa Hon LOPAOO NATANIELU MUA (Minisita mo Faatoaga ma Faigafaiva): Lau Afioa i le Fofoga Fetalai, ou te manatu o lea ua uma ona sasa le aveo ma tapui le tapu a Tupo aua so tatou sao ia Manuvao i lenei taeao fou. Talosia ia togia pa tau i le ave, ia ogatasi le futia ma le umele i o tatou faamoemoe ma o tatou moomooga ma le finagalo o le tatou Atua. O le fetalaiga i le Vaifagaloa, a ou tu i Fao ou te manatua malata, a o le tapu o le faatamasoaliiga, afai e sosoli faufau, e ao lava ona sosoli ma le faaeteete ina ne i meaane ua leua lau o le fo ona le soo lea o taiao ma avea lea ma sese o le tamaloa mai Asau.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Lau Afioga i le Fofoga Fetalai, ona e talu ai ona o au e fou foi i lenei itu o le Maota, e fia fai atu ai se faamatalaga. Ou te fia faatalofa atu aloaia lava i totonu o le Maota nei i lau Afioga i le Fofoga Fetalai faapea foi lau Afioga i le Taitai o le Maota lau Afioga i le Palemia, lau Afioga i le Sui Palemia ma sui usufono mamalu o le Kabeneta, Minisita Lagolago faapea lena itu o le Maota.

E avea foi lenei avanoa ou te fia faafeiloai atu ai i le Susuga i le Failautusi o le Fono sa matou galalue. E faafeiloai atu foi i Faaululuga o Matagaluega uma lava a le Malo faapea foi Faalapotopotoga Tumaoti a le tatou Malo alii ma tamaitai. Talofa lava.

E avea foi lenei avanoa e fia faafeiloai atu ai ma faatalofa atu i Lana Afioga Mamalu, O Le Ao o le Malo ma lana Masiofo, le saofaiga o sui mamalu o le Sui o le Fono a Sui Tofia, e faatalofa foi i lau Afioga i le Faamasinosili ma le mamalu o le Faamasinoga, ae tainane foi le tapuaiga a lo tatou atunu, o Tama ma Aiga, o Aiga ma Tama, Tumua ma Pule, Aiga i le Tai ma le Vaa o Fonoti.

E faatalofa atu foi i Faauluuluga o Ekalesia ma le Aufaigaluega paia a le Atua o lo o faafalelemalu i so o se afioaga o lo tatou atunu, aua le asusuina o le Ava o le Talalelei. E avea foi lenei avanoa ou te faatalofa ma faafeleloai atu ai le tapuaiga foi a o tatou uso i le Motu i Sasae, Sua ma le Vaifanua, Fofo ma Aitulagi, Faatuiolemotu ma upu ia te oe le Manuatele.

Ae fia faaaoga foi lenei avanoa ou te fia faafeiloai atu ai ma faafetai atu i lou itumalo, le afio o Tapaau ma le Gafa ma le afio o le Aloalii ia Vaai, le mamalu ia Safune ma Taulauniu, Lealiifano ma Tapu ma le Toalima, ma le mamalu ia Safune. E faapena foi ona faafeiloai ma faatalofa atu isi ou nuu o Asau, i le paia i Aiga, le susu mai Tufuga ma le aiga sa Tufuga. Afio mai lau afioga i le Matua ma le aiga sa Masoe, Salafaifaiga i le Faaituagalua, Falefia ma le Siuolefanua.

Ou te fia faafeiloai atu foi i vaega eseese o lo matou itumalo i le vasega oo saoao, le vasega o aualuma, faletua ma tausi, le malosi o le nuu seia oo lava i fanau, malo tapuai, malo foi le tatalo, o lo o outou tui mai le mulipapaga ma tapuaia faiva o lo outou sui usufono.

A o le i see ese ma tali atu i mataupu sa faapea ona laga e sui usufono mamalu o le Maota nei, e fia faaleo se agaga faafetai i lo matou itumalo i lau Afioga i le Palemia, ona ua e sii le itumalo o Vaisigano Nu.1 i le maasalafa e ala i le tofiga, o lau pule lea, faafetai.

E avatu foi se faafetai i lena itu o le Maota, pei ona tatou galulue mai ai i le amataga o le Paeaiga lenei seja oo mai i le aso 31 o Aokuso 2017. E faapitoaugafa se faamatalaga i lau Afioga i le Taitafono o le Komiti o Galuega Tetele o le Malo, lau Afioga i le Tuiatua Faanofonofo lau Afioga. Tafua faapea foi le matou Komiti sa matou galulue faatasi, faafetai tele i la outou faamalosiau ma a outou fautuaga. Ia sagai ane ai o le tai ma le alofa o le Atua ia faapea ona aualiiitia o outou finagalo, aua le faaaauauina o tiute e pei ona totofí i ai a outou Afioga.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E faatalofa atu foi i lau Matagaluega i le afioga i le alii pule ma le mamalu o le aufaigaluega, malo le soifua, malo le lagi e mama, malo le faatoatoa. Ae o le a ou agai atu loa e tali atu i mataupu e pei ona folasia e sui usufono mamalu o le Maota. E le tele ni mataupu e na o le valu, a o lea o le a taumafai e aofai faatasi atu i se faamatalaga e tasi. O lena foi tou te silafia, o au foi ou te fou, e fai mea fou lava foi i isi taimi ae tatau lava ona ogatasi ma faiga faavae a le Maota nei, ne i te i ua tulsi se Minisita e le Afioga i le Fofoga Fetralai.

Ou te fia faafetai i le aufaifaatoaga ma le autautai a lo tatou atunu, o i latou nei o lo o fitaituga ma le feagai ma le fatuaiga tauis e le gata i lea o le latou sao i le atinaeina o le tatou Malo. Malo lava le galulue, malo le faatoatoa, malo lava le onosai, e le faigofie. E avatu foi sau faafetai i le vasega o pisinisi tumaoti o lo o latou fesoasoani i a tatou faatoaga e ala lea i le latou avea o tatou oloa i fafo e pei o le Faalapotopotoga o le Taros Exporters, o i latou o lo o gaosia oloa e faaaoga ai fua o tatou faatoaga ma faatau atu, e le gata i totonu o lo tatou atunu a o atunu mamaao, ou te faatalofa atu ia te outou, malo i la outou fesoasoani.

Ou te toe fia faamanatu lava le saunoaga e masani ona saunoa i ai se tasi o tama o le itumalo lenei, o ia foi sa tu i Matagiolo i tofi maualuluga o le tatou Maota nei ma le Malo le Afioga Vaai Kolone. Aua e masani ona faapea, o tupe la e i lalo o laau, o tupe la e tanumia i vao o le togavao, o tupe la e i lalo o niu, lalo o koko, e moni. I le amata mai o lou tofiga i le aso 31 o Aokuso seiia oo mai i le taimi lenei, sa ou asiiasi solo lava ou te fia vaai i atumauga na ou tofu i le alititai i Manono, sa ou asiiasi ma ou vaavaai pe faapei mai taumafaiga faafaitoaga. O le mea moni e pei ona saunoa foi le sui usufono mo Anoamaa Sasae ananafi, o le e galue ma loimata, e selesele ma le fiafia. A ou vaai i le tele o atinae ma faatoaga o lo o faatinoina e lo tatou atunu, ona ou lagona lea le moni o le faaupuga lenei. Aua e te tigaina e te maosiosia, e te laina, e te lava, leaga e le faigofie. A o le tamaoaiga o lo tatou atunu, o lo o i aao o le aufaifaatoaga, o lo o i aao o tatou nuu ma afioaga i tua. E toeitiiti lava leai se laau e le ola i totonu o le laufanua o Samoa e le aoga. O le tele o suesuega na faatinoina e le SROS ua amata nei ona faagaso le tele o ni oloa e mafai ona gaosia mai i fua o tatou faatoaga. O le naunautaiga o au nei ma le Matagaluega, ina ia toe faafoi le Matagaluega o Faatoaga i le ivitu o le tamaoaiga o Samoa. Ou te amata mai e i lalo ifo o le 7% le sao o faatoaga ma faigafaiva i le tamaoaiga o lo tatou atunu. Ou te manatu o se fuainumera e aupito i sili lea ona laitiiti. Ae a fuafua i mea e mafai ona fai e lo tatou atunu, ona lagona ai lea o le maasiasi.

Ou te le tu atu e fai atu ni folafolaga ia te outou le mamalu e o le aufaifaatoaga ma le aufaifaiva, ae ou te tu atu e tatou te galulue faatasi, o le tatou galuega e fautele, o le tatou galuega e fau faatasi. E pei ona ou fai atu i se taimi ua mavae, o le e galue ma loimata e selesele ma le fiafia.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ona oo mai lea o sau faamatalaga i le mataupu muamua o le talo e pei ona saunoa i ai le Afioga i le sui usufono mo Falealili Sasa. O le polokalame sa faatino e 1000 tiapula i le masina mo le 12 masina, o le polokalame lava lea i le va o le Minisita ma le Komiti Faufautua, ona o le tele o feau ma tuite o le Matagaluega, a o si a matou tamai menti lava lea e tatou te galulue faatasi ai faatasi ai ma le lagolagosua a le Afioga i le Minisita o le Matagaluega o Tina ma Tamaitai, Atinae o Nuu, Afioaga ma Agafesootai, e ala atu i sui o nuu. O le manatu sa i ai ma le manatu e faavae ai, a fua i le tau o le talo lea e ave i Niu Sila i le taimi nei, e 1000 tiapula, \$1,000. A o le mafuaaga foi e ala ai ona ou fuaina i le 1000 tiapula i le masina, o lea e matou te uunaia ia aiga ausage e tasi, lua tagata, aua o i latou lea e faatinoina ia faatoaga tetele o la etuu atu lava latou ia e fai ma faaaauau a latou galuega o lo o fai, a o latou ia e tafafaovale solo i totonusi Apia ma nuu i tua e leai ni feau e faia, o lea na manaomia ai le fesoasoani a le Matagaluega o Tina ma Tamaitai, Atinae o Nuu, Afioaga ma Agafesootai e faapena foi a outou Afioga e pei ona avatu le tusi talosaga i a tou Afioga e fesoasoani mai. Aisea le mea e ala ai ona 1000 tiapula? O le mafuaaga a 1000 tiapula e \$1,000, pe a fua i le tau o le pusatalo lea e i ai i le taimi lenei. Afai foi la e le faataua, ia e fiu e taumafa.

Aselaona avatu se manatu e 1000, leaga e i ai le isi toeaina e 76 tausagololo matou aulotu lea lea e i gauta i ua malolo manumalo mai le galuega, emafai ona ia totoina le 1,500+ ma ona tupu tiapula i le masina, ae uma onalafo ma toto. O lona uiga la a faapea o le autupulaga laiti malolosi la e i ai efuafua i le 76 lea le matua o tausaga, oi, ou te ofo pe a le mafai. O le ala lenae ala ai lau Afioga i sui usufono mamalu o le ala lena o manatu mafaufauga na sa faavae i ai le faamoemoe lea, ma ou te fiafia e faailoa atu ilau Afioga i le Fofoga Fatalai ma le mammalu o le Maota, o le tele o afioaga samatou asiasi i ai ua mafai ona matou vaiai e ese lava le 1000 tiapula na fai ia Oketopa. Novema faapena foi ma Tesema i le taimi sa tele ai a matou asiasiga, e faafetai tele atu. Ae i ai foi nuu ma alaalfaga e leai se mea o faia. E pei lava ona fai atu le tala, o le fua e te lulu, o le fua foi lena e te selesele, ole o se mea e lulu e le Minisita ma le Matagaluega, olau lava fua na lulu, olau foi lena e selesele. E faamalulu atu i lau Afioga i le Fofoga Fatalai, leaga o le upu lea na faasa e le Fofoga Fatalai i le Aso Gafua, ia ae leai se isi upu emafai ona faamatala aim ea ia.

Ona tatou oo mai lea i le mataupu lea i le faaausina o tatou oloa e ave i fafo e pei ona saunoa ai se tasi o sui usufono mamalu. O le mea moni lava, ua uma ona avatu le faasalauga a le Matagaluega a faapea e i ai ni au oloa e ave i fafo, fai mai e 24 itula ua avatu i le Matagaluega aemaise lava pe a faapea e ave i le vaalele. Ae le mafai ona e alu atu ma lau ietoga e ave i le malae vaalele toe itula e alu a o lea e te manao e faaasu, o le ala lena ua uma ona fai aiaiga ma faavae o le Matagaluega, e 24 itula e momoli atu ai i Matautu ona faaasu lea aua o la e i ai le masini, na o le oomi lava tapuni le faitotoia ia oomi, ona tuu lea mo sina vaitaimi.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ae afai lava e te alu atu faapena i le malae vaalele, ona i ai lea o se tulaga foi lele e fai, o le alolofa i nai o tatou tagata, ia ona fai lea i ai, o e aumai se mortein se i fai ai la le mea lea leaga o lea ua outou solitulafono. O le ala la lena o le i ai tulaga faapea e tutupu mai. Atonu la o lea foi ua fautuaina le Matagaluega, ona e i ai lava taimi e oso ai mea faapena, ona avatu lea o nai a outou spray mortein e tuu i le malae vaalele, a i ai nisi e o atu faapena, ia ona faaaoga ane lea i ai ae charge i ai. O le tagata lava la e faifaiaga ma le usitai, a faapea o le mortein e \$10 ia ave i ai le tau e \$20 e latou te totogi maia ma le tuuaia o le tatou Matagaluega, o le mea lena o lea o le a fai.

Lau Afoga i le Fofoga Fetralai na taua le manu ainiu e nisi o sui usufono. Emoni ma faamaoni o le tasi lenei o faafitauli ua tulai mai, ma o lo o galulue foi le Matagaluega i le vaifofo e i ai vailaau o lo o faapea ona oka mai e faatino ai le faamoemoe lea, e i ai foi tupe i totonus o le Paketi le Tala Autu o le Tupe e faatino ai le faamoemoe lea, ae tatou te galulue faatasi.

Lau Afioga i le Fofoga Fetralai e moomia le lagolagosua a le tatou Maota nei faapea foi le Matagaluega o Tina ma Tamaitai, ina ia faaauau pea le faamoeomo lea sa fai e aoao mai e nuu i tua manu ainu ona aumai lea i le Matagaluega, a faapea e aumai ae le avatua sa outou tupe, ia faatalitali mai, o lo o i ai lava le auala, o lo o i ai lava Mose ma le Auperofeta e mafai ona fesoasoani atu i se taimi, ae pau lava le mea ia aumai i le Matagaluega aua le avea i se isi mea, aumai lava i le Matagaluega ina ne i te i ua avatu foi toe o foi se isi toe ave lava manu ainu na toe omai foi toe tusi, ae manaia le ave i le Matagaluega ona taatia ai lea ma faamaumau le afioaga ma le aofaiga o manu ainu, e pei o le polokalame lea na saunoa i ai le Afioga i le Tuiatua Faanofonofo.

Ona oo mai lea i le Nonu, e lua kamupani ia latou te auina i fafo nonu o lo o i ai. O kamupani tetele ia latou te aveina le nonu i fafo ave i le Liquid Form, o se tasi o kamupani lea ua leva ona auauna ia Samoa o lo o i Vaivaseuta, e faapea foi ma le kamupani a nai alii Saina lea e i Vaitele, ua uma foi ona asiasi i ai o le tulaga e pei ona aliali mai, o le tasi o kamupani nei e eka latou te lisiina ae ua matua tumu atoa i tane, o tane e tai 10,000lita, seiloga lava la ua avanoa tane ma uma ona aveese le faamafu ona faatoa avanoa lea ona faatoa avanoa lea ona toe aoina mai lea o nisi nonu. O lo o taumafai foi le latou Kapeneta e fesoasoani e faapea ona avatu isi nei kamupani ina ia faateleina ai ma faaleleia ai le faamoemoe o le nonu.

Lau Afoga i le sui usufono mo Safata, o lo o i ai foi le isi kamupani fou lea ua sau nei, o le kamupani lena e latou te avea le nonu frozen, e le i amataina le latou taumafaiga, ae faamoemoe i se taimi o le masina fou, ae ua lelei o le a faapea ona logoina foi lenei kamupani ina ia fesootai ma lau Afoga ma la outou afioaga, o lena e maua nonu ona e fai sina tele o le nonu ia te outou.

Sa taua foi e le Afoga i le sui usufono o Salega Sisifo ia povi faafeusuai. O le taimi lenei o le aofaiga o povi lea e i totonusi o le Matagaluega i le taimi lenei e 307 le aofaiga o manu fafine ma poa, tulou. 174 aumatua.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O lo o i ai le faamoeomeo o le fuainumera lena o lo o faapea ona minoi lava i taimi uma ona e tele foi manupapalagi ua momoli atu i tua ia i latou ua totogi a latou manu ma ave. O le taimi foi lenei ua tau tuai le matou production ae tele le manao, ae talu ai na o le 30 a tatou aumatua na aumai i lalo o le polokalame o le SACEP ae 13 poa. A fuafua la i lea fuainumera, e fai lava sinia umi o fai le feusuaiga lea sa fai ina ia maua ai ni manu e maua ai le toto fou lea e avatu i tua i o tatou afioaga ma i latou o lo o faapea fai lafumanu. O mamoe 278 mamoe la e i ai, e 178 mamoe fafine, o lo o faapena foi, o manu ua talafeagai ona ave i tua i lo tatou atunu, e faapena lava ona fai, ae o lo o fai foi i se faiga ina ia fuafua lelei, e le mafai ona fanau mai nei ae ave taeao, e leai, e faapena foi ia manupapalagi e tuli lava se i atoa le 200kilo le mamafa, ia ona agavaa lea o le manupapalagi e ave i tua.

O le fai. Na taunu mai i le Aso Gafua nei le 20,000 fai mai Amerika i Saute o le ituiga lea o le apolo, o le gafa lava o le cavendish lea e tau o le fai isaraelu. O le fai lea e pupuu o le manaia ia e faigofie ia ona teu ma look after, ua tele faatoaga tetele ua i ai nei, o lea e faamoemoe i ai le tatou export o le fai, atonu ua le o toe mamao ia se taimi ona matale mai lea o le faitotoa ua fai sina umi ua tolu tausaga o taumafai mai le Matagaluega, ou te fai atu ua vaaaia ataata o taulelei i lea faamoemoe o lea ua avatu nei le tatou Export Plan po o le tatou polokalame o le tuuina atu o le fai i Niu Sila mo le pasia mai i Niu Sila, a maea loa ia ona faapena loa lea ona ave le tatou fai i Niu Sila. O le agaga la ma le faamoemoe, ia uunaia le tatou fai e fesoasoani ai i le tatou tamaoaiga ma le tatou foreign exchange. O le ala foi lea lau Afioga i le Fofoga Fetalai na ou aisi ai i le Afioga i le Minisita o Tupe ma le Tamaitai Kovana o le Central Bank, faamolemole aumai se tou \$80,000 se i aumai se isi 20,000 fai, o lea toeitiiti lava tatala mai se faitotoa e le i tali mai lava, aua e aupito sili foi ona sikuea latou aua o le fai e ave i fafo e maua le foreign exchange, o le mea lena na ala ai ona ou talosaga i ai i le Matagaluega lea ma le Faauluuluga o le Faletupe Tutotonu. O le faamoemoe e manaomia se isi 60,000 fai e aumai ina ia mafai ona faasoa i tua i lo tatou atunu. O le taimi nei e mafai ona ave le container e tasi i le masina i le taimi nei pe a oo atu ia Iulai, Aokuso, ua mafai ona tuu atu i luga i le tolu faaopoopo ai ma isi fai ia e 20,000 lea na aumai nei, ia ua faapena ona oo i luga, e le iloa pe oo atu i le faaiuga o le tausaga pe a faapea e o faatasi le futia ma le umele o se faamoemoe ma le taumafaiga, e le iloa pe oo i le sefulu container o fai, ae faamoemoe foi lava ia i latou o lo o avea a tatou fua o tatou faatoaga i fafo i le faagaoioia ma le faia o metotia e moomia, aua le faamoemoe o le fai.

O le talo o lo o lelei le alu o le talo i le taimi lenei i le frozen taro e faapena foi ma le tatou fresh, e ui lava ina e le o mafai ona ave se tatou fresh taro i Ausetalia i le taimi nei, e na o Niu Sila ma Amerika lea e aveina ai, ae le i tatalaina mai Tutuila o lo o i ai lava nai faafitauli i lena vaega.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E taua e se tasi o sui usufono mamalu le mataupu lea i fuamoia, ia o le mataupu tonu lava lena e gafa ma le Afioga i le Minisita mo Pisinisi ma Alamanuia, e faapena foi i le Afioga i le Minisita mo le Soifua Maloloina. E i ai lau tuualalo, talu ai o le taimi nei o lo o i ai se falemoa i totonu o Samoa, o lo o maua mai ai le 60 le 70,000 fuamoia i le aso, e fai foi sina tele o le investment a se tasi lenei o sui o le atunuua ua atoa le \$17miliona. O Frankie lea ua amata ona fausia lana falemoa i Tanumalala, se i tilotilo foi i se tulaga faapena. O lona uiga a faapea e toe sui mai le use by date mai le 30 i le 60 aso, ua faaletonu le investment o nai nei tamalii ma nai nei uso faipisinisi i totonu o le tatou atunuua. O le agaga lea e avatu ai se tuualalo ma faaoloolomaau atu ai i lau Afioga i le sui usufono mamalu na laga lea mataupu, tatou onosai toeitiiti lava, tatou tagi lava tatou i o tatou lava lima e mafai ona tatou produce ina le aofaiga o fuamoia e tatou te taumafaina i le aso e tasi, pe a faapea la e fai e Frankie i le 70,000 fuamoia ma le 70,000 lea e maua mai ia Farmer Joe, o lona uiga e tilotilo i le 140,000 i le aso, I think o le tatou maketi e 200,000 fuamoia i le aso. Atonu lava o lo o faaaauau pea le development o le Private Sector, o lo o faamalosia foi nisi o tatou tagata o lo o faapea ona i a i i totonu o le pisinisi lea, ina ia toaga pea e fai ma developma faateleina tatou moa e maua ai fuanoa, o isi foi polokalame la ua amata ona oo atu i le faiga o le moa e le toe mafai ona import mai ai se moa pefesoasoani foi i ai i le aumaia o moa mai fao.

Ona faaiu atu ai lea ma sau faamatalaga, faafetai tele lava i le TV2 a le EFKS lea na ou vaai i ai i lenei vaiaso o sau ai le polokalame faalauihoa o faatoaga, faafetai tele lava foi i lo outou fesoasoani mai foi i le galuega a le Matagaluega i le faalauihoa atu o le polokalame i le mamalu o le aufaifaatoaga ma le atunu. Maimau e pe ana faapea e oo la outou TV i tua i Savaii aemaise le matou nuu i Asau ma le matou itumalo e faapena foi Aopo ma le Alataua ma Falealupo e le oo atu i ai le tatou TV lea. E talosaga i lau Afioga i le Minisita e faaoo atu lea TV. E faapea foi le FM lea e sau lava i taeao uma le polokalame a le Quarantine, o lea ou te lagona e i ai nisi o tatou e le i vaavaai i ai, ae o le a toe tilotilo foi le Matagaluega i nisi o tulaga e mafai ona faalauihoa tele ai ia polokalame ia ina ia silafia ma lausilafia e lo tatou atunu, ina ia aua ne i toe sese ona tomumu ai foi laia lea, pe a sau ua le talafeagai le faamoemoega i le taimi e taunu mai ai i le Matagaluega ma mea e tutupu.

Lau Afioaga i le Fofoga Fetalai, e na ona ou toe faapai atu, faafetai tele lava mo lou avanoa e faapea foi ona ou faapai atu i lo matou itumalo o Vaisigano Nu.1, le afio o Tapau ma le Gafa ma le Aloalii, Safune ma Taulauniu, Tapu ma Lealii fano ma le Toalima ma Safune, faapea foi le paia i Aiga ma Salafai i Asau, malo lava i la outou tatalo, faafetai foi i le Aufaigaluega i fatafaitaulaga e fia o lo o i totonu o lo matou itumalo Auala, Vaisala ma Asau, faamalo atu i la outou galuega fai, e manaomia foi la outou fesoasoani i le Malo, o lena foi ua outou faafogfa mai e tele o mea o lo o talanoaina e aafia ai la outou pitolaua, e matou te moomia la outou fesoasoani, e moomia e le Malo outou, e faapena foi ona outou moomia mai le Malo.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Faamanua le Atua i lau Afioga i le Fofoga Fetatalai, faamanua le Atua i le Afioga i le Palemia ma le mamalu o le Kapaneta ma Minisita Lagolago ma le mamalu o lena itu o le Maota, e faapena foi Faauluuluga o Matagaluega, le Failautusi o le Fono ma le tatou Ofisa o le Fono mo galuega e fesoasoani mo le Maota nei. Manuia lo tatou aso.

SUI FOFOGA FETALAI: Faamalo faafetai, malo saunoa i lau Afioga i le Minisita mo Faatoaga, Vaomatua ma Faigafaiva. Ua se ligoligo lenei taeao, aemaise lava i le faafogofa a le aufaifaatoaga, o lea ua e fofola le fala ua e toliulu foi i fuata o amitonu, e a lo latou tautua aua o le ivitu lea, o le tamaoiga o le atunu, ia faafetai tele, malo tapena, ia faamanuia le Atua i lau Afioga i le Minisita ma le Matagaluega i galuega fai o lenei tausaga.

O lo o faagasolo pea tali a le Malo, ou te tapa ma le faaaloalo lau Afioga i le Minisita mo Galuega, Felauaiga ma Atinae Eseese a le Malo e te saunoa e talifuaitau i mataupu na laga e sui usufono mamalu.

Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eseese): Faafetai tele atu i lau Afioga i le Fofoga Fetralai mo le avanoa. E fia ppiama atu foi lenei sui usufono i le taulaga sa molia e lau Afioga i le taeao nei, faafetai ai pea le agalelei ma le alofa o lo tatou Matai sili ua mafai ai ona tatou aulia mai lenei aso fono i so outou soifua laulelei ma so matou ola.

Ae muamua lava ona ou fia faatulou atu i le pau o le Maota o lo o sasao nei, le afio o lau Afioga i le Fofoga Fetalai, Afioga i le Palemia, Afioga i le Tamaitai Sui Palemia, Afioga i Minisita o le Kabeneta ma Afioga i Minisita Lagolago mamalu o lena itu o le malu, le afifio o Afioga i sui usufono mamalu o le Palemene.

E fia faatalofa atu foi i le susuga i le Failautusi o le Fono ma le loaloa o le auaigaluega, e faapena foi ona faatalofa atu ma faatulou atu i le paia ma le mamalu o Faauluuluga o Matagaluega ma Faalapotopotoga a lo tatou Malo.

E fia faapai atu foi i le tapuaiga a Samoa, ma i ona Ao seiā paia ona Iu. E le gata i lea, ou te fia faapai atu foi i le Aufaigaluega Paia a le Atua, i nuu ma afioaga i fatafaitaulaga e fia, o lo o nonomanu auā se manuia o Samoa aemaise o le tatou Fonousu.

Ou te fia faatalofa atu foi i lou itumalo, o le Nofoa Tu Taulaga Sasae, malo le soifua manuia, manuia le tausaga fou.

Lau Afioga i le Fofoga Fetatalai, o saunoaga uma a sui usufono mamalu e tele lava i mataupu i auala galue, aemaise foi vaega o itu eseese o le tatou atunuua aafia a latou o main roads. Ia e le gata i lea o le suavai taumafa ma le malosi faaeletise. E le o po se lilo i lenei itu, i lenei vaitaimi o le louloua o le tau, ma o le fili matautia lava lea o le tatou auala o le suavai, ma o le tatalo i a outou Afioga sui usufono mamalu o le Palemene, ia tatou onosai ma lavapapale, ona e maitauina lava le tele o itu o le tatou atunuua ua aafia auala.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ona o le tulaga o le louloua o le tau, ma o lo o taumafai le Matagaluega a le LTA, e faatonu ia konekarate a maua loa se masele, ua tatau ona toe tapena ia aemaise lava ia potholes, ia ae taatia mai ia la outou faatuatuaga.

O nisi o auala po o main roads sa laga mai, saunoaga a sui usufono mamalu o le auala lea i le itu i Sasae, o le East Coast Road, ua faamaonia le tulaga o lea auala ona sa alu ai ia le matou asiasiga. O le tulaga atoao le auala lea ua tatau ona toe reseal, o le tele ia o le tupe lea e alu i le maintenance, a o le tulaga la e i ai, ua need lava ona toe laga i luga le auala ae toe faataina. Peitai, o tupe e alu i le repairs ma le maintenance, ae uma le tausaga, e tasi pe lua ua toe faaleaga foi. Ia a o le tatalo i Afioga i sui usufono o lo o aafia i lea auala, ia onosai, o lea o le a tapena se galuega e saili ai ni fesoasoani mai fafo ni grants, ma ni tatou development partners e mafai ona faatino ai lea galuega, leaga e fai sina taugata.

Ia aemaise foi ia le auala lea e agai atu i Aleisa, ia ona agai atu lea i le malae vaalele, tasi foi lea o auala ua tatau ona faalelei atoa. Ma e o le tulaga o le faatuaituai lava o le leai o ni tupe e faatino ai ia galuega tetele.

Ia ma le auala la lea sa laga mai e se sui usufono mai Leulumoega se i agai atu i Lefaga, e matauina soo, tele ia o le taimi e avatu ai le konekarate o repairs and maintenance e taumafai e faalelei foi ia auala e agai atu i Lefaga ma Safata ma Falealili. O auala uma ia o le a tapena i ai le Malo, lea e saili ia ni grants, e fesoasoani ai ona e le gafatia e tatou tupe maua masani le faatinoina o nei galuega tetele.

O talosaga uma mo auala galue mo Salafai ma Tumua nei, o lea ua ou faamauina, o le taimi nei lau Afioga i le Fofoga Fetalai, o lo o faagasolo ia ni galuega faalelei o ni auala galue fou, e ono i Salafai, ono i Tumua nei, ma o le masina o le masina o Mati e maea ai ona faatino uma nei galuega, ia ona toe tapena foi lea o le matagaluega, po o le Pulega o le LTA, e faasolo nisi galuega o lo o taatia i le taimi nei. Masalo lena e molimaufina e a outou Afioga ia auala ia e faatino sa talosaga mai ai a outou Afioga, lea ua fai atu ai se galuega faa-Samaria agalelei a le Matagaluega a le LTA.

A o auala ia ua toe laga mai i le tatou fono lenei, ia o lea foi ua toe faamau, ae e pei ona ou tatalo atu, tatou onosai ma lavapapale mai o lea lava e faasolo galuega, ona o le lava o a tatou tupe e pei o le tulaga lava lena o lea e tau aafia ai le faagasologa o le faatinoina o galuega o auala galue aemaise ia tatou main roads. E pei o le tulaga lea i le aotelega o saunoaga e agai lava i auala galue, ae i ai nai saunoaga lea na afea o le sui usufono mai Safata Sisifo, sa fesiligia le tulaga lea tulaga lea i le afioaga lea i Nuusuatia e le i oo i ai ia le malosi faaeletise, ma e moni lea saunoaga ona sa fesiligia le EPC, o aiga lea i luma mai ua uma ona fai ia latou talosaga, e pei o le process lena e faailoa atu i lau Afioga, e aumai le talosaga a aiga na e le i oo i ai le eletise, ia ona o atu lea o le EPC e fai le survey. O le tulaga foi lena sa talosagaina e aiga ia e i luma mai, i aiga ia e i tua atu lea na e fesiligia.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O le Afioaga i le sui usufono mo Salega Sisifo i le tulaga o le latou suavai taumafa, ia o la ua faagasolo le galuega, aua e te popole aua na ou maitauina i lau saunoaga, ou te popole te i ua oo atu i ai ae le i faaumaina. O la ua aumai le faamatalaga a le Pulega o le Suavai, se i maea lau galuega, ona faatoa me i foi lea i se isi afioaga o fia moomia le suavai.

O le afioaga mai Vaisigano Nu.2, le Afioga i le suisufono, na e talosagaina se avanoa e toe tuu ai i tua le talosaga o taavale nei o pikiau ma loli, ae tau ina faamalulu atu i lau Afioga, ua uma ona pasia le Tulafono, ma o le popolega lava i taavale tuai nei e aafia ai ia le tatou siosiomaga. E tele ia le mea o carbon emission e discharge mai i taavale tuai ia, lea na e saunoa mai ai, ma o le faigata foi lena e tatala atu se avanoa e toe ulufale mai ai taavale tuai ia i totonu o le atunu.

O le mataupu lea sa laga i le...

SUI FOFOGA FETALAI: Malie lau Afioga i le Minisita o lo o saunoa, se i tuu atu le avanoa lea i le sui usufono mamalu mai Vaisigano Nu.2, saunoa lau Afioga i le sui usufono.

Afioga Tapulesatele Mauteni Tamasoni Metuli II Esera (Vaisigano Nu.2): Faafetai atu i le Afioga i le Fofoga Fetralai, faafetai atu i le faamalamalamaina i le tulaga lea i le Afioga i le Minisita, e pei ona i ai ia le faatalosaga atu. O lea ua oo tonu le saunoaga a le Minisita, i le tulaga lea sa oo i ai se faamatalaga ananafi.

I le talitonuga lava ia, e le o se popolega lea, e aafia tele ai ia le tulaga lea e taumafai atu ai. O lea foi e silafia lava, a fuafua ia le tulaga lea i Samoa nei, e faatususa i atunu la, e maualalo lava ia le tulaga ausia. O le talitonuga lava, e tele atu ia le faamanuiaina o tatou, ai i le tulaga lea i le faaaogaina o ia taavale, tau atinaeina o tatou faatoaga, faigafaiva foi ia ma le tau atinaeina o le tatou tamaoaiga, e pei o le tulaga lena.

E i ai lava le talitonuga o le vaega lava la o le LTA, ia po o le pasia o a tatou taavale, e pei foi ona maitau atu, o lea ua toe ave le avanoa, e faaaaoga ai taavale ia o taxis, e pei o lea sa oo le tautalaga ananfi i le tulaga lena. I te i ua i ai se popolega, ae molimau atu, e leai e le o se afaina foi lea e ono popole i ai Samoa pe a fuafua atu i atunu i fafo.

E tumau lava le telosaga lau Afioaga, ua na o ni manatu lava i le itu lea, ia ma lou faaalao lava.

FOFOGA FETALAI: Malie lau Afoga i le Minisita, se i tuu atu le avanoa i le sui usufono mamalu mai Falealili Sisifo ona saunoa lea o lau Afoga i le Minisita e lelei lena e fajogofie.

Tofa Aumua Isaia Lameko (Falealili Sisifo): Faafetai mo le avanoa, e le faalavelavea le saunoaga matagofie a le Minisita, atonu o le mea lea sa ou talosaga ai o le auala lea, o le auala galue lea i Saleilua e agai i le faleaoga i Saleilua, e tu i uta le faleaoga.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – felafolafoaiga i luga o le faitauga faalua

E talosaga atu ai ona o lea ua tauaofai uma mai i auala galue, e talosaga atu ma le agaga maualalo po o le a se fesoasoami, e ae i le vaiaso lea aoga, ae o le taimi lenei ua le mafai ona feoai tagata i le leaga o le auala. O lau vaai i ai e tusa ma le 800 mita ia le,,, mai le aualatele a le Malo e tu ai le faleaoga lea i Saleilua faamolemole lau Afioga i le Minisita, faafetai.

FOFOGA FETALAI: Saunoa lau Afioga i le Minisita mo Galuega.

Afioga Hon PAPALIITELE NIKO LEE HANG: Ia e faafetai foi i le afioga i le sui mamalu na faalavelave mai i lau folasaga, ia ae taua foi le toe laga laga mai o tou finagalo pe afai e le faamalieina i sau faamatalaga.

O le tulaga lea sa toe laga mai e le sui usufono mamalu, i taavale, o le naunautaiga lava lena a le Malo, o taavale ia e 2000 agai tua ia tausaga, o taavale ia e tatau ona mafaufau le mamalu o le atunu, ona o le tulaga o mea tau spare parts, ia ma taugata foi ona toe maintain. A o le taavale lea e aumai e fou lava, e valu tausaga le matua, ia o taavale lena e fautuaina i aiga ia e i fafo, aumai taavale faapena fesoasoani ai e atinae ai ia faatoaga aemaise ia fesoasoani i aiga aua ni tupe maua e fesoasoani ai i taulaga i ekalesia aemaise foi o afioaga ma aiga.

A o lo o faagasolo e i ai ia tapenaga e ave i le Kapaneta, a faapea o lou finagalo lea, ia o le a ave pea i le Kapaneta le pepa e toe pasia ai le ave i tua o le tausaga, ae a aumai lava le faaiuga e leai, ia faamalie atu. O le tulaga lena, o le tapenaga ia e faatino o le puipuiga o le siosiomaga, ia ma fia aumai po o a ni a tatou taavale lelei i luga o aualatetele, ae taofia ia taavale tuai aua e le umi lava ia tausaga, ia ona tu tu lea i le fale, e faatiga fofoga ma tele ai le lapisi. O le tulaga lena, ae taatia mai lou talosaga se i toe iloilo e le Kapaneta, ona e i ai foi le talosaga lea mai le aufai taxi, faafetai.

SUI FOFOGA FETALAI: Faafetai, manatu o lena ua manino le tali a le Minisita, ua ou vaelupe le saunoaga a lau Afioga i le Minisita, talu ai o lea ua tatou taunu mai i le tatou malologa masani i le ti o le taeao, o le mea, e faasilasila atu ai ma le agaga faaaloalo, o le a fai le tatou malologa mo le 15 minute.

Na faataatiaeise Taualumaga a le Fono Aoao mo lana malologa masani i le itula e 10:42 i le taeao ma toe faaauau ai i le itula e 11:26 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2017/2018.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

SUI FOFOGA FETALAI: E manatu o lea ua sao i alo le tautega, i le malu o le taeao, le paia o le Palemene i lau Afioga i le Palemia, le paia o le Kapaneta, ia ma sui usufono mamalu uma o le Maota, ua maua foi se faasiliga malosi, ia e faaauau ai foi ia le tatou galuega i lenei taeao.

E faataatiaese le galuega a le Maota o saunoa le Afioga i le Minisita o Galuega, Felauaiga ma Atinae Eseese, ma e ou te tapa lau Afioga i le Minisita, e faaauau lau saunoaga.

Afioga Hon PAPALIITELE NIKO LEE HANG: Faafetai i lau Afioga i le Fofoga o le Fono mo le avanoa e faaaauai ia lau folasaga. E fai le malologa o lo o tau faauma le tali i le Afioga i le sui usufono mai Vaisigano Nu.2, o le tulaga o le taavale lenei ona o lea e le i afio mai le Afioga i le sui usufono e le i leva nei na toe sui le Tulafono, sa sefululua tausaga, ae lea ua toe tuu mai i lalo i le valu tausaga. E pei la o le faigata o le talosaga lona uiga ua mamao tele i tua ia le mea lea e finagalo i ai, ae taatia mai o lea o le a toe ave se pepa i le Kabeneta e fai i ai se faaiuga i lau mataupu. Ia aemaise foi le talosaga lea na aumai e le sui usufono mo Salega Sasae i laisene taxi, o la ua maua le talosaga a le aufai taavale, ae lea se i toe filotilo i ai ia le LTA ma toe ave i le Kabeneta mo se fautuaga e talia ai talosaga nei. O le talosaga foi e agai i tua i taavale tuai.

Ona oo mai lea i le talosaga ma le faauilavea mai le Afioga i le sui usufono mo Falealili, masalo ai o galo i le Afioga i le sui usufono o Talosaga ua uma ona aofia i lau folasaga, o auala galue uma lava e aofia ai Poutasi, o Saleilua, o faleaoga, o lea e faamau uma lava, taatia mai se i fai atu i ai le galuega faasolo. Ia ma le mataupu sa laga mai e le sui usufono mo Faasaleleaga Nu.1 Sisifo i le tulaga lea o le totogi o taavale ia na fai bookings a ua le taunuul le faigamalaga. Mo le silafia e lau Afioga ma le paia o le Palemene, e le o se tau faaopoopo o le mea pei se penalty charge, o le faasalaga, e le o se tau faaopoopo la e aofia uma ai ni... Ae na pau le tulaga ua faatino ai lea tulaga, ona o le tele ia o taavale ua confirm bookings ae le faataunuua a latou faigamalaga ona misi ai lea o le avanoa o le isi tagata lea e fia malaga i Savaii. A o le isi tulaga lea e te saunoa i ai faapea o se tau faaopoopo ou te faamalamalama atu e faapea, o le penalty charge. O lea foi la na ou talanoa i le kamupani vaa, se i vaai le tau pei ua fai ea sina mauluga. Ae taumafai ona tuutuu mai lalo o lea foi e totogi le pasese o le taavale i le vaa, a o lena foi ua toe faaopoopo atu i ai ma lena avega mamafa ae toe fuafua le tau o le tulaga lea.

Ia, ona ou oo mai lea i le mataupu sa laga mai e le sui usufono mammalu mo Palauli le Falefa, sa saunoa ma taua ai le faitau miliona o tupe mai totonus tatou Development Banks, pei o le World Bank, ADB, le EU, ma nisi o atunuu e pei o Niu Sila, Ausetalia, Iapani ma le Malo o Saina. Ua faapea mai le saunoaga, ua le faaaaogaina e le tatou Malo pe ua tuai foi ona faatino tatou galuega sa fuafuaina e faaaaoga ai tupe faameaalofa ia.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Lau Afioga i le Fofoga Fetralai ma le paia o le Palemene, sa ou manatu lava o le sui usufono mamalu ua fai sina leva o avea ma Minisita o le Kabeneta, ae foliga mai e le o malamalama atoatoa i le faagasologa o tapenaga o galuega tetele a le tatou Malo e pei o auala. E na ona toe faamanatu atu i lau Afioga. O delays ia sa taua e lau Afioga....

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai pe i ai se avanoa....

SUI FOFOGA FETALAI: O le a tuu atu le avanoa. Malie lau Afoga i le Minisita, se i tuu atu le avanoa i le sui usufono mamalu mo Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga mo le avanoa, e faamalie atu foi i le Afioga i le Minisita mo le saunoaga lea ou te le o fai atu o tupe ua le aoga. E leai, o le concern lea ou te iloa foi o le concern lea a lau Afioga ma le mamalu o le Kapaneta, a tuai ona faatino galuega, e faasolo ina taugata. O lea ua manaia lava le saunoaga foi a le Afioga i le Palemia i lenei taeao lenei, ia fai ia vave. O le mea lena e manaia ai foi le saunoaga a le Minisita o Tupe, o lea ua talia se matou tuualalo ia fai se central BMU ia mafai ai ona perform le overall supervision o project taitasi a o le tupe ia lea e i ina, e lima tausaga e le i faaaogaina tupe na aumai e fai ai le auala lea. E lima tausaga talu ona aumai le tupe e fai ai Vaisigano. E le o faapea la e le o aoga. O la e aoga, a ua faasolo ina taugata galuega ona o le tuai ona faatino. O le concern lena Papalii, e le o se faasea, a o le faamanatu, tuualalo. O lea la e pei ona avatu ai le fautuaga, silasila i ai. O le mea foi lena lea na tau avatu ai se leo i tatou tupe o lo o totoe pea, aua o lea ua faasolosolo i le \$300 miliona tupe accumulated mai tausaga e tolu ua tea. Ma lou faaaloalo lava.

SUI FOFOGA FETALAI: Saunoa lau Afoga i le Minisita.

Susuga Hon PAPALIITELE NIKO LEE HANG: Faafetai lava i lau Afioga i le sui usufono mamalu mo le faauilavea. O delays ia na taua e le sui usufono mamalu, its beyond our control ona o tatou tapenaga o mea nei o galuega ia e aumai grants mai tatou paaga, development partners, e i ai le process e i ai foi la delays e le mafai ona tatou soalaupuleina delays nei leaga e mafua mai lava i conditions o mea nei o fesoasoani mo funds. O le mea e toe fia faamanatu i le Afioga i le sui usufono mamalu, o le design o le mea muamua lava lena e tapena ai galuega faapenei, ma o designs foi la e tapena mai e ni kamupani mai fafo o lo o tautuaina mai e tatou development partners. A aumai la le design e iloilo e le Malo e i ai ni fesuiaiga ina ia talafeagai ma le tatou foi itulagi, ona toe ave lea o le designs e toe veried, ia e alu foi le taimi o tau faatali mea nei.

Ona oo mai lea i leí .

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

Afioga Hon Faumuina Tiatia Faaolatane Liuga: Lau Afioga i le Fofoga Fetalai pe i ai se avanoa, ou te manatu o lea o le a see ese le Afioga i le Minisita....

SUI FOFOGA FETALAI: Malie lau Afioga i le Minisita, se i toe tuu atu tasi lava le avanoa lea i le sui usufono mamalu masalo e i ai se isi mataupu o fia saunoa i ai. Le sui usufono mo Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai faafetai mo le avanoa. Faafetai foi i le Afioga i le Minisita mo le faamalamalamaina o le vaega lea.

Sa ou tulituliloaina le Vice President o le World Bank ina ua uma ona faamatuu mai tupe ia e fai ai galuega ia e lua i le faaiuga o le 2013. O le tali a le tamaloa na fai mai ia au, o lea ua leva ona aumai le request ia tatou e prepare atu ia terms of reference. O le tagata e tusia ata ia. O le taimi muamua lava lea. Ae fesili atu i le Matagaluega o Tupe ma le Pulega o le LTA, ma le Ministry of Works, fai mai e le faia e latou e fai e le BMU. A fai atu i ai pe fai e latou ae fai mai e le iloa po o fea le mea o i ai le BMU. Ia o fea ni mea ua faapenei? O i e mafua ai le tuai. Ma lou faaaloalo lava lau Afioga i le Minisita, se i tagai lava i ina i grants ia e fall in ai mea nei, ae le o le design le mea na ala ai ona delay, na delay o le leai o se term of reference e aumai i ai se tagata e faia tonu lava mea ia e te saunoa i ai. Ma lou faaaloalo lava.

SUI FOFOGA FETALAI: Tulai mai lau Afioga i le Minisita o Galuega.

Susuga Hon PAPALIITELE NIKO LEE HANG: Lau Afioga i le Fofoga Fetalai, ia, se i faaaauau atu pea lau folasaga, ua tau galo mafaufauga ona o le faauilavea soo mai a le sui usufono mamalu, o lea sa ou talanoa i delays, o lea foi sa saunoa soo mai le Afioga i le sui usufono mamalu i terms of reference. E maitau atu foi ua lima tausaga o taatia lenei galuega, ae sa saofai i i i le taimi lea a o tapena lenei galuega, o le a la le mea na le tulitulia ai la, aua o lea na saunoa mai na talanoa i le Peresetene o le World Bank. O le taimi la lena sa tatau ai ona address. O lea foi na saunoa na aumai lana solution, ae ou te le iloa pe o toe applicable lena solution i le taimi nei.

Afioga Hon Faumuina Tiatia Faaolatane Liuga: Ou te tulai atu lau Afioga i le Fofoga Fetalai mo se avanoa.

SUI FOFOGA FETALAI: Lau Afioga i le sui usufono mamalu, manatua foi le tatou Tulafono Tumau e i ai lou avanoa e 15 minute pe a oo ina auiliili le mataupu lea. Ae tuu atu pea le avanoa mulimuli lea i lau Afioga i le sui usufono mo Palauli le Falefa.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Afioga Hon Faumuina Tiatia Faaolatane Liuga: Lau Afioga i le Fofoga Fetralai o le amataga lea o le aumaiga o tipe. O le aoga lea o au o le aumaiga o tipe. Ae ana ou i inei i le taimi lenei, ua uma mea ia, ua leai ma se mea o totoe. Ma lou faaaloalo.

Susuga Hon PAPALIITELE NIKO LEE HANG: Lau Afioga i le Fofoga Fetalai, e faamalulu atu ona o lea ua e le toe saofai i i, ia se i faaaauau pea le matou galuega e tapena ai le matou galuega, ae onosai ma lavapapale mai.

O le tulaga lea o le process lea ou te tautala atu ai ina ia malamalama le Palemene i le tulaga o le delay pei ona ou fai atu o le delay its beyond our control, leaga e i ai fuafuaga a le tatou development partner mo conditions e tatau ona faamalieina uma lava faatoa maua mai le tupe. Ia, ona oo loa lea i le tulaga foi lea a pasia loa ua final le design ona vaai loa lea o le tau. O le tau la lea e maua ai e tele lava le counterpart a le Malo i le mea lea e moomia e le world bank e faalautele ai le auala i le tolu mita, ae sue atu e le vaega lea na faia le suesuega, na o le lua mita le mea e mafai ona afford e tatou. Ia o le isi foi la delay lena, toe fai le survey, sa tatau ona faamalieina ma ato atu ai le tatou tali atu i le tatou development partner. O le taimi nei o lea ua faagasolo tender, o lea ua fai tauofoga mo le auala lea le tatou west coast. A maea loa la le tulaga o tauofoga, pei lava e tapunia i se aso o le masina fou.

A o le tulaga lea sa taua ina ne i faaseseina le faafofoga mai a le tatou atunuu faapea ua miliona ma miliona tupe lea o lo o taatitia e le o faaaogaina, e sao le Afioga i le sui usufono mamalu, a o tupe ia o lea e atagia mai le Tala o le Tupe i tausaga uma tausaga uma e le o faaaogaina ona o lea ua commit le Malo i galuega ia se i faatino le galuega ona to mai loa lea o tupe ia, ae le faapea o taatia i se fale foi lele e te i lava ua leai se tupe, o la e taatia i tupe a le Malo. Ma e toe faamanatu atu i lau Afioga lea tulaga. O tupe ia e te saunoa mai ai, e sao o la e faitau miliona ae i ai le commitment a le Malo i tupe ia, o la e faaagaaga mo galuega, e pei ona ou fai atu e le puupuu se taimi e tapena ai o lena e te silafia lelei i le taimi sa e Minisita ai o Galuega. A o lau tuualalo i lau Afioga i le sui usufono mamalu, aua le tau le pua ma e lafo mai, ae fesili lava oe ia te oe pe na faapefea ona faatino au galuega a o e Minisita.

Ia, lau Afioga ua maea i i lau faamatalaga, ae ia faamanuia le Atua i lau Afioga aemaise foi le sui usufono ma le Palemene, ia tatou fiafia i lenei aso.

SUI FOFOGA FETALAI: Le sui usufono mamalu mo Palauli le Falefa, e manatu o lea ua manino lava le faamaninoga o le saunoaga a le Minisita i le tulaga e pei ona atugalu ai le sui usufono mamalu, ae o le a tuu atu le avanoa lea ua uma ona ou fai atu o le avanoa mulimuli, ae saunoa lau Afioga i le sui usufono mamalu.

Afioga Hon Faumuina Tiatia Faaolatane Liuga: Lau Afioga o le a ou usitaia lau faatonuga, ae o pua, e lafo atu i ina, e le lafo maia i inei. E lafo atu i ina, tusa lava pe tou te malelemo ai tulou le gagana.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

SUI FOFOGA FETALAI: Saunoa le sui usufono mamalu mai Safata i Sisifo.

Afioga Leaana Ronnie Posini (Safata Sisifo): Lau Afioga i le Fofoga Fetralai, faafetai tele i lau Afioga. E leai o lea ua tau manau atu o lea ua tau faaiuiu le saunoaga a le Minisita, sa leai foi se manatu e toe faalavelave i le saunoaga malamalama a lau Afioga. Na pau lava lea o le mataupu sa ou laga lau Afioga, o le alavai foi lea i le lotoa foi lea a taupousa i Savalalo, aua o le alavai lea e alu atu tau i le sami. O lea foi e le i atoa le tausaga a ua toe laga i luga le alavai lea. O lea foi na ou taua sa ou tu ai ma ou vaavaai ai, e pei e foliga mai e le o foia le faafitauli lea i le alavai lea. Na ona toe tasui ai o ogapaipa tetele ia, a o lau maitau, o le isi foi tausaga ua toe eli foi i luga le alavai lea. O le uiga o se manatu ona o le faasaoina o tatou tupe e pei foi ona taua i tatou auala i tua ma tulaga faapena, ae faasaoina ai tatou seleni i le tulaga o alavai ia. Ma lou faaalolo.

Susuga Hon PAPALIITELE NIKO LEE HANG: Faafetai atu lava mo le faauilavea. Lau Afioga i le Fofoga Fetalai, o lea ua tuu mai lalo iaí ona e le i maua mai se faaaliga mai le Pulega i le tulaga o le alavai, ae i ai lou vaivaiga e faailoa atu pea i le Afioga i le sui usufono mamalu. O le tulaga o le alavai lea, e lua phases na faatino ai, o le phase 2 la lea e faatino i le taimi lenei. O le tulaga lava lea e ala ai ona mafua le tulaga lea, ona o le isi level e pei e maualalo pe a sua mai le tai, ae se i toe tapena se tulaga e fai se faiga e taofi ai le sau i totonu o le sami, ina ia mafai ona aua ne i ovaova i luga tatou alavai. O le isi mea e maitauina, e tatau pea ona fai le repairs and maintenance o mea nei o alavai aemaise mea o pupu foi nei e siaki ai ma fai se galuega e toe faamama ae se i toe saili i le LTA po o i lalo o le faiga o konekarate ni maintenance pe a uma le tausaga e tasi. Ae taatia mail au mataupu, e taua.

Ia se i faauma atu pea, o lea la ua saunoa le Afioga i le sui usufono mamalu e lafo mai le pua ae lafo mai le pua ae tuu nisi pua ma oe. Ma lou faaaloalo lava. Faafetai.

SUI FOFOGA FETALAI: Faafetai tele i lau Afioga i le Minisita o Galuega, Felauaiga ma Atinae Eseese. E manatu o lea ua manino lava auofala, ua leai se mea o toe gase, ia ua malamalama foi o atugaluga o sui usufono mamalu e tusa ona tuu atu ai finagalo mo mea pei ona manaomia e itumalo. Malo tapena malo foi le onosai, faamanuia le Atua i lau Afioga faapea foi le mamalu o le Matagaluega.

Ia faasolo pea Tali a le Malo i tatou galuega o lenei aso, ou te tapa ma le faaaloalo lau Afioga i le Minisita mo Tagata Tafafao Maimoa Mai Fafo e talifuaitau i mataupu sa laga e sui usufono mamalu.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Afioga Hon SALA FATA PINATI (Minisita mo Tagata Tafafao Maimoa Mai Fafo): Faafetai i lau Afioga mo le avanoa. E i ai le pese foi lele, ataata mai pe a e fiafia. E momoli atu le agaga fafafetai i lau Afioga i le sui usufono mo Palauli le Falefa e faapea foi le Minisita, se o uiga lava ia o le soifuaga tatou te sua lava i le vaatele, o tamalii lava e faapena, e tatou te fetaliai lava ia a o tatou lava o le uso, malo faafetai.

E faafeiloai atu i le Afioga i le Fofoga o le Fetatalai, e faatalofa atu foi i le Palemia, Sui Palemia ma le Kapaneta, ia faapea Minisita Lagolago, i lena itu o le malu, afifio i outou Afioga i sui usufono o le Maota Fono o Samoa, faapea foi le Aufaigaluega Paia o sasao nei. Ou te manatua le tausaga ua mavae, sa faapea ona tausinio ai le Motu tele o Amerika i le suega o le latou taitai. O le mau la na faapea ai ona tulai mai ia le tamaloa lea o Trump i le tofi lea ua i ai nei, sa faapea lana lafoga, *I will make America great again*

O le mau la o lea ou te tulai atu ai, e avea ai au ma sui o Turisi foremost, uppermost, we will make Samoa beautiful, we will make Samoa clean, and we will make Samoa number one. O le mau lea ou te nofo nei ma au, o le lagona lea o lo o i ai le Afioga i le Palemia ma le tatou Faigamalo.

O le galuega lea e le faapea e tuu mai e na o le aufaigaluega a le Turisi, masalo o le galuega lea na aumai ta te tauosa faatasi. Le paia e o Samoa o lo o sasao nei, sui usufono filifilia a itumalo taitasi, o le tofi lea o le tofi o tatou. O le tofi lea, e nofo lava le sui usufono ma faapea ifo, o faapefea mai lou itumalo? O i ai se galuega o ou faia i lou itumalo o faalaulelei ai ia le laufanua ma le faamatagofieina o faletimalo ma maota ma laoa? O le a se mea ua tatou faia mo le tatou atunu?

Aua o le mea lea na ala ona tofi tatou, ona ua i ai le filifiliga ma le talitonuga a itumalo taitasi, o oe o le a e avea le fua, o le tatou lea matafaioi, tatou tutu ma o tatou faapea, o au o le Samoa, ou te faia mea silisili mo ou tagata. Ou te tatalo atu ai i le paia e o Samoa o lo o sasao nei, a o le atunuu o lo o faapea ona faafogafoga mai ma tapuai, ia tautuana, e mimita lava le Samoa i lona laufanua. E avea lava le matagofie o Samoa i le filemu, faafetai i le Atua e ese le matagofie o Samoa, o le a fai atu se tala ne i outou faapea ua ou toe nofo lava ma vivii au, ae leaga o le upu lava o le upu sao ma o se mea ua tupu ma e econo tupu foi i outou afioaga ma alaalafaga.

I le nuu lea o Leauvaa, ia o lo o faapea ona tele se vaegatupe sa faapea ona taumafai i ai ia lenei aiga foi Suafa ma Tulafale. Ia e le faigofie, ae ina ua avatu ia le talosaga a le Malo, ia tautuana ma outou, ia faamatagofie mai i le malae vaalele se i tau mai i Apia nei, o lea na ae ai loa se tofa foi, o le a tatou faia ia se galuega lelei aua Samoa. Ia ou te le aoaia e au nei le paia i lena itu aemaisae foi ia le Maota nei, ae na ona ou valuvalusia ni outou finagalo, aumai la outou lagolago i le Matagaluega nei. E le mafai e Papalii ma le aufaigaluega ona tauave, ae o le mama o le avega, ia tatou pulupululima faatasi.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E lua ni manatu sa faapea ona afea i lou nei Matagaluega, Falealili ma Saleaula. O auala galue po o le auala e agai i matafaga ma fale mataaga, e le toe na ma le laina i le paia i a outou Afioga, o le tele o afioaga e totogi ia tupe, e totogi tupe e ui ai le taavale i le mea o lo o i ai ia le... E le o se galuega lea a le Faalapotopotoga o Tagata Tafafao Maimoa mai Fafo o le fai auala, o le Matagaluega lena a le Minisita mo Galuega, Felauaiga ma Atinae Eseese, ae leaga e le o se galuega e faapea e tau lava na o le Minisita ma le vaega, leai, o le galuega e faatino aua Samoa mo le lumana'i manuia o Samoa.

Falealili ma Saleaula, ou te faamalulu atu, afai foi ua le tau ia se lafoga foi i lenei taeao e tusa ai ma la outou talosaga ua aumai i auala, ia lafo mai, e leai a se mea e tuua. Se ou te fai atu o mea na e iloa ai o tatou ta te galalue aua Samoa ma lona lumanaia.

SUI FOFOGA FETALAI: Malie le Minisita, se i tuu atu le avanoa i le sui usufono mamalu mai Falealili Sisifo.

Tofa Aumua Isaia Lameko: Ou te le fia faalavelave i le lauga matagofie a le Minisita i lenei taeao, ua uma ona fai lau saililiga i le Matagaluega mo Galuega Tetele, ia o le tala mai e le o se matafaioi lea a le Matagaluega o Galuega, o matafaioi ia e i lalo o le Faalapotopotoga o Tagata Tafafao Maimoa mai Fafo, o le ala lea o le tatalo atu.

O auala ia e lua na ou talosagaina i le Vaiula ma alu i tai ia Turtle, e le totogiina e le aoina e le matou nuu lea o Tafatafa se tupe o se taavale, o lo o tatala lava o le auala o le Malo. Ia o le tulaga lena e tatalo atu ai i lau Afoga i le Minisita, po o le a sau fesoasoani, na o le tanuina lava faamolemole.

Afioga Hon SALA FATA PINATI: Faafetai, o aga masani ia o le Aso Toonai ona faaola lea o le taavale a le Malo, a o le taavale e le o se taavale a au nei, ou te fai foi ma le faaeteete e fou le taavale, ae a tele foi ina ou faaaoga ona faapea lea o le atunuu, ana leai lava le taavale a le Malo e le manua e le la tamaloa ia se taavale e fealuai ai.

O le upu moni, o le a ou alu atu i le Aso Toonai, a tunu mai se moa mo au ia ona ta fetaui ai lea i tua, ta talanoa ai laia ma fai po o le a se tulaga o le a oo i ai. Aua o mea faapea, se ta te fia fesoasoani i le e moomia le fesoasoani, malo le onosai, malo le taumafai.

Lau Afioga ou te fia oo i lou itumalo, faafetai i le tapuaiga, lou itumalo e pele ia te au....

SUI FOFOGA FETALAI: Malie lau Afioga o la e faafoga tapuai mai lou itumalo, se i tuu atu le avanoa lea e tasi i le sui usufono mamalu mai Falealili i Sasae.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Afioga Fuimaono Teo Samuelu Teo (Falealili Sasae): Faafetai i lau Afioga i le Fofoga Fetalai, e tasi lava si vaega lea lau Afioga i le Minisita e le faalavelavea, ona o lea o le a alu atu le asiasiga, o auala nei ua leva ona ou ttau i le tausaga ua tea, o lea ua uma ona faasino mai e le Afioga i le Minisita o lalo o lau vaavaaiga. I le Turisi lea i Salani, e alu le auala agai i lalo ua fai lava si faaletonu, ia faatasi ai ma le falemataaga foi o lo o i tala atu o le ituvasi lea i o.

A alu atu lau asiasiga e le tuupoloaiina lau Afoga, ona faaauau atu lea i Falealili i Sasae pe a alu atu lau asiasiga, ia ma lou faaaloalo lava. E lua moa.

Afioga Hon SALA FATA PINATI: Faafetai, se o lea e sao lava, e ta te fia Falealili fua, ia fai mai e oe se size two ae fai mai e le la toeaina se moa aua e lua itumalo. Ia ou te momoli atu le faafetai, faafetai i lou itumalo le lagolago, o le a ou le oo lava i outou paia, Satuala, leaga o oe o le Faalagilagi, ia faapena ona alofagia e le Atua ia vaelua tutusa ia so tatou manuia, faafetai, soifua ma ia manuia.

SUI FOFOGA FETALAI: Malo le saunoa i lau Afoga i le Minisita mo Faalapotopotoga o Tagata Tafafao Maimoa mai Fafo, se o upu lava masani e pau mai lava le talo matua ia e toa ai le moa, o saunoaga faatoeaina i lenei taeao, ia e momoli le faamalo ma le faafetai. Malo mo le galuega ua matagofie Samoa, o le mea lea ia faamanua le Atua i lau Afoga ma le Matagaluega mo lenei tausaga ma galuega fai, faafetai.

Ou te tapa lau Afioga i le Minisita mo Soifua Maloloina mo lau saunoaga e talifuitau ai foi i mataupu na laga e sui usufono mamalu.

Afioga Hon TUITAMA TALALELEI TUITAMA (Minisita mo le Soifua Maloloina): Faafetai i lau Afioga i le Fofoga Fatalai mo le avanoa. Ia ou te le toe ta i tua ia se leo pe toe faalo le afaloloa, ia aua le paia i le afio o lau Afioga i le Fofoga Fatalai, ma sui usufono mamalu o le Palemene, o lupe na fajia maji j le fuijui.

E talitonu o lea ua taoto i lagotonu, ua taoto foi i paga ia le tautiaga, aua ia paia ma sa ma faiga, ae o le a sagatonu ia so matou leo, ia ma agi faasulu ia le siu amouli, ia e molimoli ia sina faamatalaga ia aua ia mataupu sa laga e sui usufono mamalu aua le Tala Faatatau o le Tupe Faaopoopo Muamua e pei ona tatou talanoaina.

E tusa ai ma le luasefulu ia sui usufono sa saunoa i le Tala o le Tupe, e 13 i latou sa afea le Matagaluega mo le Soifua Maloloina, ia e le fou foi ia lea tulaga na e talu ai ona e lagona pea e lenei fonotaga ia le faatauaina o le soifua maloloina o le tatou atunu. Ma o le matafaioi foi lea e fai faatasii foi lea a outou Afioga ia faapea le aufaigaluega o lo o tautuaina le atunu e ala i auauanaga faasoifua maloloina.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O le mea lea e lagona ai le agaga faafetai ma le lagona faagaeitia, ona o le faatauaina e Afoga i sui usufono mamalu o lenei Maota o le soifua maloloina o Samoa. Ma e taliga foi e fialogo ia le faalogologo atu i le tele o sui usufono sa saunoa faafetai mai, i se auaunaga mo lenei lava Matagaluega, ia e seasea ona maua foi ia tulaga faapea. E talu ai ona o le taimi o puapuaga ma mafatiaga o le tino, e sulufai atu a le faaletonu le tali mai a le Matagaluega, ia e faapea foi ona oo ifo lagona o le 1 fiafia, ma le faitio e tusa ai ma faatinoga o le auaunaga.

Ia a o lenei taeao ma le faalogologo atu foi i saunoaga a sui usufono mamalu, e lagona lava le agaga fiafia ona e toatele i latou sa faafetai mai ona o nisi auauanga ua faamalieina ai ia le latou silasila ma le matau, ia e tuna ma le faatinoina o le auauanga.

E tele ni sui usufono sa saunoa i le tulaga o falemai faatumalo, ma e o le tulaga lea i falemai o le itumalo e le fou. O le taimi nei, ua tele isi talosaga ua uma ona faatoai mai ma o lo o taooto ai nei i le Matagaluega ma o lo o faia ai nei le faasoaga o galuega faatino o le tatou Matagaluega ina ia ogatusa ia le futia ma le umele, fuafuaga o le Matagaluega ia ma le faatinoina o ia foi nofoaga e faatino ai le auauanaga i lea itumalo ma lea itumalo.

O nisi la o talosaga ua leva ona faatoai mai, e pei o le tulaga i Falelatai, ia faapea foi ia Lefaga ma Faleaseela, ia talosaga mai foi i Fagaloa, ia lea foi ua faatoai mai i le fono talu ai, ia le talosaga a Manono tai, e fai se latou falemai i Manonotai. E tele lava itumalo o lo o mananao uma ia fai falemai i o latou itumalo. Peitai ane o le faasoa o le seleni faatasi ai ma le fuafuaga i se tulaga aupito lelei, e faatino ai le auaunaga ina ia faasopolia le atunu atoa, o lea e fua i ai le faasologa o le faatinoina o ia galuega. Ae o se tala e fia faasoa mo i tatou le mamalu o le Palemene i lenei Fonotaga, ua maea la matou feiloaiga ma le Faletupe o le Lalolagi, o lea ua ofoina mai la latou fesoasoani, o le a fesoasoani mai i le faaleleia o falemai ia e i tua. E talu ai ona o le latou talitonuga, o le auala lea e mafai ai ona faaitiitia le aafiaga ogaga o lo o feagai nei ma i tatou lo tatou atunu, o le tulaga lea i faamai le pipisi, lea e i ai le suka, totomaualuga, cancer, mai fatu, ma le tulaga o gasegase faapena.

O lea la e lagona le agaga fiafia, ma ou te faamafanafana atu ai ia i latou na talosaga mai. O lea polokalame e le o toe mamao ona faatino lea. O le a galulue faatasi Matagaluega ma le Faletupe o le Lalolagi i le tulaga lea o fea e ave i ai le faamuamua. E faapena foi ona soalaupule ma le Matagaluega. Ona faapea foi lea ona faasolosolo atu mo le faaleleia o galuega. O le agaga lava maualuga lea e i ai, ia matua toe faafoi ia le galuega i nuu i tua, ina ia taofia ai le gasolo mai o le tele o gasegase i lo tatou falemai tele i Motootua faapea foi Tuasivi. Aua e i ai lou talitonuga, o le tele o ia gasegase a vave ona togafititia i nuu i tua ma itumalo, o le a faaitititia foi le faagasologa i se tulaga ogaoga ma le matuia, e faigata ai ona togafititia. Ma le manaomia ai ni togafitiga maoae, ma ni togafitiga faapitoa pe a oo i se tulaga ogaoga, ia faagasologa o ia gasegase.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O le talitonuga lea o lo o i ai le lalolagi atoa, e le na o i tatou foi, o lea e aafia i le tulaga lea o faamai ia ogaoga e aafia ai totoga po o non communicable diseases. O lo o faapea uma lava i totonu o le Pasefika ma le lalolagi atoa. O le agaga maualuga lea e i ai, ma le agaga faalototeleina ai le Matagaluega, o lea o le a tuutuu mai le tauau o le World Bank po o le Faletupe o le Lalolagi e galulue faatasi ma le tatou Matagaluega, o le a mafai ai ona silasila totoa i o tatou falemai ia e i tua. O fea le falemai ua tatau ona faamuamua, ave i ai le faamuamua, fea ni falemai ina ia siitia le auaunaga ina ia 24 itula, o fea ni falemai ua alagatatau ona nofo mau ai se fomai, ma tapena foi tapenaga e talafeagai, mo le i ai o auaunaga i tua, alii ma tamaitai fomai e faatino ai lea faamoemoe.

O le falemai lea sa i le matou itumalo i Aana i Leulumoega, o lea sa talosagaina le toe faafouina ma tulaga faapena. Ou te faamalamalama atu i lou uso a sui usufono mai lo matou itumalo i Aana. O le falemai e tulaga tutusa ma le falemai lea sa fai e le fesoasoani a Iapani, ua le o toe i ai nei, ua leaga ua tuua ona ua le toe saogalemu mo le vaaiga o gasegase, o le falemai la lea i Sataua. O lea la ua sifi ai i uta i le nofoaga mao uta, ma o la ua i ai le falemai fou la e i ai nei i Sataua. O le tulaga foi lea i Leulumoega, o lea sa silasila i ai, ina ua ofo mai le fesoasoani a Amerika, ona tuu loa lea i ai o le 10eka la e i o i Faleolo, ma le faamoemoe ai o se falemai tele lava, ina ia sui atu i ai le auaunaga. Aua o le nofoaga lea ei Leulumoega ua fai sina vaiti, ua tau le atoatoa foi ona mafai ona toe siitia i se tulaga e gafatia ai vaega uma etatau ona faatino mo le auaunaga i lea tulaga. E tele lava ni mafuaaga na ala ai ona filifilia Faleolo, e lata i le feoaiga o tagata mai fafo, e mafai ona taofia ai gasegase pisi e pei o lea na tulai mai lona aoga, ina ua sau le gasegase lea na sau mai Ausetalia, le gasegase o le Ebola, e manatua le faamai oti lea sa pepesi i Aferika, na ona taunu mai lava ave loka ai i ina e lei toe fealuai mai i se isi lava mea, ma toe faafoi atu ai lava ma toe alu i fafo.

O le tulaga taua lea o le nofoaga lea, ma e le na o le pau foi lea o le faamoemoe. Ae taulalata atu foi i itu ia e i ai le itu i Sisifo i Falelatai, Lefaga faapea foi ma Manono ma Apolima e agai mai i ai. Atonu mo se agai i le lumanai, o le a faatupulaia ia le falemai lea ma faaleleia atili, ina ia gafatia auaunaga e le o mafai ona maua i le taimi nei. Ao le tulaga i le falemai i Leulumoega, e fougata i le taimi nei, ona e toe fai i ai se isi fuafuaga mo le toe faaleleia ona o lea e tuvalalata ma le falemai fou lea. Ae pei e toe laitiiti ma vaapiapi le tulaga o lo o i ai le tatou falemai lea i Leulumoega, ae o le a faaauauai ai pea le auaunaga e le o suia mo le taimi nei. A o le silasila lea ma vaai lea mo le lumanai a lo tatou Matagaluega. Ma le tasi foi, silafia foi ina ua uma le Tsunami, na tulai mai le sui usufono mamalu nei, ona fai ai loa lea o le faaiuga a lo tatou Malo. O fale uma lava o lo o faatino ai auaunaga a le Malo o lo o tu latalata i le sami, ua tatau ona ave i nofoaga maouta ina ia aua ne i aafia. E pei ona silafia le falemai lea e i Poutasi ma le falemai lea e i Fusi, na aafia ai ma le falemai lea sa i Lefaga ma Faleseela.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O falemai uma ia na fuafuaina e siitia i nofoaga tu mamao i uta ma le sami, ina ia aua ne i aafia. E oo mai lava i le taimi nei o la e tumau Poutasi ona o le tulaga i le talitonuga, ailoga e toe i ai se Tsunami e toe oo i ai. Aua na oo i ai le Tsunami i Poutasi ae o le mamao ia mai le sami. A o isi falemai ia e pei ona ou taua, e ai foi la ma Sataua, o le fuafuaga lena a lo tatou Malo ina uma le Tsunami e ave uma i uta ia nofoaga ia, o lea la e faatino ai le auaunaga. O Lalomanu foi e pei ona silafia sa tu i Tapaga. O le tausaga na ou faigaluega ai i le 1972 ma le 1973 a o ou i ai i Lalomanu, na siitia ai le falemai lea i uta ona o le talosaga mai e sue atu meafaigaluega ua elea uma i le sami, ua pisimamia, ua tutulu le falemai ona o le tulata i le sami e lamatia ai tele ia meafaigaluega ma vailaau. O lea la na siitia ai i uta i lena foi taimi ae ua ogatusa la ma le fuafuaga a le Malo lea na faatino ina ua uma le Tsunami e ave uma i uta ia falemai, o lea la e i ai le tulaga lea i la tatou falemai. O e satalosgaina mo falemai mo itumalo, o le tulaga lena o se tualga lelei. O lo o manaomia foi e le tatou Matagaluega le o i tua e faatino ai le galuega, ae aoga nofoaga ia e faatino ai auaunaga e faafaihofie ai foi ona faatino le auaunaga, ae fua i le seleni maua ma le aufaigaluega e mafai ona faatinoa le galuega. Aua e leai foi se aoga o le tu o le falemai ae leai nisi e faatinoina le galuega i lea tulaga. O le talanoa atu lea e tusa ai ma tatou falemai i tua.

Sa taua e nisi o sui Komiti Tu mama, o le agaga maualuga lea o lo o i ai nei la tatou Matagaluega, ia toe faaolaola mai a tatou Komiti Tu mama. Matauina na o le pau lea o le tulaga o le a mafai ai ona fesoasoani malosi ia le community participation i galuega faasifua maloloina, e pei ona tauao mai e o tatou tuaa ua i futia ua sola, le galuega lea e faia e Komiti Tumama. E le gata i le vave ona vaai ai o e mamai, e lelei foi fale sa fausia lava e Komiti Tumama e fai ma toaiga o le aufaigaluega pe a gasolo atu i tua, e fai ai aaooga i lea mataupu ma lea mataupu tau soifua maloloina. Sa fai ai tuiga o tui puipui ma le anoanoai o isi auauanga sa mafai ona ofoina atu i totonu o fale komiti ia. O lea ua i ai le manatu o la tatou Matagaluega e toe faaolaola ma toe apoapo mai le fesoasoani a tina o lo tatou atunu, o le a mafai ai ona maua e le Matagaluega le fesoasoani a lo tatou atunu. E le gata i lea, e i ai foi le lagona o le tele o tina talavou ua lelei le aaooina, e mafai ona aaooina, ina ia amatalia le galuega fesoasoani muamua, e foia ai nisi tulaga e ono faatupulaia, ma afaina ai ma lamatia ai le soifua o lo tatou atunu.

O lea la o lo o matou galulue soosootauau ma le Matagaluega o Tina ma Tamaitai, Atinae o Nuu, Afioaga ma Agafesootai, i le faamoemoe lea o le toe faamaopoopo lelei komiti a tina. O le talaiga foi lea o lea ua uma ona tuuina atu, o la e faafogfa mai o outou sui o lea e i totonu o Komiti Faufautua. Ua i ai nei Komiti Faufautua a le Soifua Maloloina i Upolu ma Savaii, ma o le talaiga lea o lea ua tuu i ai. Ma o le luitau lea o lea ua avatu i ai, ia e talai atu i tua ma taumafai latou e taulamua ina ia faamaopoopo tina e toe faamaopoopo komiti tumama.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ae o se taimi o i luma ona ave lea o se system lelei e fesoottai uma ai komiti a tina, ma faagasolo ai ni polokalame fuafuaina, mo le soifua maloloina. Ina ia faasopolia ai le atunuu i lea tulaga, aua nei i ai se nuu e misi ai. Ma o se avanoa lelei foi lenei, e talosaga atu ai i le mamalu o sui usufono mamalu o lenei Maota, e manaomia foi la outou fesoasoani e lagolagosua ma faufautua, i a tatou Komiti Faufautua o le soifua maloloina, e galulue i totonu o tatou itumalo ina ia faamalosia le faatuina ma le faamaopoopoina o komiti tumama. O le a tele sona sao ia tatou taumafaiga aua lo tatou soifua maloloina.

Sa taua e nisi sui usufono le tulaga i fomai ma tausi soifua. Ona o le vaavaai foi i ai i le tulaga o faamanuiaga o lo o latou maua i le galuega. E ese mai lava le tatou atunu, atonu e faapea foi nisi atunu o le Pasefika na i lo le tele o isi atunu. O le tatou lava atunu, ou te tautala faapitoa, e leai lava se isi option a tatou o fomai, e tasi lava le latou employer na o le Malo. A iu mai loa fomai, e omai uma lava o uma faigaluega i le Malo. Aua e leai nisi falemai, e le pei o isi atunu e i ai Niu Sila, Ausetalia a e le fia faigaluega i le Malo e te alu i le private hospitals ma clinics. E pau lava le option lea e i ai nei a le fomai, a le maua pe le fiafaia e faigaluega mo le Malo, ona alu loa lea e faatu lana Private Practice, e galue ai e saili ai lava lona ia tamaoaiga.

Ae pei o le tulaga la lea, ao le taua o le tulaga o totogi, manatua foi o lea ua uma ona i ai la tatou salary tribunal, o lo o silasila i le vasaga o totogi o lea profession ma lea profession, a o lea foi e siva taufai agai i ai fuafuaga a lo tatou Malo, ina ia ogatusa ia le futia ma le umele i fuafuaga, fautuaga a le Tribunal ma le seleni o lo o mafai ona gafatia e lo tatou Malo i lea taimi i lea taimi. A o le mea moni lava, o le tulaga lea e ono tilotilo foi i ai le Matagaluega, ona a faatino le fuafuaga lea na ou talanoa i ai i falemai i tua, o le a manaomia ni fomai. O lea lava sa talosaga mai pe mafai ona faaopoopo aso o fomai i tua.

O le faiga sili lea ona manaomia ma o lo o moemiti foi i ai la tatou Matagaluega ina ia mafai ona toe ausia, o le toe o i toe o i tua o fomai. E fai ese lava le latou career pathway e faagasolo ai lava a latou galuega, aua e toatele fomai e fia faia le galuega lea, a o le faalavelave e le o i ai se faavae mautu e faagasolo ai foi ia le latou agai i le lumanaui o le latou profession ina ia faapitoa lava le latou lava galuega i le Primary Health Care, lea pei sa taua foi e nisi e o ai i tua e faagasolo ai le galuega lea, ona tele lava lea o le aoga lena faaopoopo i ai ma nai faamanuiaga ina ia tosina mai ai fomai e fia ai i tua e nonofo ai i tua ma faatino le galuega lea, ia e ogatutusa lava mea ia. E tusa o vaega uma ia o lo o taufai galulue i ai le tatou Matagaluega, ina ia fealofani uma vaega uma ia, ona taunuu ai lea i se taunuuga e sili ona matagofie ia fuafuaga a lo tatou Soifua Maloloina.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O lea sa taua sa i ai se sui o le Community Based Services. I le taimi nei o lo faagasolo le polokalame e tau o le PEN faasamoa, o le PEN na faavae e le WHO ina ia foia faamai ia, o faamai lava ia o lea ua agai i ai le lalolagi atoa, aua e tusa ma le 70% o e maliliu e mafua mai, ona o le faamai lea o le Non Communicable Diseases. O lea la e faatauaina foi e le WHO, o le PEN la, Packages of Essential Services to compact Non Communicable Diseases, o le faaumiga lena o le PEN, a o lea la ua fai e Samoa, o le mea lea o le Samoa Born po o le mea na fau i Samoa ina ia o faatasi ma le aganuu ma tu ma aga faasamoa ia le fuafuaga lea a le WHO, o lea la e maua ai le mea lea e tau o le PEN i le faasamoa, o lea la o lo o faagasolo nei i tua, o la e faagasolo i le taimi lenei, e o ai la tatou Matagaluega i tua e aoao ia Komiti Tumama foi na o le tatou contact point na o tatou Communities, e i ai teine talavou o tamaitai tausala Samoa talavou ua iu mai Iunivesite e le o faigaluega ia pe ua oo foi i high schools e faigofie ona faasino i le suega o le suka ma le fuaina o le totomualuga ma o i tua e faagasolo e asiasi e faasopolia uma lava aiga uma, ona faamau lea o i latou ia, o e ua iloa ua maualuluga tele le suka ma le toto, ave lea o le pepa, alu i le falemai itumalo lea o lo o lata mai, o lea foi la e faagasolo ai le polokalame lea e follow up ai i latou nei, ma i latou uma o lo o inu fualaau e uunaia la le vaega lea a le komiti tumama, o ina ia mautinoa o la e i ai lava fualaau ma tausisi i le inuina o fualaau, ia e fautua, alu e toe aumai ni au fualaau o lea ua uma au fualaau, aua a tuai ona inu ua toe alu i luga le toto ia e te i lava ua stroke faafuasei, ona faapea lea, o lea lava sa inu fualaau a o lea ua te i lava ua stroke. O le mafuaaga lena e inu inu tuu, e le consistent ma le regular le faagasologa o togafitiga e ala ai ona tutupu vaega ia.

O le tatou X-Ray sa taua pe o toe i ai ni X-Ray, o aso ia o lena e silafia e i latou o le matou augatupulaga, o taimi a o pepesi ia le TB ia sa alu le TB campaign i tua e ave le faata foi lea i tua screen uma ia tagata, a maua lava o lea tagata ua maua i le fatafata vaivai, ia faamau ma aumai i totonus i i e inu fualau o le fatafata vaivai. Se sa mamafa le campaign o lea ua fai i lagis le folauuga ua lago mai tia foi nisi o toa o le Matagaluega sa tauaveina lenei galuega, e iloga o lea e olaola mai ai lava pese e faatosina mai ai tagata ina ia toaaga e inu fualau o le fatafata vaivai. Sa i ai la le faata sa faapena ona detect ai i latou ua afia i lea tulaga ma aumai vave ai loa i totonus e togafititia, o nei la o le TB, ia o lea ua tau o le neglected disease sa neglected, ona ua faaititia toetoe lava a leai se isi o toe maua i le TB. O le taimi nei o lea ua toe sui foi le igoa o le TB, is a re-emerging diseases, aua o lea ua toe amata ona toe agai mai le sosolo o le TB ua faatupulaia foi i latou ua afaina i le TB. O lea la e fautua ai pea, a kalekale o lea lava e avatu, e le gata i le cancer o le mama, ae faapena foi ia auga o le TB, ia vave ona sau e fai sau siaki. A o le X-Ray o taimi lea e alu ai le fomai lea i tua e faasolo i falemai i tua e alu ma ave le Mobile X-Ray ma ave ma le Pharmacy, ia uma ona vaai le mai ae o la e available ma fualau mafai loa ona tuu atu i ai lea gassegase, a o mai e manaomia le faata pe a tau mai, ia faata ai on the spot mobile unit o tatou o lo o i ai nei ia mo lea faamoemoe.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ona ou oo mai lea lau Afioga i le Fofoga Fetatalai, sa taua le...o lea ua uma ona saunoa lou uso a Minisita o Faatoaga i tulaga lea o fuamoa, a o le tulaga faa-Agriculture ia a o le pitolau a le Matagaluega o le Soifua Maloloina, lea e aiaia ai le saogalemu o le fuamoa, o le faatoaga ia faalava fuamoa ina ia mafai ona tofu le atunu ma le fuamoa. Ou te manatu aso ia a o ou laitiiti, e faalogo atu loa loomatutua foi ua ee mai le faaili i le aualatele, fai mai, tamoe tamoe mai i le fuamoa lea ave si Saina foi lea o lo o amoamo atu ana mea o atigiapa masi sa import mai ai masi keke i inei i Samoa atigiapa lapopoa, e ave ai ana mea i totonus, o filo, nila, selu, pine faiulu, o pine e faamau ai napekini e faatau uma lava, ae faatau uma lava i fuamoa, ia e te alu atu malau fuamoa ave i ai taofi le Saina si Saina toeaina e amoamo atu lava lana pe faalua pe faatolu i le vaiaso ona savali mai e savali atu i i i Utualii e alu agai i o i Fasitoo, ia ona ave lea i ai o le fuamoa ae aumai. Ua ala ona ou taua lea mea, aisea le mea ua tatou faatau fuamoa ai, a o ia aso sa ave a tatou fuamoa e faatau mai ai a tatou oloa? O lona uiga ua tele naunau fuamoa a tatou i ntai, a o lena o lea ua tatou o e faatau mai fuamoa tatou te tausasami ma faaaoga i le fofoga taumafa. O le isi foi la lea faamanatu atu e mafai lava e tatou ia ona produce a tatou fuamoa, pe a toaga e fafaga moa. O le fagaga moa a le Afioga ia Sala, o la e taaloa lava i lona toganiu, ioe, ua tele foi ana faaaloaloga i le Kabeneta, ua le mafaitaulia le moa e tau faaitiitia ai le moa. O lona uiga e tele foi le fuamoa lea e maua ia Sala. A o le fuamoa lau Afioga i le Fofoga Fetatalai....

SUI FOFOGA FETALAI: Ia malie le Afioga i le Minisita, se i tulai mai le Afioga i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetralai, na faatonuina au e le Minisita o le Soifiua Maloloina a oo loa i fuamoa lana mataupu, ona ou tu atu lea e faamanatu lana lauga ua uma ai foi i ina.

SUI FOFOGA FETALAI: Se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetralai, faafetai lava i lau Afioga. Sa ou sau lava ma ou faalogologo mai i le saunoaga matagofie a le Afioga i le Minisita aemaise foi o le Minisita o Faatoaga, e faamalulu atu ona o nai faalavelave tuatuagia, a o au sa ou lauga i le mataupu lea, o le tali a le Afioga i le Minisita o Faatoaga, e pei e agai lana tali i le puipuiga o i latou o faia lea atinae i Samoa. E leai e pei lava ona manino i lau talanoaga, e matua auai lou manatu ia puipui o tatou tagata i atinae nei, ae afai e le o mafai e i latou ona faamalieina le maketi, e ao la ona toe fetuuutunai, aua o lea e taua o lo o i ai nisi o le aufaipisinisi o lo o taumafai e fai.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E manatua o le mea lenei o le fuamoia e tausaga atoa e fai ai faatoa tino mai. O lona uiga, o le isi tausaga atoa, o le a gafa tatou ma le faaitiai o le fuamoia, ae manatua o le manulauti a le Malo, e muamua lava tagata lautele. A o lau lauga la sa faasinotonu lava i le Minisita mo le Soifua Maloloina i le masina ma le lua masina....

SUI FOFOGA FETALAI: Ia saunoa lau Afioga i le Minisita. Efua faamalulua atu i le sui usufono mo Faleata Sisifo, se i saunoa le Minisita mo Faatoaga ma Faigafaiava.

Tofa Hon Lopao Natanielu Mua: Lau Afioga i le Fofoga Fetralai, leai ona e le o sou taimi lenei ae ona faasao atu lea mea lea, leai o la e aumai lava le fuamoia mai fafo i le taimi nei e fesoasoani ai i a tatou fuamoia lea e mafai ona maua i inei, e le o taofia lena mea o lo o aumai le fuamoia mai Fiti ma Niu Sila e talafeagai ma le 30 aso lea e i ai nei. A o isi lava taimi ua tele lava le demand ia ae ua faateleina le.....ae o lo o taumafai pea isi mea e le faapea o le a atoa le tausaga o faatali le faiga o fale gaosi fuamoia, ia ae le aai fuamoia ai lo tatou atunu, o la e aumai lava le fuamoia ae pau lava....

SUI FOFOGA FETALAI: O lea lava e manino le mataupu i fuamoa, le Maota....

Tofa Lealailepule Rimoni Aiafi: Lau Afioga i le Fofoga Fetralai, o lea o le a uma atu si vala laitiiti.

SUI FOFOGA FETALAI: Saunoa le sui a usufono.

Tofa Lealailepule Rimoni Aiafi: E agai lau talanoa i le Afioga i le Minisita mo le Soifua Maloloina, o latou e ou le Tulafono lea e 30 aso aua o lea sa 60 aso, o lea ua toe faalaitiiti e latou i le 30 aso. A o le uiga o lau tala, o matou foi ia e fai ma o i Tutuila e 60 aso foi la e faaaoga. E leai se faamaumauga faafomai po o faasainenitisi o faapea mai, e na o le 30 aso e mafai ai ona faaaoga le fuamoa.

Ae pe mo le taimi nei lea na talosaga ai, afai e mafaia ona outou toe tagai i le itu lea se i faamalieina le maketi, aua e le pepelo lau tala, aua a uma nei la le fono ae ma o ma le Afioga i le Minisita e taamilomilo i Vaitele atoa, ia ona iloa lea o lau tala lea e fai atu, faafetai.

SUI FOFOGA FETALAI: Faafetai. Saunoa le Afiofa i le Minisita mo le Soifua Maloloina.

Afioga Hon TUITAMA TALALELEI TUITAMA: Ua vave le faauilavea a le uso, ae o lea ou te agai atu i le vaega lea aua o lau matafaioi tonu lea sa saunoa mai ai i le 60 aso, ona o lea e complain i le 30 aso lea e i ai.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E silafia foi, o le Tulafono o Taumafa 2015 ma le Tulafono Faatonutonu o Taumafa Saogalemu 2017, lea o lo o aiaia ai le tulaga lea e 30 aso, ia o lea la o le a ou faamatala atu le mafuaaga, o le 30 aso ua uma ona aiaia, o aso ia e saogalemu ai le fuamoia mo le taumafa, a ova atu loa ua lamatia le soifua o tagata. E i ai foi le siama e feaveai e fuamoia lava ia e faaletonu pe a le lelei ona....a o lea 30 aso maitau mai la lau tala lea, 30 aso e tatau ona i le va o le 4 tikeri centigrade ma le 7 tikeri centigrade e store ai. A ova atu loa i le 30 aso, a tuu i fafo, tusa o le ambient temperature lea pe a tuu i fafo e na o le lima aso e mafai ai ona e tuu i fafo le fuamoia lea e le tuua i totonu o le refrigerator, ua tatau loa ona faaaoga, a ova loa ma le lima aso ua le tatau ona toe faaaoga ua unsafe.

O lea tulaga, e le na o Samoa lea e faia le 30 aso, o la e faatino foi e Niu Sila, o Niu Sila o le atunu malulu, a o le latou Tulafono e store ai le fuamoa o le 7 foi tikeri la e tatau ai ona store le fuamoa, ae a tuu foi i fafo i le 15 degree centigrade i le air tempreature a latou, e tatau foi ona lima aso ona faaaoga lea o le fuamoa, e le tatau ona ova atu i le lima aso. Pei la o le mea lea ou te talanoa atu ai, o le a ou talanoa la i le 60 aso....

SUI FOFOGA FETALAI: Malie le sui usufono mamalu mo Faleata Sisifo, o lea ua manino lava le mata o le vai, ou te talitonu o le a....

Tofa Lealailepule Rimoni Aiafi: Ua lava ia lea, o le a atoa le isi itula o tau faamatala lava, faafetai. E manatua foi o pusaaisa, e i lalo lava le zero degree lea e tuu ai a tatou fuamoia, ae faafetai ua lava ia lea lau Afioga, faafetai lava ua ta le malamalamama, faafetai lava.

Afioga Hon TUITAMA TALALELEI TUITAMA: O le 60 aso la lea e aumai ai le fuamoa mai Amerika ma e taunuu mai i inei e 25 aso ua taunuu mai i nei talu ona tuu fuamoa, ona totoe ai lea o aso e lima ua tatau loa ona faaaoga, a o lea la o le aumaiga lava i Amerika a manaomia le ausia o le 60 aso, e tatau ona 4 i le 7 tikeri direct ea foi lea e sau mai le refrigerator e tumau ai lava ai lava aua ne i femoumouuai, constant tempreature between 4 and 7 degrees, a aumai nei la taunuu mai le uafu ona ave lea i le faleoloa ua alu ese ia le tempreature, ave lea ua faasoa i faleoloa i tua e taunuu i ai ua ova i le 30 aso. Ua fia aso o i fafo? Ua matua le saogalemu lava. O Amerika foi, o lea e aumai ai fuamoa lea e tatou te manaomia e faa-60 aso, e 30 foi aso le latou foi Tulafono e tatau ai ona faaaoga le fuamoa. E le o mamaao lava la tatou infact, o lea e linkage tatou i le tulaga lea, ona o lea e mafai ona faaaoga tatou fuamoa e tuu i fafo i le ea vevela mo le lima aso ona faaaoga lea, ae tatau lava ona faaaoga within those five days.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ona ou talanoa atu lea lau Afioga i le Fofoga Fatalai sa taua le siusiupipi, tulou le faafogaaga a le atunu ma le Maota, i lea mataiai. Ou te faamalamalama atu e faapea, o le 2011 lea na pasia ai ona o tulaga foi i lena taimi i meaai gaoa ma meaai lololo e faatupulaia ai faamai lea ua uma nei ona ou talanoa atu i ai, na faapasia ai le Tulafono o le a taofia le toe aumai i totolu o le atunu i le tausaga lea e 2011 e taofia ai le toe aumai i totolu o le siusiupipi. Peitai i le 2013, na ofi ai Samoa i totolu o le Faalapotopotoga foi lea o le WTO, World Trade Organisation, i lalo la o le WHO e i ai le latou Tulafono lea e faapea, Nondiscrimination Rules, lona uiga e le mafai ona tatou faasaina ia ni oloa e aumai i totolu o tatou, talu ai lo tatou auai i totolu o le Faalapotopotoga lea. O lea la na toe faataga ai loa ia le aumai o siusiupipi i le 2013 ma tuutuuga e tolu tausaga e totogi ai le 300% le tiute pe a e naunau lava oe e aumai lau siusiupipi, a uma le tolu tausaga ona pau lea i lalo o le tiute i le 100% e tiute ai, o le 100% la lena o lea e oo mai nei lava i le aso, o lea e tatou te alu ai lava i le 100%, a o le tulaga la i le siusiupipi, ia e lagona ma le faanoanoa ua matou maua atu isi matou asiasiga i isi faleaiga o la ua faatau ai siusi pipi, a o aiaiga o le Tulafono lea na i ai. E mafai ona e aumaia le siusi pipi totogi le tiute i le malae vaalele, aumai i tua lau siusi pipi, ona faaaoga lava lea e oe mo oe lava, mo lou lava fofoga taumafa, e sa ona faatau. O le Tulafono lena, a o lea la e maua atu nei, atonu e i ai vaega e lagolagoina ai le argument lea, o le faalavelave la, e le mafai ona tatou faatinoa le vaega lea, se i vagana ua lift le prohibition order a le Customs, lea e control ai le 100% lea. A o le taimi nei la, se i vagana ua suia le prohibition order lena a le Customs ona faatoa mafai lea ona faataga le aumai o tatou siusi pipi ma pule oe po o le a le mea e fai i ai. O le faamalamalama lea o le siusi pipi lau Afioga i le Fofoga Fatalai .

SUI FOFOGA FETALAI: E faamalulu atu i le saunoaga matagofie ma le manino ma le malamalamā a lau Afioga i le Minisita o Soifua Maloloina. Ae o le a tuu atu pea le avanoa leaga na taua i le lauga a le sui usufono mamalu mo Faleata Sisifo.

Tofa Lealailepule Rimoni Aiafi: Faafetai lava mo le avanoa. Faafetai i lau Afioga i le Minisita. E leai o le ala lea na laga ai ananafi ina ia fai se faaiuga manino a lau Afioga ma le Minisita o le Kapaneta, po o le a tonu lava le tulaga o le siusiupipi. Aua e leai lava se isi o tatou e le o iloa, o lea lava ua tatala mai ma aumai, a o lea foi tatou te iloa o lea e aumai i lalo o se tiute maulalalo. Manatua foi, i lalo lava o le tiute e i ai le faatagana foi lea e mafai ai ona e aumaia mea i totonu i lalo ifo o le \$500 le tau. Afai la e te sau ma au pusa pipi e lima, e aumai fua i totonu, aua e i lalo ifo o le \$500 le tau. Ae afai la se faaiuga, afai e tout e finagalo e tatala ma faaaoga lelei, ae faaaoga mea foi lele o faalauiloa i le atunu i se faiga e kukaina ai. O lou lava lena talitonuga, e tatau ona toe tatala i se aiaiga talafeagai, ina ia mafai ona toe faaaoga lea mataiai a le atunu. Ma le faaaloalo lava.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

SUI FOFOGA FETALAI: Lau Afioga i le Minisita tulai mai.

Afioga Hon TUITAMA TALALELEI TUITAMA: Faafetai mo le faauiavea a le sui usufono. E sagatonu lava le faauiavea, aua e pei lava ona ou taumafai e talanoa atu, ua fai saililiga a le Soifua Maloloina ma mautinoa ai o lo o i ai foi isi mataiai o lo o faaaoga i inei, o lea e oo i le 70% le fat content. E aofia ai mamoe, povi lololo ia e aumai, e faapena. E pau lava le mea ou te faamanatu atu, e le ia matou le aia e lifi ai le banned lea, le prohibition order lea, o le matafaioi lena a le isi Matagaluega. A o le tulaga lava ia i le siusiu pipi, ou te le iloa po o le a le mea o le a toe faasa ai, ou te iloa o la ua soo Samoa i le siusiu pipi i le taimi lenei. Lau Afioga i le Fofoga Fetralai, pau ia o matapu sa laga mai e sui usufono.

E momoli atu ai le faafetai tele i le tapuaiga a si ou itumalo, faamalo lava le tatalo ma le tapuai mai aua le tauaveina o le Nofoa o lo tatou itumalo. Soifua ma ia manuia lau Afioga ma le mamalu o le Fonotaga.

SUI FOFOGA FETALAI: Faamalo saunoa, ua manino ma malamalamalama lau Afioga i le Minisita o Soifua Maloloina. Aua foi nei galo o lau Afioga o le alii fomai faauuina a le Malo Tutoatasi o Samoa. O lea lava ua oo lava ina faaaoga medical terms, ina ia faamanino ai tulaga uma e pei ona fesiligia e sui usufono mamalu. E momoli atu le faamalo ma le faafetai, malo galulue le Matagaluega a le Soifua Maloloina ma lau Afioga. Ia faamanuia le Atua i galuega o totoe ma faaaauau o lenei tausaga.

Ou te tapa ma le faaaloalo lau Afioga i le Minisita mo Pisinisi, Alamanua ma Leipa.

Afioga Hon LAUTAFI FIO SELAFI PURCELL (Minisita mo Pisini, Alamanua ma Leipa): Faafetai atu i lau Afioga i le Fofoga Fetalai, e pei foi o lau tala sa fai muamua i le isi taimi na e alaala mai ai iina, œ ese lou onomea.ö

E faatalofa atu i le paia ma le mamalu o le Maota, afio lau Afioga i le Fofoga Fatalai, lau Afioga i le Palemia, Afioga i Minisita o le Kapeneta, Minisita Lagolago faapea foi sui usufono mamalu o le Palestina nei. E faatalofa atu foi i le faafogaga ma le tapuaiga a Samoa, mai lava i mauga tetele seia paia mauga iti. E faatalofa faapitoa atu i si ou itumalo o Satupaitea, malo tapuai malo i la outou tatalo.

Lau Afioga i le Fofoga Fetatalai, ou te tulai atu e faamalamalama nai vaega laiti, e le toatele foi nisi sa afea Matagaluega o lo o i lalo o lau vaavaaiga i le taimi nei. E taumafai lava e avatu atoa mea i lona aotelega foi lea, ae leaga e i ai sui usufono taitasi e manino lava o latou itumalo lea sa saunoa mai ai.

O le saunoaga a le sui usufono mo Vaimauga i Sasae, o le sui usufono lava lea o lana mataupu lava lenei e aumai o fanua o lona itumalo. O le tali foi a lenei a le Malo e avatu i ai.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

O le taimi nei o lo o galulue le Matagaluega o Eleele a le Malo e tau faasoasoa i itumalo eseese o Vaimauga aemaise lava Letogo, Vailele, Fagali'i, ia eleele o le Malo lea ua leva ona nonofo ai i latou, e fai se feagaiga ina ia talafeagai. O lea ua uma lava ona taatia faaiuga i fanua e ave i pitonuu nei. Ua malilie foi lava pitonuu nei i le vaevaega o fanua, ona o lo o taumafai le Malo ia faamalieina foi i latou ae faamalieina foi le afe ma afe o le atunu o lo o tagi mai pea i aso uma. O lea la ua fetuutuunai ai fanua, e ave lava le faamuamua ia i latou o lo o alaala i luga o fanua nei, a o isi fanua o lea ua taumafai e faasoa atu i le atunu.

O le tulaga i le tau o fanua ua uma ona fai le faaiuga a le Malo i le tau o fanua i le taimi lenei. O lo o lagalaga mai pea e le sui usufono mamalu le tau e faapea e \$8,000, ae ua le o toe i ai se fanua faapena o le Malo o toe i ai. O le tau lava lea ua ave i nuu o lo o alaala i fanua o le Malo e \$35,000 i le $\frac{1}{4}$ eka. O lea foi ua faapena ona faia i isi itumalo i Faleata, o le tau lava lea e tasi. A tilotilo foi i ai, o se tau faamamaavega tele lena i le tau o fanua o lo o i ai i le taimi nei. Atonu o se feagaiga na fai i se vaitau ua alu, a o tausaga uma e alu ai lava i luga le tau o fanua. Ae talu lava ona fai le tau lea a le Malo o lea lava e tumau ai e le o toe siisiia i tausaga uma. A o le galuega a le Matagaluega o lea lava e tuitui atu pea ma o atu i tua e taumafai lava ina ia faamalamalama i alaalaafaga, ua leva ona nonofo i fanua o le Malo, ma ave i ai le tuutuuga lea e faatau pe a mananao ai, a leai ona lisi lea, aua e pei e nonofo ai lava ma alaala ai lava le mamalu o nei nuu ae leai ni feagaiga lelei e mafai ai ona amanaia lo latou nonofo i luga o fanua o le Malo. O lea la o lo o taumafai i ai le SLC i le taimi nei. Po o le lua foi vaiaso talu ai, na toe o atu ai foi i se tasi o alaalaafaga ma taumafai foi e fai se feutagaiga talafeagai. Ua aumai le manaoga o lena foi alaalaafaga, ia e ese foi le mea e manao ai latou, e manao lava latou e lisi atu pea, o lea la ua gaioi foi le Matagaluega e fai faalelei ia lease agreement ma i latou o lea o le a ave i ai e le nuu ia fanua e nonofo ai. O le faamatalaga atu lena. E alofa lava foi i le atunuua aua e anoano tagata o lo o manaomia mai se fesoasoani a le Malo, o lea foi e tau faapalen i ai le tilotilo. Ae ou te alofa tele i le sui usufono lea, leaga o lana mataupu lava lenei. Ae fautua atu, savalivali atu ta talanoa e maua ai le taimi e umi ai ona ta talanoa ma tatou talanoa ma le Matagaluega e malamalamalama atili ai lau mataupu, ma fai ai foi nisi feutagaiga e ono mafai ona fai. Ae le lava se taimi e faamalamalama atu ai i lau Afioga ia tulaga o lo o i ai fuafuaga a le Malo faapea foi le Matagaluega nei.

Lau Afioga i le Fofoga Fetalai, sa talanoaina e nisi o sui usufono le tatou taulaga i Salelologa. O le manatu lava lena o le Malo, e taumafai lava e atinae lo tatou aai i Salelologa, e pei o i ina lea e faamoemoe o iina e ono vave ai le development o le tatou motu tele i Salafai. E leai lava se isi o matou nei o le komiti ua faapitoa e vaaia le taulaga lea, e le o naunau i le itu lena. O lena foi e toatele lava sui usufono mai Savaii, o le manaoga lava lea e tasi, ia tatou vaai ua tulai mai ia ni galuega, ni fefafolafoaiga e galulue ai o tatou tagata soia le o mai soo i Upolu.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O le mea lea e tupu i le omai soo i Upolu, o lea foi o le a toe faatau se isivaa, talu ai le omai i Upolu nei ae la maua lava galuega i Savaii. O lea la o le a taumafai i le tausaga lenei, o la ua ave le faatonuga i le Matagaluega o Eelele lea ua see mai i ai le faagaoioiga o le taulaga e faamuamua galuega i le taulaga i Salelologa. Ma o lo o i ai foi la fuafuaga i se auala e mafai ai ona faavave ona nofoia e tagata a latou lisi. E le na ma se laina e pei foi ona saunoa nisi o sui usufono o le matua gaoa lava o le fanua, o le pogatia lava lena o lo o i ai, that's the main problem. E tele foi ia ni kamupani konekarate sa latou faia taumafaiga e sua fanua i ina, o la e goto ai lava i ina a latou masini, o le faigata ia. O le a tilotilo i ai le Matagaluega, po o le a se auala e mafai ai ona faafaigofie i nai tagata ua i ai a latou lisi ona nofoia a latou lisi ma amata loa ona fai pisinisi ma taumafai e faatupu le taulaga. O lea e fai le fuafuaga e faafaigaluegaina se tagata faapitoa lava na te plan ina le taulaga i Salelologa, o la ua mafaufau i ai e faasalalau i se taimi lata mai. Ona nofo lava lea i Savaii ma aumai fautuaga i le faasoasoaga lelei o le eelele. E pei o le mea la e i ai nei, na o le avatu lava o lisi togi atoa i luga o le ogaeleele lea, ae tatou te silafia foi, e taua le lelei o le plan ina o le taulaga i le agai i luma. A i ai ni mea e ono tutupu i le taulaga i le lumanai ae la e le o faalavelave ni fale ma ni tulaga faapena sa fai i le taimi nei.

Ae faafetai atu i manatu lelei o tatou sui usufono mai Salafai, tatou te galulue faatasi lava i le taumafaiga o lo tatou taulaga i Salelologa. A o lena ua ou tau atu, o lo o faamuamua e le Matagaluega o le SLC ia galuega o le taulaga i Salelologa i le tausaga lenei. O lea foi e i ai Afioga i Minisita o lo o matou vaavaia le development lea, ia o matou o le a tatou galulue faatasi.

Lau Afoga i le Fofoga Fetatalai, sa taua e nisi le minimum wage po o lau Afoga foi le isi. E faapena uma lava Malo o le lalolagi, e i ai lava taimi e fai ma toe review lea pe mata ua talafeagai ona toe sui, aua e le o se mea e faigofie. E le o se faaiuga e soona fai, ma e tatau ona mautinoa lelei e le atunu, e gafatia le totogi o le totogi maualalo, po o le minimum wage. E mananao uma lava ia tetele totogi ae i ai foi ona lape.; Sa saunoa se tasi o sui usufono, afai loa o le a tuu atu ia se totogi maualuga, o au foi sa i ai au tagata faigaluega. O le mea lava lea e muamua ou tilotilo i ai i le taimi o le a alu atu ai le \$2 le totogi maualalo, pe maua le toa toluselau o lau aufaigaluega sa i ai. Na muamua lava ou tilotilo e tipi le aofai lau aufaigaluega, ia tasi lava le paketi e totogi ai, sii i luga totogi ae alu i lalo le numera o tagata faigaluega. E tasi lena mea e tilotilo i ai, a o lea e taumafai ina ia faigaluega uma o tatou tagata. Pe itiiti lava le totogi lea e taumafai i le taimi lenei, a o la e maua si fasi tupe.

Ae o tulaga o le toe iloiloga o le mataupu lea, atonu e i ai se taimi e tilotilo ai lo tatou Malo ma lau Matagaluega, ona ave foi lea o se fautuaga pe gafatia i le taimi nei. E aafia tele lava le private sector i se siitaga o totogi faapenei ona o latou lava, o lo o matele i ai casual workers, lea e faasagatonu i ai le minimum wage. Ae taatia mai le finagalo lea o le a silasila i ai le Matagaluega.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

O le mataupu mulimuli lau Afiofa sa tele i ai ni manatu o le tatou vaalele. E momoli atu lava lau faafetai i lo outou agaga i lo outou lagolago i le tatou vaalele, aua o le tatou vaalele. E taunuui foi le tala foi lea o se miti ua taunuui, o le miti a lo tatou Malo e le o se miti foi faatoa fai i le tausaga na tele nei. O le miti lava na fai ina ua le toe i ai se tatou vaalele, o i ina na amata mai ai. A o lea faatoa faatino. E le o se mea la faapea na soonafai lenei manatu ma lenei atinae.

E faafetai atu i fautuaga lelei lea na tuu mai e tapue ai le tatou atinae i le agai i luma. E pei o manatu o sui usufono ia transparent, e pei lava ona ou fai atu, o lo o ua taatitia uma lava na faiga ma fuafuaga, o lea faatoa lua masina o le tatou atinae. Ae ua taatitia uma lava alafua faapea e malamalamai ai foi le Malo i le faagaoioiga o tupe i le taimi lenei aua e i ai lava reporting periods a le Malo latou, e faapena lava ona agai i ai pe tai tolu lava masina. O lea foi ua finagalo le Kapaneta e i ai se Komiti faapitoa latou te o e fesoasoani i le faagaoioiga o tupe ma lipoti mai ma fesoasoani i le Komiti Faatonu. O le mea lena ua faataatia, pe i ai se avanoa e ono i ai ni faiga faaalatua, pe i ai foi ni tupe soona faaalu.

O le atinae pei ona malie foi i saunoaga a nisi, o le maaleale ia o lenei atinae, e oo foi i le taimi na ou i ai au i le taumafaiga o lenei vaalele, ua malamalamai ai e ese le faigata, o le technical ia o lenei mea, ae tasi le tatou vaalele, a o lea ua taunuui le tatou faamoemoe. O lea ua tatou felelei i Niu Sila ma Ausetalia. I le taimi lenei i le tausaga lea, na o le talanoa lava i ai. O le alualu i luma o lenei atinae, e faamoemoe lava i le lagolago, o tupe e faamoemoe i ai le atinae e faamoemoe i tupe e totogi i latou e feoai i luga o tatou vaalele. O lea ua taua foi o le miti lava lea a le Malo na fai, o le auala e fesoasoani ai i o tatou tagata, o lea la ua taua, na ona pa lava o a tatou pasese, alu foi i lalo ma pasese a le Air New Zealand, faapena foi le Virgin. Vaai la i le tele o lena faamamaavega i le tatou atunuui? E le gata la i tagata o le tatou atunuui o le a femalagaai, ae o le a faigofie foi i tagata tafafao maimoa mai fafo ona omái aua o lea e tilotilo atu ua taugofie le pasese e omái ai. Pe omái i le Air New Zealand pe omái i le tatou vaalele, a o la e omái i Samoa aua ua taugofie.

O le mea lea sa o ai i Fiti, aua e i ai le vaalele a Fiti, e tauva la ma vaalele ia. Ia o i Tahiti, aua foi e i ai latou vaalele, o Cook Island. O lea la o le a tatou ofi foi tatou i totonu, tasi lena effect o le tatou vaalele lea ua fai, e le faapea na o le i ai o le tatou vaalele, e leai e tele lava faamanuiaga e oo mai i le tatou atunuui. O lea la ua te i a pau i lalo pasese a le Air New Zealand. O latou foi lea o lea e taumafai i tauvaga, o le mea lea e lelei ai le competition e benefit ai lava le tagata malaga. Ia o le faamanuiaga lena a le tatou vaalele, ae o le lagolago e manaomia mai le tatou atunuui atoa o Samoa. O le a le mea tatou te toe o ai i vaalele a Niu Sila, o lea ua i ai lava le tatou vaalele, e faamoemoe i tupe tou te totogia i lo tou faigamalaga i Niu Sila ma foi maií

Lafo mo le Faaauauina o Itula Fono

SUI FOFOGA FETALAI: Ou te faauilavea i le saunoaga matagofie a le Afioga i le Minisita, talu ai o lo o i ai se lafo e fia faatu o galuega tau le Malo a le Taitai o le Maota. O le mea lea ou te tapa ai ma le faaaloalo lau Afioga i le Palemia mo le lafo.

LAFO MO LE FAAAUAUINA O ITULA FONO

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu e faatu le lafo, *Ina ia faaaauau pea Taualumaga o le tatou Fono i le aoauli nei se i maea ona tali le Malo, masalo toe lima minute i mataupu laga ona tatou agai atu ai lea i se isi lima minute e faamaea ai le Budget ona tatou malolo ai lea mo le aso a taeao nisi galuega a le Maota.*

Faalua e le Minisita mo Pisinisi, Alamanua ma Leipa, Minisita mo Galuega, Felauaiga ma Atinae Eseese ma le Minisita mo Faatoaga.

Na faamaonia le lafo.

Na toe faaaauau felafolafoaiga i luga o le faiatauga faalua o le Tulafono Tau Faaofi o le Faatatauina o Tupe Faaopoopo (Nu.I) 2017/2018.

SUI FOFOGA FETALAI: Ou te tapa lau Afioga i le Minisita e faaaauau lau saunoaga.

Afioga Hon LAUTAFI FIO SELAFI PURCELL: E faafetai atu i lau Afioga, ia e le toe umi foi se faamatalaga. E pei lava ona fai atu, o le tatou atinae e fou, ma so o se atinae aemaise lava atinae tetele faapenei, e le mafai ona amata loa, selau pasene mea uma, e tele lava avanoa e i ai nai lapse, pei la o nai mea ia sa faamalaulau mai e sui usufono. O mea foi nei o femalagaaiga pei ona ou fai atu, o lea faatoa ou malamalamama tele ai foi au, e fai lava se ogaoga o mea sa aafia. E pei la o le tulaga sa i ai Aukilani, o lea e faapea e ese le mea e o i ai ave i ai passport ese le mea e aumai ai le Boarding Pass. E mafua ona o le system o lo o taumafai tatou e o i ai i totolu. Ia iloa foi systems i malae vaalele, e i ai latou e own ina systems. E ave i ai tatou tusi talosaga ina ia mafai ona tatou ofi atu i totolu o le latou system ina ia faafaigofie ai le femalagaaai a o tatou tagata. O le mea la ua tupu, o la e ua maua le tatou avanoa, ma ua maua le tala, o le faaiuga o le vaiaso lea o le a sau nei, ua faaleleia Aukilani. O la e ok lava Samoa faapea foi Ausetalia ae se i vagana ai Aukilani lea na ou sau foi au ou lavea ai foi. A o le faamatalaga, toe tasi lava se tatou vaalele. Ia o lea tatou te tauva ma isi vaalele foi nei i le enter ina i totolu o le system lenei, e te alu atu ma lou passport, e tago le teine i le counter, swipe lou passport a o la e ua iloa mai e le Immigration ma le Customs.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O mea la faapena, o nai mea na o lea e tau tapenapena a o lea ua toe tasi se vайаiso ona faaleleia foi lea. O isi mea o online bookings ma isi mea, o mea ia тetele a le lalolagi so o se mea lava e book mai ai, o le masina o Aperila ona tatou maua uma lava tulaga na. Ia ona pei lava lea o tatou, o isi vaalele tetele. Ae manaomia lo outou onosai ma lo outou faapalepale o nai mea laiti lava ia, o nai teething problems ia i atinae faapea, e expect lava ni mea faapea e tutupu. Ae talosagaina lo outou lava pea o le onosai ma lo outou lagolagoina o le tatou vaalele.

Sa fesiligia e nisi le lisi o le tatou vaalele, o le tatou vaalele o la e lisi e leai lava se tatou power e mafai ona faatau se tatou vaalele ona fai lava si taugata. O le tau o vaalele, e oo i le tai \$300 miliona. O nuu uma lava o le Pasefika, ou te iloa o la e lisi uma lava latou vaalele mai kamupani faapitoa lava latou o le latou lea galuega fai o le lisiina o vaalele. O le lisi la lea e lisi mai ai le tatou vaalele e 12 masina. O le lisi muamua i le ono masina, o le mea e tau o le wet lease, e sau ai le vaalele, sau ai avevaalele, sau ai teine e faigaluega i luga o le vaalele, sau ai ma inisinia i le lisi lea i le ono masina. O le faiga lava lena o le lisi mai le kamupani vaalele, e le mafai ona soona tuu maia le latou vaalele. E le pei o le mea foi lea a o le lisiina o sau taavale, na ona e alu atu lava faaalilou laisene ae aumai. E le mafai, e omai lava tagata ina ia silasila mai o lea ua i ai tagata agavaa o tatou e vaiai le latou vaalele. Ia ona faatoa o lea. O le ono masina lea e i ai le lisi lea e tau o le wet lease, lea na omai ai teine ma pailate, ia ua o teine toe la o pailate. O le tele lava o teine Samoa la e i luga. O le isi pe toe tolu masina ona o foi lea o pailate ona amata loa lea ona faigaluega ai lava a tatou pailate i luga o le vaalele. O lo o i ai fuafuaga mo se isi tatou vaalele e faatele ai le tatou industry ae fuafua lava i le tatou tupe maua, ae fuafua lava i le success o le tatou vaalele, o lea e faamoemoe po o le faaiuga o le tausaga nei ua i ai se isi foi tatou vaalele faapea, e lisi foi. Pei ona ou fai atu, e le mafai ona tatou afford ina se vaalele.

Ia a o le miti lava ia i le agai i luma, ia tele ni tatou vaalele ma mafai loa ona faatau se tatou vaalele i le size tatou te mananao ai. A aumai le tatou vaalele lona lua lea ua tele foi le mea tatou te fuafua e agai i ai, o Ueligitone, o Brisbane, o Melbourne. Ia o fuafuaga na a le kamupani i le tatou vaalele lona lua ona tele ai foi lea o le avanoa i le service e omai ai o tatou tagata ma tagata tafafao mai.

O le faafesili mai i le tau o le lisi, ou te faamalulu atu ia i latou sa faafesili mai i le tulaga lea ona o le aiaiga ma le kamupani lea sa saini le tatou feagaiga, tasi lea aiaiga, e le faasalalauina faalauaitele le tau o transactions ia na fai, lea e lavea ai ma le tatou lisi. O mea ia e pei ona ou fai atu, e maaleale lava le industry lea, lea e i ai lava faamaumauga, commercially sensitive information, ma e naunau foi latou e le faasalalau atu i iloa e isi kamupani vaalele. O lea la na tatou sainia ai i lalo o terms ia. Ia manatua foi o lea tatou te faamoemoe e toe lisi se isi tatou vaalele. A tatou usitaia lava la ma tatou o pea i luga o feagaiga nei, ia atonu e tele lava le avanoa e toe maua ai se lisi o se isi tatou vaalele.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

A o le popolega, ina ne i avea lava le naunau e fia iloa le amount lea ae avea ma avanoa e ono ponatia ai le tatou agai i luma pe a faapea mai kamupani, o le atunu lena e le iloa keep se secret, e avatu nei commercial secret ae o latou faasalalau.

Ia, o le naunautaiga lena ina iaí O le mea taua o lea ua i ai le tatou vaalele, o lea ua mafai lava ona totogi e le vaalele ia le taimi lenei. Ma e i ai lava tatou lipoti faaleausaga e aumai i totonu o le Maota lenei, ma o i ina e le mafai lava ona le toe ponatia ai tatou i lisi e pei o le feagaiga lea na fai.

FOFOGA FETALAI: Se i tulai mai le sui usufono mo Anoamaa Sisifo.

Tofa Lauofo Fonotoe Nuafesili Pierre Lauofo: Lau Afioga i le Fofoga Fetalai, e pei o au lea sa fesiliga le tulaga o lisi faatasi ai ma se tasi o sui usufono o leenei itu o le Maota. Faafetai la o lea ua maua ona o tulaga foi nei faalilolilo po o confidentiality agreement. O lea la e pei e mafua ai ona faa o le tulaga lea e aumai ai le tatou vaa o lea e aumai i lalo o le tulaga foi lea o le wet lease. A o lea la e faalogologo atu ma le totoa, 12 masina ma le isi ono masina, a o lea ua faagaso losolo masalo e aulia atu le isi ono masina ua amata ona sui le crew. O i latou ia o lo o faafoea le vaalele tamaitai foi nei e galulue i luga faapea foi pailate ma kapeten. O le a tonu la le taimi... o le uiga tonu la o lau saunoaga a tolu loa masina ona tatou sui loa lea i le dry lease mai le wet lease i le dry lease? E pei o le mafuaaga lea. Afai la o le a tatou sui i le dry lease, o le a pau foi la i lalo le totogi o le lisi? E pei o le mafuaaga lea o le fesili.

SUI FOFOGA FETALAI: Faafetai. Saunoa lau Afioga i le Minisita.

Afioga Hon LAUTAFI FIO SELAFI PURCELL: Faafetai atu i le faafesili, ia o lea sa tau agai atu lava i ai se i faamalamalama muamua atu le toe foi o teine na omai i lalo o le wet lease. Ia ae uma loa le tolu masina, ona o foi lea o pailate ae avatu tatou pailate la ua koleni i le taimi nei, ona fully staff lava lea o le tatou vaalele e o tatou lava tagata, vagana lava inisinia, o inisinia lava na a le vaalele lea, o lea e part o le feagaiga e galulue lava i inei e vaai... seiloga foi ua lava le tomai o tatou inisinia e vaia tatou vaalele ona o foi lea o latou ae tauave uma lava e tatou tulaga uma na. O le faamalamalamaga lena o lea mataupu.

SUI FOFOGA FETALAI: Tulai mai lau Afioga i le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o tatou pailate ia ua toe foi mai, o latou lava na sa feoai foi i ituaiga vaalele ia muamua.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O isi tatou pailate sa galulue i Singapore, e aoao pailate Singapore e felelei ai i vaalele ia, o lea la ua toe foi uma mai. E oo foi la i inisinia, o tatou inisinia ia na i ai, na laisene e mafai ona latou vaiai vaalele uma lava na felelei mai i lena taimi o Boeing ona ua maualuga lo latou aoaoina. O lona uiga la, e le i leva, e toe taliu uma mai lava le tatou vaega lea e faagaoioi le tatou vaalele.

Afioga Hon LAUTAFI FIO SELAFI PURCELL: Faafetai i lau Afioga i le Palemia, e saolele lava le saunoaga a le Palemia, ma o le agaga foi lena na faatu ai le tatou vaalele, toe aumai tagata ia e agavaa e galulue mo le tatou vaalele ia tele ai lava le avanoa e agai ai i luma ma successful le tatou industry lenei. Ae pei lava ona ou fai atu e moomia lava lo outou onosai ma la outou lagolago i le tatou atinae o i ai nei.

Lau Afioga i le Fofoga Fetalai, ona pau ia o nai mataupu na ou fia tautala ai.

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetralai faamolemole lava pe maua sou avanoa.

SUI FOFOGA FETALAI: Tulai mai le sui usufono mamalu mo Alataua Sisifo.

Afioga Aliimalemanu Alofa Tuuau: Faafetai mo le avanoa, faafetai foi i lau Afioga i le Minisita mo le tau faamalamalamaina. Ona o lea e malamalama foi i le tulaga o le le mafai ona failoa mai ona o tulaga faa-commercializations. O le fesili la ina ia mafai ai ona ou tau malamalama, o le a le umi la lea e fuafua, aua o lea na e saunoa mai e 12 masina. E i ai se isi piriota i tua atu e uma ona toe renew lea o le lisi. O le a le umi lea la a lisi ai le vaalele lea, aua o lea na e saunoa mai e \$300 afe miliona le tau o le vaalele, ae a maua atu la le umi lea o le a i ai le lisi, atonu ua faamalieina foi le fesili. Faafetai mo le avanoa.

Afioga Hon LAUTAFI FIO SELAFI PURCELL: Faafetai mo le faafesili. O le taimi o le lisi lea e fai ma review ai, pei lava o le tolu tausaga ona toe review lea ma toe fetuunai ai foi nisi tau talafeagai. Ae o le tulaga lena o lea ua i ai i le taimi nei. Ia, e faauma atu ai se leo o le sui o Satupaitea lau Afioga, ae se i faapai atu i lou itumalo.

E faatalofa atu i le paia oi si ou itumalo o Satupaitea, faamalo lo outou tatalo, i le susu o Asiata o le Vaaimalae, o oe na falefa i ai Tumua. Susu lo outou Aiga Samoeleoi, o le aiga na mua i malae, afifio Tapaaau, afifio alo o Lilomaiava, alaalatai oe le mamalu i le ituaiga i le Alataua, faapea foi le tapuaiga mamalu a faafeagaiga mamalu o lo o salalau i totonusi o le tatou itumalo ma outou faletua, o faletua ma tausi, saoao ma le malosi o le nuu.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Faamalo lava i lo outou tatalo, o outou talosaga lea ua maua ai le malosi ma le toa o le tou sui usufono, o lo o solosolo lelei le galuega. Ia tatou feiloai i le vaiaso fou, tatou talanoa i le tatou atinae lena o le a amata i le vaiaso fou. Ia faamanuia tele le Atua i la tatou folauga i lenei tausaga Samoa, ia manuia tele Samoa, manuia le Fonotaga. Soifua.

SUI FOFOGA FETALAI: Ua faamalo tofa i lau Afioga i le Minisita o Pisini, Alamanuia ma Leipa ma Fanua o le Malo. Ia e moni lava lau saunoaga, e fa i ai Tumua, ae ono i ai Pule. O le agaga o lenei aso, malo saunoa ua manino le mata o le vai, o le ala foi lea o le le tele o ni faalavelave, atoatoa mea uma i le faamalamalamaga. O le mea lea, ia faamanuia le Atua i lau Afioga ma le Matagaluega, aemaisse o le tatou vaalele ia ulimasao mea uma i lenei tausaga. Ou te tapa lau Afioga i le Minisita mo Punaoa Faalenatura ma le Siosiomaga.

Afioga Hon FIAME NAOMI MATAAFA (Minisita mo Punaoa Faalenatura ma le Siosiomaga): Lau Afioga i le Fofoga Fetralai, a outou Afioga i alii ma tamaitai sui usufono, le tapuaiga a Faauluuluga ma sui o Matagaluega ma Faalapotopotoga a le Malo ua tatou Fono faatasi, tainane le tapuaiga a Samoa i ona tulaga faalupe i paia faale-Malo, le tapuaiga a Ekalesia i ona fatafaitaulaga e fia. Ia, aemaise paia faaleaganuu. E faatalofa atu i lenei itula, malo le lagimama ma le soifua lelei.

Lau Afioga i le Fofoga Fetatalai, na saunoa le Taitaifono o le Komiti o Tupe, ma e moni lava ia, e leai sau tupe o maua i le Tala Faatatau Faaopoopo ae ui i lea, e ao pea ona talifuaiteau i mataupu sa laga e sui usufono mamalu, aua e fesoottai lava le Tala Faatatau o le Tupe Faaopoopo ma le Tala Autu.

E amata atu sa matou faamatalaga i le mataupu sa laga mai e le sui usufono mo Gagaemauga Nu.3, i le fuaina lea o fanua. Lau Afioga i le Fofoga Fetalai, e i ai nisi o itumalo tetele o le atunuua ua faapea ona mafai ona faatino ni a latou faamasinoga e faataatitia ai tuaoi tetele ia. Ma e le taumate e faapea foi le itumalo o Gagaemauga Nu.3, e faapea foi i le itumalo o Atua, o lea e afio atu le Afioga i le Palemia, le Afioga ia Tafua. Ma e o le taua o le mataupu na laga mai e le sui usufono, o le mea muamua, afai sa fai ni mataupu a le faamasinoga ma e sa autovaa itumalo e moomia le faaiuga i lea mataupu, o le a le mea o le a le faamaau lelei ai ma faamaopoopo. Ae malie lava lau Afioga i le Fofoga Fetalai le tatou atunuua, e faapena ona oo atu i luma o le faamasinoga ma fai ai faamasinoga e uiga i tuaoi ma fai i ai faaiuga, ae a taumafai atu e fua o tatou tuaoi, ae tete. Ia, a o lea lava ua saunoa le sui usufono, ma e toe faamanatu atu ai i le mamalu o le tatou atunuua taunuuga ia o le tatou o atu e fai mai faaiuga a le Faamasinoga. O le faamauina foi e ala i le fua o tuaoi nei aemaisse tuaoi tetele nei e vaevae ai o tatou itumalo, atonu o se amataga lelei lea e taatia lelei ai, manino ai pulega e le gata i alii ma faipule o nuu ma afioaga, ae faapea foi ona manino ai ni fuafuaga a le Malo o lo o fia faataatia i lea taimi ma lea taimi, ona ua manino le taatia o le pule i o tatou fanua.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ma ua amata nei ona faagasolo se polokalame o lo o galulue faatasi ai le Matagaluega o Faamsinoga ma le Matagaluega lenei o Punaoa Faalenatura ma le Siosiomaga, ina ia mafai ona tuliloaina ai le fuaina o tuaoi o itumalo tetele. Ma o le fuafuaga o lo o i ai, e faatupe e le Malo le 75% o le fuaina o fanua ia, ae lafo i itumalo nuu ma afioaga e 25%. Ma o se mea tau amata, ma e le taumate lau Afioga i le Fofoga Fetralai o lea foi o lo o i ai se Tulafono o lo o fuafua mai, atonu e maua ai foi nisi avanoa tatou te feofoofoi ai e uiga i le faaaogaina o tatou fanua faaleaganuu. Ae tau ia ina ia faailo atu faapea i lau Afioga i le sui usufono sa laga lenei mataupu, o lena ua faapena ona faataatia se faiga fou a le tatou Malo e tali atu ai i ia tulaga.

O le lauina o le oneone, o lena lava ua silafia e le mamalu o le Maota, e i ai lava le tatou Tulafono o lo o pulea a i le gaoioiga lea, e ao lava ona faia le pemita. O le tulaga lava lea o le ave o le oneone e aunoa ma ni pemita, e manaomia lava le galulue faatasi o le Matagaluega ma le atunuua ina ia faapea ona faamanatu pea ia i latou po o kamupani po o tagata taitoatasai o le tulaga lea e manaomia o le pemita. Ma o le faiga o le pemita e aiaia ai foi le talafeagai po o le le talafeagai o le faiga o le oneone mai lea vaega o le atunuua ma lea vaega o le atunuua.

O se tasi o mataupu taua tele sa laga mai e sui usufono, vaeane le paia o le Maota, o le tulaga lava lenei o lapisi, aemaise o pepa plastic. Lau Afioga i le Fofoga Fetalai, sa i ai le tatou Tulafono e aumai ai ua suia ai le aumai o pepa plastic i totonu o le tatou atunuu, e aumai ai pepa ia e mafai ona pala, ae peitai, e pei foi o le tele o isi mea o lo o tutupu i totonu o le tatou atunuu, e fai ae le o atoatoa ona fai. Ma e talitonu o le faiga lava lea e tatau ona tuliloa e Matagaluega ma o se vaega lenei o lo o mataituina e le Matagaluega, e le gata i luga o le laueleele, a o le fesootaiga o le lapisi mai le laueleele ma faaleagaina ai o tatou sami. Ia pei ona outou maua foi i nisi o faaaliga, ua i ai le tulaga o vasa, o le kelope ua faapena ona saputu atu i ai lapisi nei, e tele le afaina o ia, o figota, afaina ai foi la gaoioiga ma galuega o lo o faamoeomoe i faiva ma e le gata i lea lau Afioga i le Fofoga Fetalai, o le faaleagaina lava o le tatou siosiomaga, e le gata i le laueleele ae faapea foi i le tatou sami.

Masalo ua taulalata ona tatou soso atu i le mea foi o lo o faia e isi atunu o le taofia atoatoa loa o pepa ia. Ae le na o pepa plastic bag, o lena tou te silafia le anoano o le tulaga o lo o i ai nei. O le faaaogaina o le plastic ma ua tatau lava ona faatupulaia le vaega lea o le toe faafouina po o le recycle e pei foi ona faatino, a o vaega ia e tatau ona maua ai nisi foi pisinisi e faavae ai ma faatino ai faiga paaga o lo o faapea ona uunaia pea e le Malo ina ia tatou o faatasi i ai aua se lumanai manua mo le tatou atunu.

O taligalu, o tulaga lava ia sa saunoa mai pea sui usufono mamalu, ma e taua. Ma o lo o faagaso nei le toe vaiaa fuafuaga lea e tau e tatou o le community intergraded plans mo le isi sefulu tausaga, ma o fuafuaga nei tatou te galulue faatasi ai ma le Faletupe o le Lalolagi faapea ma Malo Aufaatasi, ina ia faataatitia lelei ni fuafuaga aua lava matapu nei o lo o feagai ma le lalolagi atoa o le suiga o le tau ma ni galuega talafeagai.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

O taligalu pei sa tau faaatagia i sau faamatalaga i le tatou feiloaiga foi i le Tala Autu o le Tupe, e taua tele mo le puipuia mai o tatou alatetele, ma o le lava ua tatou molimauiua le aoga o le faaaogaina o taligalu mo le tulaga lea. Ae peitai o le puipuiga o le lautele o le atunu, e ao lava ona tatou vaavaai totoa i isi auala e mafai ai ona tatou tali atu i le solo o le tatou eleele ona o le suiga o le tau. Ae ou te toe faamanatu atu pea mo i tatou, e mafua le suiga o le tau ona o amioga a tagata soifua, o le taina o tatou laau i tafatafa o vai ma faapena ona le totoina o tatou laau i tafatafa o fale, o faiga faigofie ia e mafai ona tatou fesoasoani ai i le tatou siosiomaga, ae ou te manatu ua le toe mamaao ae mafai ona taatia se fuafuaga mo le taligalu i luga o lea fesoasoani.

Lau Afioga i le Fofoga Fetalai, e i ai nai mataupu sa laga mai 1 le agaga o le fia faafraigifieina o galue tau atiae e i ai le tatou LTA, o le Matagaluega o Galuega ma le Matagaluega lenei, aemaise o gaoioiga a le PUMA. Na ona ou toe faamanatu i lau Afioga ma le mamalu o lenei Maota, e eseese matafaioi, ioe, i le agaga lea o lo o faapea mai e tatau ona tuufaatasi uma itutino ia ina ia faafraigifie ai. O lea e maua atu le agaga ina ia faafraigifie, ma o le lui lava lena e feagai pea ma le Malo i ala o mea e tapena ai gaoioiga ae le mafai ona aveesea ai le matafaioi e tatau ona tulituliloa e lea Matagaluega ma lea Matagaluega. E le aumaia le faafraigifie e soloia ai le faatino o le matafaioi e tatau ona fai e lea Matagaluega ma lea Matagaluega i lalo o pulega faaletulafono ma fuafuaga faapena.

Ou te manatu lau Afioga i le Fofoga Fatalai, na o le pau ia o nai mataupu sa laga mai. Ae i le tulaga aaoatetele tau lava o nai faamatalaga pupuu, sa saunoa le Afioga i le Palemia e faaalia lona finagalo fiafia i lenei Fonotaga ma...

SUI FOFOGA FETALAI: Ou te faamalulu atu i lau Afioga i le Tamaitai Minisita, se i tuu atu lava le avanoa i lau Afioga i le sui usufono mamalu mo Aleipata Itupa i Lalo.

Afioga Tafua Maluelue Tafua (Aleipata Itupa i Lalo): Faafetai lava i lau Afioga i le Fofoga Fetalai. E faamalulu atu foi i lau Afioga i le Sui Palemia le Minisita o saunoa, e leai sa tuu lava e le faalavelaveina le saunoaga, ae puupuu lava lau mataupu. O au sa ou talanoa atu i le vaega lea i le fesopoi o tiute ma matafaioi a tatou Matagaluega po o vaega ia tumaoti SOEs. O le faataitaiga pei o le vaega lea pei ona e saunoa i ai o le PUMA faapea foi le Matagaluega o Galuega, Works, po o le vaega foi lea o le aufai auala o le works foi ma le LTA. E fesopoi i le matou maitau i a matou saililiiga ma suesuega pe a matou faatalanoaina Matagaluega ia ma Matagaluega Tumaoti a le Malo. O se faataitaiga lau Afioga pei ona e saunoa o le PUMA, a omai le Matagaluega o Galuega, o le latou faamatalaga, o latou e faia design o auala ma le design... o latou foi e pasia le design o fale, o le structure ma mea faapena. O le PUMA ia o le latou lava matafaioi o lea e manino i lalo o le Tulafono, o le vaaia lea o le siosiomaga mo le saogalemu, e faapea foi ma le soifua laulelei o tagata.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

Ae ou te tulai atu lava ma le faaaloalo lau Afioga, ou te manatu lava e ese le lavelave o le mataupu ae ou te iloa e faafaihofie pe a aumai se legal opinion po o se mafaufauga faaletulafono e suia ai tatou Tulafono ina ia ogatasi matafaioi, e le overlap, e le duplicate, ma le tele ai foi o tupe a le Malo e faaalu i lea vaega. Ma ua ou talanoa atu ma le faaaloalo i lau Afioga faapea foi le mamalu o le Palemene, o la e faafofoga mai le Palemia, o manatu lava ia o lea e feteenai tele, o le vaega lea o le LTA, o le vaega o le siosiomaga, o le vaega o le works e i ai ma le isi vaega ua ou le manatu, o i latou ia e lipoti mai ma matou talatalanoa e mananaao le isi vaega e avatu ia latou. Ou te le iloa la po o tupe maua foi nei mai fafo, po o le latou lava manatu... o lou la manatu ma le faaaloalo, silasila pea i ai na ona tuualalo atu, silasila i le tatou Tulafono pe mafai ona fetuutunai vaega ia, e moni e le fesopoai, ae puipui ai le overlap o tatou galuega. Ma lou faaaloalo lava.

SUI FOFOGA FETALAI: Faafetai, o lea ua maua e le Afioga i le Tamaitai Minisita. Saunoa.

Afioga Hon FIAME NAOMI MATAAFA: Faafetai. Ae atonu o lena foi ua manino se vaaiga ae ou te iloa lava i le saunoaga a le sui usufono, e tele lava mea e i totolu o mataupu nei pei foi ona e saunoa mai ai, ae manaomia lava le tuliloa. Aua a tatou fua i le Matagaluega mo Galuega, o latou o lo o nafa ma le siakiina o ata o fale, o le LTA, o auala, o le matou Matagaluega po o le vaega o le PUMA, o le aafiaga o le environment. O isi la mea e maua soo pea i totolu o tatou Matagaluega, pe o le le manino foi o tagata ia i lana matafaioi, ma le isi mea, pe o le manao fua e tauave le mataupu a le isi. Ia o le natura lava o le tagata soifua, a o tatou lava ia o le tatou faatinoga o le galuega ma le atinae a le Malo, ae taatia maia le fanoga i lau Afioga i le Taitaifono o le Komiti o lo o feagai foi ma lipoti ia, o mea lava ia e tuliloaina pea ina ia mafai ona faatino i se tulaga lelei le tatou atinae.

O le aotelega la lea sa oo atu i ai lau faamatalaga i le saunoaga a le Afioga i le Palemia, i lona fafia i le tatou Fono lenei ma le siisii i luga o le tulaga i finagalo faaalia o sui usufono mamalu, equality of the dialogue pe a faapea e mafai oa tatou faapena ona faamatala.

Ua saunoa mai foi le Afioga i le Taitaifono o le Komiti o Tupe Maua ma Tupe Totogi, o lena foi ua talifuaitau le Afioga i le Palemia i le faamalieina foi o le matou itu o le Pulega i le faapea ona mafai ona atoatoa ma manino foi se lipoti mai o Komiti i totolu o le Maota e tusa ai ma le faatinoga a le Malo. A o mea lava ia ou te nofo ma ou faalogologo foi au ia i ai ma fesili pea i taimi uma tatou te feiloi ai. O le a ea le galuega a le Malo? O le atinae gafataulimaina, e le gata i a tatou alaoa, a o le alaoa tele lava lea o e o lo o i ai tomai e mafai ona faatino a tatou galuega, o ala o mea. O tatou processes. E malie lava le fetusiaiga lea na fai e luiina ai pea le vasega o Minisita po o le Pulega faapea i le tuai, tuai.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

Ae ou te faamanatu atu pea i le Maota, o le isi uiga lea ma le natura o Faigamalo, e faavae i luga o pulega ua faatulafonoina, we live by the laws. Ma e le faia le tatou Tulafono i le isi lima ae silimusia i le isi lima ona talepe ae aliali mai pea lava le mea lea i le tele o taimi i le saunoa mai o le tele o sui usufono, ma le mea lava lea o le fia tuliloa o le ia lava lea e manao ai le sui usufono lea ma le sui usufono lea. O mea uma lava ia tatou te mananao i ai. Ae aua ne i galo ia tatou, tatou te galulue i totonusi o le faavaea lea. O le faavaea foi lea e mafai ai ona avanoa tutusa uma lava tagata Samoa i le manuia ma le atinae o lea e tapena atu e le tatou Malo mai lea taimi i lea taimi.

E i ai le isi upu faapapalagi foi lea, the end justifies the means. A maua lava le taunuuga, e le taua po o lea le auala na fai ai. E le mafai la ona fai le mea lena i le mea lea, le mea lea tatou te galulue ai, ona e a? E faatulafonoina i tatou, ui faapea, alu faapea, e faapena ona fai. Ona e a? O le mea faitele, e le o e mea a matou lea e nonofo atu i i, o le Malo o Samoa ma ona tagata. Ma a mafai ona tauave e le Malo ona tiute i auala ua faatinoina faaletulafono, tatou te faamoemoe e faapena foi ona manuia. Ae tatau lava ona tilotilo pea o lea tou te lagalaga mai pea i lea Tulafono ma lea Tulafono, po o sao, po o lelei. Ae aua ne i galo ia tatou, o le faavae lena o le tatou galuega, e pule e le Tulafono. Ma o lau upu mulimuli lau Afioga i le Fofoga Fetalai, aua foi ne i galo ia tatou, o Samoa o se atunu laitiiti, o se atunu tauatiae, ae le o soifua foi ma ola Samoa na o ia, e soifua ma ola Samoa i le taamiloga o le kelope lea ua i ai nei. Saunoa se isi sui usufono, a faapea o lea lava e fai a tatou galuega i nai a tatou lava tupe ia e maua, faigofie ona fai tatou tonu, pule lava tatou. A o le a le mea e tupu i le gaoioiga o le kelope ma le tatou i ai foi o tatou? E tele le fesoasoani lea ua oo mai. E pei ona malie ai foi le saunoaga a le Taitafono o le Komiti o Tupe, ae afu uma ia mea lau Afioga i le Fofoga Fetalai, o tatou tu ma tatou aganuu. E i ai foi isi faalogona e faapea, a tau loa le tu ma le aganuu, o le mea e leaga, o le mea e tuai, ua le talafeagai mo lenei taimi. O le tu ma le aga a le tagata soifua, e sui lava i le faasologa. Ma o le mea lava e fai e tatou, o le tatou tu ma le tatou aga lea. Ae peitai, e pei foi ona soifua faaletulafono tatou i pulega faale-Malo, e i ai foi a tatou faavae faa-Samoa, aemaise lava le faavae o le fetausiai, o le tatou va. O le mea lena e eseese ai Samoa ma isi atunu, ma o lea e solosolo malie lava lo tatou sa i le atinae o Samoa.

Ia, i te i ua umi se matou faamatalaga lau Afioga i le Fofoga Fetalai, o nai manatu na i le tatou Tulafono o lo o faagasolo nei, ia manuia tele le Fono. Soifua.

Susuga HON TUILAEP AUELUA FATIALOFA LOLOFIETELE NEIOTI AIONO GALUMALEMANA Dr. SAILELE MALIELEGAOI:
Lau Afoga i le Fofoga Fetalai, o lena ua tali atu ia le aiga Kapaneta, ma ua i ai le taofi ua matua manino lava mea uma i le faafogafoga mai foi o le Maota ma le faafogafoga mai a le atunu. Ia e laititi a nai mea ia ou te fia pai atu i ai ona tatou see atu loa lea i le auliiolina o le tatou Tala o le Tupe.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E i ai le faamoemoe o le Malo sa avatu i le Tala o le Tupe e leai se tatou Tala Faaopoopo, ia ma o lea sa toe tulituli mai, ina ua iu ane ua toe fai le tatou Tala Faaopoopo. O le mea lea o le leai o se Tala Faaopoopo, o le faanaunaautaiga lena o le Malo ina ia mafai ona tuu i totonu o le Tala Autu o le Tupe mea uma lava e manao i ai le Malo mo le tausaga atoa, i le vaai mai a latou mo planners, o se faiga aupito sili lea ona lelei. Ma o le faamoemoe foi lea ua leva ona taumafai i ai le Malo mai lava i le taimi na tutoatasi ai tatou, fautuaga foi a latou na o mai mai fafo i lena taimi na taumafai ina ia le toe i ai ni Tala Faaopoopo o le Tupe.

O lea la e oo mai nei, o lea e taumafai le Malo, ina ia aua ne i toe faia nei mea o Tala Faaopoopo, ina ia matua uunaia ai Matagaluega ma Faalapotopotoga, e aumai uma lava mea e manao e fai i le tausaga. Ae le natia, o le lalolagi lea tatou te i ai, o le lalolagi o suiga. Ia ma o le ala foi lena e ala ai ona fai nei mea o Tala Faaopoopo pe te i ua oso se afa, ia o i tatou te tua i ai aua e oo lava i le vaegatupe foi lea e faaleoleo, e le taitai lava pe a oo i le taimi e afaina ai le atunuu lenei i le afa.

O le tali lena e faamalamalama ai le agaga o le Malo ina ia aua ne i toe faia nei mea o Tala Faaopoopo, ae faigata tele, ona na o le Atua na te silafia le atoaga o le lalolagi lenei ae le i uma le tausaga i le agai i le lumanai. O le ala lena o lea e fai ai Tala Faaopoopo o le Tupe, a o le Tala Faaopoopo o le Tupe o lea e i ai nei, e na o le \$23 miliona, ae faaopoopo atu i le Tala Autu o lea e faagasolo, o lea e faagasolo le Tala Autu o le Tupe, e le i faapea ua uma. E na o nai seleni la e avatu, e faaauau ai galuega se i tau lava i le faaiguia o le tausaga lenei.

I le 29 tausaga talu ai, le tausaga e 1989 a o avea au ma Minisita o Tupe, na ou fautuaina ai Tofilau ma le Malo ma le Palemene, sui, teuteu le tatou tausaga faaletupe, ua le o toe talafeagai. Mai le kalena, tausaga faa-le-kalena mai ia Ianuari e tau ia Tesema ae sui loa i le amataga o le masina o Iulai, e faaiu ia Iuni i tausaga uma. E lua mafuaaga na ou suia ai, o le mafuaaga muamua, ina ia ogatasi ai tatou ma taulalata ai i le faaiuga o le tausaga faaletupe a Niu Sila ma Ausetalia, o lo o liliyi mai ai le tele o fesoasoani mo tatou ona faigofie ai lea i le tulaga o le tapenaina o le tatou Tala o le Tupe, le o faatasi o tatou ma na atunuu.

O lona lua, o fonotaga i na ona aso, e matua oooo lava i ona ooooga le tulaga o le felauai, felauai i totonu o le Palemene. Ia ma o se Tala Autu o le Tupe e talanoa i le vaitaimi o le kerisimasi, o lea ua tatou talanoa e faalaulelei le ala, aua le fanau mai o le Alii o le filemu, a o lea e felauai ma lauai taitai o le atunuu i totonu o le Palemene, e le o se mea lelei lea i le faalogologo mai a le atunuu ona aumai ai lea o le teuteuga lena. O lea la ua 29 tausaga o faagasolo lava le tulaga lea i le tatou Tala o le Tupe Autu ua amata ia Iulai ae faaiu ia Iuni. Ma o tupe ia e toe aia nei, e tauave ai tatou mo le taimi lea e totoe. Ina ne i te i ua pea mai matua laitiiti ae e tele tupe ia o lo o i totonu o le Tatou Tala Autu e le i faaaluina. Ae o mea ia e faaopoopo atu, ina ia faaaaua ai ma faamaea ia tatou galuega.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E taua tele le Fonotaga lenei, ona ua oooo lauga i le loloto o tatou Tala o le Tupe ma nonogatupe. Ou te manatu foi e tatau ona toe faatepa le mamalu o le tatou Maota, i le aofai o tatou tupe ia e maua i le taimi lenei i a tatou lava sailigatupe, e aofia ai ma foai mai fafo, e \$868 miliona, e \$868 miliona, ona faatulaga loa lea i le faamuamua e tatau ona ave i ai.

O le faamuamua lava e tatau ona ave i ai, e tatau ona totogi a tatou tupe faaletulafono. O le a le mea ua faaigoa ai ia tupe o tupe faaletulafono? O i lea e muamua lava tuu i ai toese tupe e alu i a tatou nonogatupe, nonogatupe i fafo ma nonogatupe i totonu o le atunu. Leaga o i, lea e taui ai le tamaliiaga o taitai o le atunu, tulaga tofi mamalu uma, o i i le noatia i mea o nonogatupe le tamaliiaga o le atunu atoa. O lona uiga, a o le i toesea se seleni o tupe tatou te maua, e muamua lava vaegatupe faaletulafono, lea e tatau ai ona totogi a tatou nonogatupe i fafo. Sosoo mai ai loa lea ma polokalame e faagaoioi ai le Malo, totogi o tagata. E le o se mea lelei se Malo e le totogia ni ona tagata. O lena e ave i ai ia le faamuamua lona lua, o le faagaoioiga o le Malo, ina ia gaoioi pea le Malo ia aua ne i nofo.

Ia, ona sosoo mai ai lea o tupe alu faale-tulafono, o tupe ia e faaleoleo e tua i ai ia le Malo, pe a alu alu alu, ona uma lea o seleni. O le mea la lena o lea ou te faamanatua pea i Faauuluuga o Matagaluega, e tele ina le malamalama i mea ia. A uma se vaegatupe, na aiaia, o lea e i ai le avanoa e mafai ona aumai ai isi vaegatupe, savings, virement, e aumai i i e faatumu ai tupe ua uma. A o lea e i ai le isi vaegatupe e mafai e na o le Kapaneta lava e oo i ai lana faaiuga, o mea o tupe le fuafuaina. O le mea la lena a alu alu alu se Matagaluega ua uma, aua le nofonofoi, aumai i le Kapaneta e mafai ai ona faagaoioi pea le Malo, ina ia aua ne i alu alu, ona nofo lea.

O le aofaiga la o tupe nei o vaegatupe nei e tolu e ave i ai le faamuamua, lea o lo o taoto mai e \$669 miliona, ona toese loa lea o tatou tupe masani e \$868 miliona, ona totoe ai lea o le \$199 miliona. O i la, i so o se Malo e mamao lana faatofalaiga, ia i ai lava se seleni e avanoa mo ana atinae. Lea la e i ai le \$199 miliona lea, fuafua mo atinae. Aisea? E le agai i luma se Malo pe a leai se atinae, leaga o i, lea e create ai mo mea o employment, galuega mo a tatou fanau. O le ala la lena e ala ai ona faataua e le Malo, tau taofiofi vaegatupe ia lea e faaigoa o consumption expenditures, tau taofiofi, ina ia lava se tupe faaagaga mo le atinae o le atunu, leaga o i, lea e faavae ai galuega fai, galuega fou mo a tatou fanau.

O le faatulagana lena o le tatou paketi lea e i ai, e ave lava le faamuamua i luga, o le tupe e totoe, o le tupe la lena e faagaoioi ai le atinae. E masani lava ona augata tele le Matagaluega o le Tupe, pe a talosaga mai e fia fai lea mea, fia fai lea mea, ae taofiofi lava le Matagaluega o Tupe, ina ia lava le seleni, e faatino ai ana atinae. O le tupe la e totoe mai e faatupe ai atinae, \$199 milionia.

Ae o le a le mea lea e tupu? O le atinae lea e i ai e \$279 miliona, ae na o le \$199 miliona lea na totoe, o tatou lava seleni. O le a la le mea ua oo ai i luga i le \$279? E mafua ona oo i luga o le \$279, ona o le tele o galuega ia e faagaoioi, ua ou faanoanoa lava i le vaega lea sa leotetele ae lea ou te le o vaai atu o nonofo mai i i.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E mafua ona faatetele ia atinae, ona o le faataua e le Malo o galuega fou mo a tatou fanau. O le ala la lea ua na o le \$199 miliona, a o lea ua tulai mai le atinae, e \$279 miliona. O le a le mea ua oo ai i i? O le tali, o lea e faatupe mai i totonu o nonogatupe e mama le tului, e mama. O le a le uiga o lea mea o le mama?

O tupe nei, e i ai ni igoa o **grace periods**, taimi e malolo ai le atunu, e le totogia se vaega o le aitalafu, ae na o le tului e totogi, a o le tului foi la, e te maua ai i i tului faavalevalea e oo lalo ifo o le 1%, ae mai i faaputugatupe nei faavaomalo, ADB ma le IBA, e aumai i le soft window, o i e pau maualalo ai le tului e i lalo ifo o le pasene e 1. E te le maua se faletupe e aumai ai nei ituiga tului faavalevalea e pau i lalo, ae na faatu faapitua lava e faletupe tetele o le lalolagi, e fesoasoani mai ai i atunu e maualalo le atinae.

O le tausaga e 1991, na omai ai papalagi e toatolu, mai i le Development Fund a Italia. Na omai lea e fia fesoasoani mai Italia e fausia ni tou infrastructure po o ni hotel, ua avatu la le tului, e 8%, e ma te le mananao i mea na. A mafai ona outou aumaia ni nonogatupe e atinae ai le matou Malo e i lalo ifo o le pasene e tasi, ia ona ou io atu lea. O lona uiga e matua ou le manao lava i na mea. Ia na o loa lea i le Atukuki, lale e tu tu nei i le Atukuki, ia le faletele lava le faletalimalo, na faatupe e le vaega lea, na alu alu le mafai e le Malo na service, e le i uma foi le faletalimalo. O i i na na le toe palota ai le Malo o le Atukuki ia Jeffery Hendrick, ona o Jeffrey lea na ioeina le nonogatupe lea, ae na muamua mai ia te au, ia ona ou tutulia ese lea ma lou ofisa ou te le manao i ai.

O mea ia e tilotilo i ai Minisita o Tupe ma latou o lo o vaiaa mea tau tupe, tului, ma le taimi. O le taimi e totogi ai le tele o nonogatupe nei, o isi e oo lava i le 30 tausga o togitogi, ae o le 10 tausaga muamua, e leai lava ma se aitalafu e totogia, e na o se tamai tului lava e totogi, se tamai mea lava e totogi. O lona uiga, o mea tetele ia, e maua mai i faalapotopota nei, sa maua e tatou ona o tatou o le atunuu tauatiae, o le atunuu e i lalo ifo o le \$1,000 le tupe maua a le tagata e toatas i le tausaga. O le fua lena sa masanii ona fua ai atunuu matitiva, sa i ai la Samoa i ina. Ae ua alu alu ua oo i luga ua ova i le \$10,000 le fua faalaugatasia, o i na la na tupu ae ai le manatu o le Malo Aufaatosi, o le a soloia ese Samoa mai le lisi o malo e maualalo lo latou tamaoaiga. O lea la na soloia ese ai tatou i le masina o Ianuari le 2014. O lea na amata ai loa ua le o toe catergorised tatou i lalo o atunuu matitiva, mai ia Ianuari 2014, ua taua nei tatou o le Medium Income Level Country, ua maualuga lona tamaoaiga, aisea? E ova i le \$10,000 pe a faasoa le tagata e toatas tupe maua i le tausaga, po o le GDP, o le tulaga lena na oo i ai per capital income e ova i le \$10,000.

O mea la ia e tilotilo i ai le Minisita o Tupe, i tausaga uma tausaga uma, e tilotilo i ai le Palemia i aso uma aso uma ma le Failautusi o le tupe. O le a le tatou GDP la e i ai? O lea ua \$2piliona \$100miliona le mea lea ua i ai tatou. E tusa o tupe na o lea e sau i totonu, o le atunu \$2piliona, \$100miliona, o tuufaatasiga lena o tupe maua a tagata taitoatasi ua faaopoopo faatasi.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

E i ai lava auala e faaaoga e economist, e fua ai le tupe, sau i totonus o le atunuu. E \$2piliona, \$100milliona, o tupe na o lea e faagaoioi, lea e taavili i totonus o le tatou economy i tausaga uma tausaga uma, ma o lea e tupu pea.

O le isi mea e tilotilo i ai le Minisita o Tupe ma le Palemia ma le Failautusi o le Tupe, o le a le paleni o le tatou cash flow lea e i ai? O le a le tulaga o teugatupe? Ia aua, ne i alu alu nofo se galuega, ia lava tupe a le tatou lava atunuu, i totonus o tatou accounts.

Ia ma le 3, o faapefea mai le tatou reserve? Teugatupe ia mo le okaina mai o oloa. E o faatasi mea ia e lua, a soona fai, faaalu tupe, tupe ia a tatou lava, cash flow, e spill over i le faaaaogaina o a tatou reserves. Aua e faaalu loa le tupe, e alu loa le tagata e faatau mai ai le mea e aumai mai fafo, po o le apa eleni po o le a. E tele loa tupe i le lima o le tagata, o le mea lena e tupu, o le spill over, draw down loa ma le tatou reserves.

A le vaavaaia lelei la ituaiga tupe ia e lua, e uma ane ua bankrupt tatou e pei o le mea lea na i ai ia le nofoaiga na i tua atu o le Faigamalo lenei. O le ala lena na palota ai tagata i le Faigamalo lenei, se i omai e toe tau togafiti le atunuu ua bankrupt. Ua le gata ina faaletonu ana cash flow, ma teugatupe, ae ua sili ai ona oti le tulaga o teuga tupe faaleoleo mo fefaatauaiga. O lea na mafua ai ona tatou tilotilo i lena taimi, na o ponaivi patuamoa, ponaivi patuamoa, na afford e tatou aufaipisinisi e aumai i totonus. O mea la ia e vaai i ai le Minisita o Tupe i aso uma, aso uma, ma ou vaai foi i ai i aso uma aso uma, e faapena foi le Failautusi o le Tupe. O le ala lena a tofi loa le tagata i le Failautusi o le Tupe, e le soona tofia i ai ni tagata faaletonu, e matua tofi i ai lauia, na te fautuaina le Minisita o Tupe, o le Minisita o Tupe na te fautuaina le Kapeneta, i le mea e tatau ona fai ina ia aua, aua, aua ne i faaletonu teugatupe nei, le cash flow a le Malo ia lava. Lua, ia lava le foreign reserve, ma le 3, ia tupu pea le GDP.

O le ala lena e taua ai tele lou oooo i vaega nei, lea la ua faatupe vaega uma nei. Ia manatua o polokalame ia e alu nei, o polokalame e 2, 3, 4 tausaga o la e alu lava ma mea o galuega e faatupe mai i nonogatupe nei e mama le tului. O le ala la lena, e faatulaga ai le tupe ina ia i ai se surplus, a i ai la se surplus, e le o ni tupe ia e surplus, ae o galuega ia totoe o lea e faatupe mai e faalapotopotoga mai fafo. O galuega o lea e faaaauau. Ia manatua lau Afioga i le Fofoga Fetalai, e le faapea na fau atu loa le falemai la le uma i le tausaga e tasi. E 4, 5 tausaga o la e alu lava le polokalame, alu lava le polokalame, ae o lea ua uma ona pasia, nonogatupe e aumai e faaalu ai mea nei, o nonogatupe o soft loans e faatinai ai galuega, o le ala foi la lena, o lea e alu ai lava ma alu ai lava ma liliu ai le Malo e aumai ia nonogatupe mai i i faletupe tetele ia.

Sa faapea pe alu alu nei siitia lo tatou tulaga, ona pau loa lea o le fesoasoani lea mai fafo. Ae te i ane, ua ese foi faiga a tatou paaga, ua latou faaaoga le isi fua, o le fua e aliali mai ai, o lea e faaaoga e le tatou Malo principles of good governance of accountability and transparency, aemaise le mea lea o le fai ma ave mea i le atunuu, for consultation, mea uma na e lavea i totonus o le good governance.

Tulafono Tau Faaofi o le Faatatauina o Tupe Faaopoopo (Nu.1) 2017/2018 – felafolafoaiga i luga o le faitauga faalua

E consult ma le atunuū i auala i fonotaga ia e valaaū, ia se i tatou feiloi i Savaii pe tatou feiloi i Upolu e talatalanoa mataupu o le faaaoga o eleele faaleaganuu, i mo mea o lisi. E toeitiiti 3 tausaga o fai consultations na, ae taitai ai Oka Fauolo o se tagata atamai, o le faifeau e taualoa, o le iuga na fautua mai, e lilifa le atunuū e faaaoga a latou fanua e maua mai latou seleni i lisi. A o lisi nei, e faaaoga o latou fanua, a uma lava le lisi uma, ona toe foi mai lava lea o le fanua i le ana le fanua faaleaganuu. O le ala lena o lea ou te matau pea ma ou matamata i le cycology, cycology o tagata ia e tiga ona iloa e sese mea ia latou te aumaia, ae aumai lava.

E i ai le tusi na tusia e Hitila, e faaigoa o le Mein Kampf. O le tusi lea na tusia e Hitila, o lo o i ai upu nei, -a e faasaga e pepelo se tagata, e te pepelo pepelo a talitonuøo le mea lena o lea e faaaoga e tagata ia, o le cycology faa-Hitila. A e toaga e pepelo, pepelo, pepelo le atunu, e faaaoga i ai le facebook, e i ai lava le taimi e oo lava i tagata aoaoina, e ono oo lava ina talitonu i ai ia te oe.

Ia ua outou vaai i ai i tagata popoto o Siamani, mo saienisi, ae na iu lava ina talitonu ia Hitila, ona o le Mein Kampf lea sa sau atoa ai lana philosophy, -how to make people believe you, even a very stupid lie, they will believe you. If you keep on repeating, and repeating and repeating, o le tulaga la lena o lea e fai e tagata nei, o le pepelo, pepelo le ata, ae o tagata o tagata aoaoina o loia, aemaise loia la e lafi lafi ae lea ou te iloa uma lava, la ou te iloa uma lava. Ae pau lava le mea ou te faaeteete i ai, faaeteete i ai i le latou safety, aua e tofu lava tatou ma tatou aiga ia ma tagata e leaga ulu. O la e sue e tagata nei i le soona faaleaga mai o outou, a maua e ono afaina. O le agaga lelei lea e tau puipui ai foi ia i latou, e ui o upu e lafo, o le matua mataga.

Lau Afoga i le Fofoga Fetralai, o le tulaga lena o lea e taua ai tele le tatou felafolafoaiga lenei, o lea ua matua agai lava i le atoaga o taumafaiga a le tatou Malo ina ia faatino atinae. O le tatou malae vaalele, le fale faatali pasese, na uunai malosi e le Kabeneta ae tetee i ai le ADB, tetee i ai Niu Sila, tetee Ausetalia, tetee i ai le World Bank, la e saofafai i le World Bank, sui o Ausetalia ma sui o Niu Sila. O le tetee, ona o lea o le a faatupe mai e tatou i le soft loan a Saina, na o le 27% le grant element, la foi e sao latou. Fai mai latou, e le matagofie le matou o i le Board e aumai le soft loan e avatu mo Samoa ae 35% le grant element, ae tou o i Saina e aumai ai le nonogatupe e faatino ai.

E le i usitaia e le i faalogo i ai le Malo, aisea? Ona o le taua o le atinae lea a le tatou Malo mo le toe lalagaina o tagata e asiasi mai ua tele faletalimalo ua faaletonu, aisea? Ua taofiofi e le Air New Zealand ma le Virgin i a latou vaa ia faalaititi vaa e malaga mai, ia atili ai ona create le image foi lele ua leai ni tagata ae sili ona faamuta i i.

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

Ma o le taimi lava na fai ai le iuga a le Kabeneta o le a lele le vaalele, te i lava ua fai mai, o la e toatele tagata e gafatia lava le toe lele atu o le matou vaa. O le matua pepelo o pepelo, a o lea sa faitau atu lava e le Kabeneta, le mafuaaga na toe fai ai le fale faatali pasese lea ma le fale lea pe a uma nei, o se fale aupito sili lea ona aulelei i atumotu o le Pasefika, ona o le agaga o le Kabeneta ina ia siitia tagata asiati maimoa mai, se i ola a tatou pisinisi, ia ma maua ai galuega a tatou fanau, ma taofi ai ma fesoasoani, budget support, taofi tutu ai lava faalapotopotoga uma nei, Niu Sila ma Ausetalia, taofi tutu ai lava ma le aumai o budget supports mo mea o grants.

O le ala lena na tapena ai loa ia le jusifications, o le standard e ave i o i le World Bank, e tau i ai, e sese le latou mea la e fai. Faatoa tatala mai i le masina o Setema i le tausaga na sosoo ai ina ua uma ona faitau, faitau, faitau i standards ia na avatu na tapena mai e le Treasury ma le Central Bank, ona ave ai lea o le standard lena, tilotilo i ai, tilotilo atu, e sao le faaiuga a le tatou Malo. O lena la faatoa toe tatala mai ai faitotoa ia na tapuni, ona e le manao e fausia le tatou terminals.

Ua ala la ona oooo i upu ia lau Afioaga i le Fofoga Fetalai, e i ai le fusuaga sa fai, lea na ou tau tomanatu nei o le 1950 ae le i soifua mai le toatele o outou i le Maota lenei, sa i ai le fale e igoa o le fale Tivoli ua mu. Sa fai la le fusuaga sa ou i ai. O le taimi lena a tumu loa e feaei tagata i iviivi o le Tivoli. O le tama Apia ma le Saleimoa, o le paga faai lava lea o le paga mamafa. O si tama la a talanoa foi lea e pei e tau stata, a tau le afi, o le api, a tau le fua o le pua. Ia lena la e alaga atu tagata taamilosaga muamua o le taamilosaga e 10, e lelei lava e taufai tutusa uma. Oo atu loa i le 11, ua tau vaivai le Apia, tau ai loa le taumatau o le Saleimoa, faatu loa i lalo ma le Apia lea, alaga atu loa tagata, tu i luga, tu i luga, kui, ia ona taumafai lava lea o si tama e respond mai i le valaau lea ona taumafai lava lea o si tama i luga, tu mai luga tui, na ona mei lava i tua o le Saleimoa togia mai le right cross tau i le gutu o le Apia toe taatia, a ua saga mai le gutu, ua toe tu i luga valaau atu tagata, tu i luga, tu i luga, tui, toe tu foi i luga le Apia, toe laa atu foi tui, toe pau foi. Ia, toe valaau atu loa, tu i luga, tu i luga, tui. Na ona tu lava i luga o le Apia lea fai mai le Apia, tu te vaai mai lava ua toto gutu ae saga valaau mai lava, fetagofia i tou upa. O le faaiuga o le tala, a e saofai i totolu o le Kabeneta, e ese mamao lava lou saofai mamao mai ma e vaavaai mai i le galuega a le Kabeneta. O le gaosa lea pei ona saunoa i ai le Afioaga ia Fiame, e tele mea e vaai i ai le Minisita ma le Kabeneta, aemaise lava la lea mea pei ona ou taua, good governance. Afai lava e i ai se reservation i se mataupu, toe faasalalau lava, leaga o ata na o faigamalo lelei. Ma o le suiga lea ua i ai Malo i fafo, ua aumai latou fesoasoani i luga o le atunuu latou te tilotilo mai o lea o lo o maualuga le good governance, pulega malolo lelei, ma e i ai Tulafono e faamasino ai le mea lena. O le isi la lea Tulafono, faasalalau. O le isi lea Tulafono, ia up to date lipoti aua ne i i ai ni mea alualua e aafia ai. Ia faasalalau i le atunuu ia lava le fefafolafoaai i le mataupu maaleale.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – fefafolafoaiga i luga o le faitauga faalua

Lau Afioga i le Fofoga Fetalai, a faatusa la Samoa i isi atunu o le Pasefika, e matua maualuga lava le mea lea e i ai Samoa. O le ala lena o lea e gauai mai ai finagalo o faalapotopota nei ma iu lava ina aumai ai isi grants, isi meaalofa ona e vaai mai o lo o maualuga le faatinoga e Samoa o lana pitolaau aemaise lava la le atunu lea o Ausetalia.

Lau Afioga i le Fofoga Fetalai, ou te iloa ua lava lea, ae taua tele le fefaasoai o finagalo sa fai nei, e atili malamalamai ai foi le atunu. O le mea aupito sili ona taua o le faafogafoga mai o le atunu, faafogafoga mai foi le Maota nei, e le o le atoaga o le nogatupe e taua, a o tupe e mafai ona totogi i lea tausaga ma lea tausaga o nogatupe, ma e taua tele le tou tuualalo, faaaoga pea avanoa e mafai ona maua, ma e fua lava i le malosi o tatou o le capacity to pay, e fua foi i le tulaga o le lava o tatou tagata. E i ai lava nai faaletonu i le tatou aufaigaluega, e le faapea ua selau pasene. Ae a fua foi Samoa i isi atunu o le Pasefika, e matua maualuga lava le tulaga lea e i ai le aufaigaluega a Samoa. Ae a tuu loa i mea o aiaiga faava o Malo aemaise mea o aiaiga a faalapotopota ia e aumai ai seleni ia, o aiaiga la na e tatau ona tatou amanaia. Ma o le mea la lena e masani ona tuai ai isi mea, o le tau faamalieina o aiaiga a faalapotopota nei, ae tasi lava le mea e agai i ai, ia aua ne i i ai se tupe e faamaumauina o latou seleni, ia faaaoga lelei. Ma ou te lagona, o le agaga foi lena o lea e i ai le tatou Malo lea sa saunoa atu ai le Sui Palemia, e i ai Tulafono e mulimuli ai tatou. Po o le a lava la le lavelave o le mataupu ma le vave, ae a oo lava ina fesiliglia e le Kapaneta se mataupu e le mafai ona atoatoa i ai lana vaai, e toe foi i tua e toe tapena mai isi lipoti ina ia faamalieina le Kapaneta.

Lau Afioga i le Fofoga Fetalai, ou te lagona ua maea mataupu sa ou manatu e tatau ona ou agai i ai, ae ou te fautuaina ia tatou o loa e auiili le tatou Tala o le Tupe.

SUI FOFOGA FETALAI: Faafetai. Ou te manatu o lea ua atoa lio le masina i le faaseega o le fala i pou o lauga i le tali a le Malo i le Aiga Minisita aemaise o le saunoaga a sui usufono mamalu i mea e fia faamanino ai. O lo o faafogafoga foi ma tapuai le atunu, o lea ua faafogafoga mai ua manino le mata o le vai, faafetai tele saunoa i lau Afioga i le Palemia.

Ua maea ona talifuaiteau le Malo e tusa ai o mataupu sa laga e sui usufono i saunoaga faalauaitele i tulaga tau tupe ma le tamaoaiga o Samoa ma faiga faavae tau tupe a le Malo.

Ua maea ona faatu le Lafo mo le faitauga faalua o le Tulafono Tau Faaofi i le aso 19 Tesema 2017 ma ua faaluaina.

Na faamaonia le lafo na faatuina i le aso 19 Tesema 2017, ma faitauina ai le Tulafono Tau Faaofi o le Faatatauina o Tupe Faaopoopo (Nu.1) 2017/2018 i lona faitauga faalua.

25 JANUARI 2018

TULAFONO TAU FAAOFI O LE FAATATAUINA O TUPE FAAOPOOPO (NU.1) 2017/2018 – iloiloga auiliili

SUI FOFOGA FETALAI: O le a sagai atu le Fono Aoao e iloilo auiliili le Tulafono Tau Faafofi o le Faatatauina o Tupe Faaopoopo (Nu.1) 2017/2018 ma le Tala Faatatau o Tupe Faaopoopo (Nu.1) mo le Tausaga Faaletupe e faaiuina i le aso 30 Iuni 2018 ma faapea ona silasila i le Lipoti a le Komiti o Tupe Maua ma Tupe Totogi i le Tala Faatatau o Tupe Faaopoopo (Nu.1) mo le Tausaga Faaletupe e faaiuina aso 30 Iuni 2018.

E faamanatu atu, e maua avanoa e lua tai 15 minute o so o se sui usufono e fesili ai i so o se Mea Taitasi e aofia ai Matagaluega o le a faagasolo ai le tatou galuega.

E tusa ai ma Tulafono Tumau 134(1), e amata le iloiloga o le Tulafono Tau Faaofia i ona Faamatalaga:-

FAAMATALAGA MUAMUA FAAQOPOQOGA I TUPE FAATATAUINA

MATAGALUEGA FAAMATALAGA AQFAILO TUPE ALU

PISINISI, ALAMANUIA MA LEIPA: \$102,915.

Faamaonia.

AOGA, TAALOGA MA AGANUU: \$700,000.

Faamaonia.

TUPE: \$5,660,000.

Faamaonia.

FAAMASINOGA MA PULEGA TAU FAAMASINOGA: \$60,270.

Faamaonia.

AUAUNAGA TAU FALEPUIPUI MA LE TOEFUATAIGA: \$5,200,000.

Faamaonia.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – iloiloga auiliili

PALEMIA MA LE KAPENETA: **\$112,7587.**

Faamaonia.

**PULEGA O GALUEGA TINEI MU MA FAALAVELAVE TUTUPU
FAAFUASEI:** **\$131,000.**

Faamaonia.

AOFAI O FAAOPOOPOGA I TUPE ALU AOA 2017-2018: **\$11,966,943.**

Faamaonia.

**FAAMATALAGA LONA LUA
FAAITIITIGA I TUPE FAATATAUINA**

MATAGALUEGA FAAMATALAGA AOFAI O TUPE FAAITHITIA

FAATOAGA MA FAIGA FAIVA: **(\$100,000).**

Faamaonia.

PISINISI, ALAMANUIA MA LEIPA: **(696,024).**

Faamaonia.

PALEMIA MA LE KAPENETA: **(120,304).**

Faamaonia.

AOFAI O FAAITHITIGA AOA 2017-2018 **916,328).**

Faamaonia.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – faitauga faatolu

FUAIUPU 2: **Faamatuu atu ma le Faatatauina o le \$11,966,943 mai le Faaputugatupe a le Matagaluega o Tupe.**

Faamaonia.

FUAIUPU 3: **Faaitiitiga o Aofaiga na uluai faatatauina ma toe faasoasoa atu i isi galuega faatino ma galuega faatino laiti.**

Faamaonia.

FUAIUPU 1 MA LE IGOA:

FUAIUPU 1: **Igoa puupuu ma le amataga.**

IGOA: **Faatatauina o Tupe Faaopoopo (Nu.1) 2017/2018.**

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2017/2018 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
 FAAOPOOPO (NU.1) 2017/2018 – faitauga faatolu**

Afioga Hon SILI EPA TUIOTI: Lau Afioga i le Fofoga Fetalai, ou te tulai atu e faatu le Lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.1) 2017/2018 i lona faitauga faatolu.*

Faalua e le Minisita mo Tina ma Tamaitai, Atinae o Nuu, Afioaga ma Agafesootai, Minisita mo Aoga, Taaloga ma Aganuu ma le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

Na faaalia le agaga fiafia o le Maota i le patipati o latou aao i le maea ai ona pasia o le Tulafono Tau Faaofi o le Faatatauina o Tupe Faaopoopo (Nu.1) 2017/2018.

25 JANUARI 2018

Tulafono Tau Faaofi o le Faatatauina o Tupe Faaopoopo (Nu.1)
2017/2018 – faitauga faatolu

SUI FOFOGA FETALAI: Ou te manatu o le siui lea o le tatou galuega i lenei aso e tusa o le lafo ua faamaonia. Ou te momoli atu ai le faafetai i le paia o le Palemene i ona tulaga faalupe i lo outou onosaia ma le lavapapale i lenei aso e pei ona faaopoopo ai itula faigaluega. Ou te talitonu ua vela le fala ma ua leva foi ona faaaaogasegase, ona o le manatu i lo outou valaaauina. O le mea lea ou te faapea atu ai, malo onosai, malo faapalepale, o fua o le agaga na tatou saili ai i le Atua, ua iu manuia ai faiva o lenei aso. Faafetai, viia le Atua.

A o le i tolopoina la tatou Fono, ou te tapa le sui usufono mo Faasaleleaga Nu.3 e saunia se tatalo e faaiu ai galuega o lenei aso.

*Na tolopo Tauualumaga a le Fono Aoao i le itula e 2:34 i le aoauli seia
aulia le itula e 9:00 i le taeao o le Aso Faraile, 26 Januari 2018.*